

东华续录

東華續錄

同治二十五

臣 王先謙敬編

臣 張式恭恭校

八月丙子左宗棠奏石埭太平踞匪復竄黟縣道員王文瑞等分路進剿該逆蠡擁而出我軍前後鈔襲奪關直入斃賊百餘名復將出城逃賊追殺其後路盧村等處之賊分道應援又經我軍擊敗沿途剿殺殲斃賊匪甚多生擒三百餘名解散不計其數餘黨遁歸石太老巢當將縣城克復嶺內仍就肅清查該逆自上年盤踞皖南每思就食江西且以牽動金陵浙江官軍之勢屢受重創狡謀未已見在黃李各逆竄擾湖口等處江忠義李榕兩軍雖屢得勝仗尙相持未下彭澤建德一帶之賊尙思乘閒奔突浮景防務未能稍鬆必俟江西肅清徽防穩固劉典王文瑞之師始可別

圖進取臣惟有仍飭各軍協力防剿以全大局李鴻章奏程學啟等攻毀沿湖賊卡後進擣大缺口賊營該逆憑湖死拒我軍分路進攻先將北岸賊營轟毀並派師船扼守飛虹橋口該逆不能逃遁悉數殄滅南岸賊營望風奔潰我軍乘勝追殺立將洞庭東山打館之賊全行誅戮統計斬殺二千餘人程學啟等遂督軍圍逼蘇州並派水師四營於南舍鎮暫紮扼守太湖要隘其進攻江陰之軍先經李鶴章調派隊伍拔赴楊厓會合進攻初七至十一等日更番挑戰疊獲大勝立將北門賊營踏毀十二日劉銘傳等會攻東門又將石壘三座次第攻克並斷截該逆歸路四面兜殺生擒逆目十餘名殺斃賊匪一千餘名各軍滾營進紮徧賊而壘候補總兵淮揚水師營官賴榮光中槍陣亡殊堪憫惻應請旨交部照總兵陣亡例從優議卹並准於死事地方建立專祠遊擊龍玉

麟應請一併交部從優議卹又奏臣自滬啟行於十三日至楓涇鎮該處賊壘經編修劉秉璋等攻破擒斬甚多臣於十四日督帶礮船察看河路直至浙江嘉善縣之西塘地方該處賊巢見飭潘鼎新等拔隊進剿十六日至吳江縣徧觀城垣內外扼紮尙屬嚴密十七日李朝斌徑往太湖臣泝流而上沿途有黃翼升水師扼守蘇州之賊不敢東犯十八日行抵蘇州之跨塘地方我軍夾湖爲壘地利旣得士氣尙奮其城根一帶俟程學啟布置齊整卽相機進攻臣查蘇州城大而堅四圍多水有程學啟一軍近徧於東南劉銘傳李鶴章各軍遠包於西北李朝斌等水師來往遊擊局勢似漸緊湊賊氛似已衰蹙但冀金陵杭州互相牽制別無大股來援臣軍勿稍抽動秋冬之間當有起色臣擬畱住數日與程學啟等籌商進取機宜再行轉柁而北由常熟至江陰徧覽形勢察

奪調度 上諭議政王軍機大臣等沈葆楨前奏江境一律肅清
曾經明降諭旨宣布寄諭曾國藩左宗棠沈葆楨以由江境遁去
之賊謀欲遁回石太再從徽屯以窺婺樂祐逆盤踞建德眾尙數
萬飭令速派江忠義等卽由江境跟蹤追擊以剿爲防並將石太
等賊一律掃蕩乘勝東下左宗棠卽飭令劉典一軍出羊棧嶺會
同剿擊毋令闖入徽境此時江忠義當已進紮東流將彭澤餘匪
掃除進剿遁回石太之賊劉典之軍入徽後亦可會同剿擊以清
皖境仍駐徽防以與浙軍相爲援應池防穩固此股由江西回竄
之匪不得肆其竄突東征各路之軍方無後顧之虞李榕江忠義
兩軍將此股敗匪殄除之後並卽可乘勝東下歸曾國荃調遣以
厚兵力著曾國藩左宗棠仍遵前旨安速辦理一面咨照沈葆楨
仍嚴督江省各軍及地方文武嚴密守備毋稍懈弛李鴻章偕同

李朝斌自滬至蘇巡歷布置太湖大缺口各賊營已破程學啟各營進逼蘇城之婁門葑門江陰進剿之劉秉璋等各軍亦將城東門外之賊壘攻奪所辦甚爲得手蘇城雖大而賊勢旣蹙程學啟一軍偪其東南李鶴章劉銘傳等軍規其西北李朝斌水師往來遊擊足資得力見在官軍已分路進至江蘇腹地曾國藩當檄飭進攻金陵之軍迅速合圍左宗棠卽可檄飭由富陽進剿諸軍銳意進取牽制賊勢俾蘇州江陰等城或有一處得手則江浙全局必能日有起色奇田土匪辦理尙爲妥速浙東新復各屬地方奸宄藏匿恐尙不少著左宗棠隨時嚴查飭令各屬於撫輯之中妥爲搜捕毋使伏戎潛行滋蔓將此由六百里各諭令知之○諭閩敬銘奏馳抵博平並催軍赴堂邑剿匪情形一摺閩敬銘由省城馳抵博平派令副將范正坦等各營分紮沿河上下李海務等處

東華新錄 卷之二十一 五
總兵保德臬司丁葆楨等軍在楊家莊並堂邑之定遠寨溫儀集
梁家淺地方將打糧焚掠之賊擊退並擊敗盤踞馬橋等處匪徒
其撲犯柳林團營之匪亦經各團勇夾攻殲斃多名官軍復將王
家海子賊圩攻破著閻敬銘卽督飭所部各營擇要布置與保德
等軍互相策應並與劉長佑各軍約期大舉節節進剿速將宋憬
詩股匪埽除毋稍延緩見在秋禾業已收割僧格林沁已埽平紅
山股匪移軍東昌保德丁寶楨各營屢獲勝仗劉長佑正宜乘此
機會迅督所部滾營前進聯絡僧格林沁閻敬銘諸軍速將宋逆
殲除毋得游移遷延致誤事機將此由六百里各諭令知之○諭
張之萬英桂各撥銀十萬兩解濟甯糧臺備僧格林沁南征軍餉
○予江蘇陣亡總兵官賴榮光祭葬世職建祠並山東陣亡遊擊
李芝芸浙江陣亡同知希慶祭葬世職○丁丑諭議政王軍機大

臣等穆騰阿張集馨奏攻破附省要隘及水腰村等賊巢覆陳省城見在回情各摺片光太廟賊巢業經攻破水腰上下等村亦一律平毀逆回餘黨竄在沙河玉河一帶曹克忠所向克捷見令副將陳開泰等軍屯紫光太廟與多隆阿前敵營盤相對止隔一河即可進逼沙河與多隆阿前奏情形尙合光太廟回巢旣克據張集馨等奏省城回局漸鬆其半閣村曾否攻入高陵進剿是否得手沙河玉河之賊曹克忠一軍能否次第殄除著多隆阿乘此聲威嚴督各軍迅圖攻剿鳳岐被圍已久聲息隔絕刻下是何情形馬德昭受傷是否痊愈曾否帶兵啟程甚深廬系雷正綰馬德昭究竟何員可以統兵赴援鳳岐著多隆阿懍遵前旨速飭分投前往毋再遷延甘省平涼固原兵力單微剿辦極難爲力並著多隆阿豫爲籌畫迅速分布穆騰阿於省城防務責任綦嚴張集馨暫

署撫篆亦屬責無旁貸不得一切粉飾將就致蹈瑛檠故轍馬德昭一載以來於戰守事宜尙稱得力此時曹克忠之軍可以專力城內外防剿馬德昭自可前往西路與雷正綰之軍分投布置此等機宜仍著多隆阿酌量定奪回員馬百齡仍著張集馨設法鈐制隨時防範毋稍疏忽省城回民仍妥爲安輯儻令搖惑致生事端或稽察鬆懈有與逆回勾結等情必惟張集馨是問將此由六百里諭知多隆阿雷正綰穆騰阿馬德昭並傳諭張集馨知之○戊寅諭議政王軍機大臣等劉長佑奏督軍滾營進逼壘獲勝仗一摺直隸官軍在臨清南岸之舊縣于家樓地方趕築營壘逆匪馬步更番撓撲疊被擊卻又分股竄至尖莊對岸調馬橋一帶意圖搶渡經防河弁兵擊回是防剿情形漸次得手惟該逆股數眾多詭詐百出飄忽靡定該處地勢平衍曠闊尤易旁竄非四路邀

擊不能制賊死命劉長佑見與江長貴等軍築定新壘移營進逼恆齡蘇克金亦各督所部馬隊分路追擊王榕吉等嚴防河岸遏其紛竄所籌尙妥著卽會同各軍實力進剿並著扼要設伏防其奔突閻敬銘已抵博平所派各軍調赴堂邑與保德丁寶楨等所統兵勇合隊擊賊直東各軍已漸聯絡僧格林沁剿平教匪後親督舒通額等馬隊馳抵東昌諸軍更有統屬著卽督同直東各將弁遇賊卽擊先將四面股匪次第殲除然後大舉合圍迅攻老巢將首要逆匪悉數埽除以清畿輔劉長佑閻敬銘亦當激勵將士恪遵調度以期同心勦力迅奏膚功諒此區區小醜不難剋日蕩平也將此由五百里各諭令知之○諭馮子材等奏南路大股援賊糾合丹陽各匪撲犯鎮防官軍分投迎擊獲勝相機堵剿一摺見在圍攻金陵水陸官軍正期得手該逆糾黨撲犯鎮防自係爲

援應金陵牽掣我師起見馮子材等見已飭總兵田宗揚等督率馬步各軍分投迎擊著卽督飭該總兵等奮力堵剿務將此股內犯各匪亟圖翦除勿令紛竄以致我師爲所牽掣北岸沿江一帶嚴防竄越固不可稍涉鬆勁惟南岸賊匪屢圖撲犯鎮防冀思一逞刻下揚防稍鬆都興阿務須與南岸各軍聯絡一氣如鎮防有警卽抽撥水陸官軍渡江助剿以壯聲威將此由五百里各諭令知之○諭恩麟奏西甯華寺臨洮回民糾眾相持派馬奎源等前往解散並擬用蒙番幫同漢民籌辦暨軍務喫緊請飭催何勝必督兵援甘馬德昭迅解平涼之圍及成瑞勸諭出力懇請量予減等各摺片西甯華寺臨洮兩教回民聚眾爭鬪旋復糾約戎屬撒拉幫助肆行攻擊湟屬地方騷然而丹噶爾境內被擾情形尤重亟應乘其釁端初起趕緊解散以免燎原原任參將馬永泰之妻

也氏及其子馬奎源既據恩麟奏稱素爲回教信服飭赴西甯解
釋紛爭卽著玉通督同道員雅爾佳納責成該頭人認真妥辦儻
能奮勉出力安靖地方准由熙麟等據實請獎至護西甯道郭襄
之從前籌辦善後事宜已據稟報歲事何以此次回民又因爭教
仇殺可見該員所辦均係紙上空談一味粉飾著熙麟恩麟查明
參奏青海蒙番向與丹噶爾漢民往來而貴德巴燕戎格兩廳番
族素與撒拉有隙恩麟見在咨商玉通檄爲我用固可藉壯聲威
惟番族素性獷悍蒙兵亦未見得力儻非萬不得已自未便借資
他族致滋流弊玉通務與恩麟隨時妥商設法籌辦毋稍輕率狄
河之案甫經寢息而安定皋蘭金縣三處交界又有劫殺附近回
莊之事匪類心志最齊難免不圖報復恩麟見派成瑞等相機彈
壓一面增軍募勇於近省各要隘安營駐紮以定人心卽著恩麟

認真妥辦毋稍疏虞其派出彈壓委員務必實心勸導漢民事事持平不可輕舉妄動致釁隙一開不可收拾成瑞獲咎甚重見雖勸諭回眾尙知出力而甘省軍務未竣豈能遽爲乞恩懇免死罪著俟甘省軍務大定再行請旨定奪儻該員或敢因此始勤終怠自外生成卽著熙麟恩麟據實奏聞或在軍前正法或解送刑部從嚴懲辦不得稍有瞻徇恩麟奏狄河漢回械鬪委員查辦兩造具結解散地方安定惟三十六會人數眾多良莠不齊而漢民中無賴之徒禦侮不足挑釁有餘恩麟仍當嚴飭在事員弁嚴密稽查秉公妥辦不得稍涉大意將此由六百里諭知熙麟玉通並傳諭恩麟知之○諭惲世臨奏黔匪髮逆同時竄徧楚邊見在分籌防剿一摺李幅猷以石逆死黨擁眾萬餘欲勾結包逆合謀竄楚不可不嚴爲之防著惲世臨卽飭派出將弁會同地方文武各員

六
認眞堵剿不得任令狂竄駱秉章前派劉嶽昭追剿李幅猷股匪
此軍見抵何處著卽飭令跟蹤追躡會同楚省兵勇兩面夾擊務
令就地殲除以期一勞永逸該逆既有窺楚之意官文嚴樹森卽
派得力兵弁探明賊蹤所向迎頭擊剿毋令深入腹地黎平股匪
雖經戈鑑出剿屢挫賊鋒漸次踰伏巢穴戈鑑卽須移紮晃州難
保該逆不再出肆擾著勞崇光張亮基督令在防將弁認真堵剿
楚軍出境剿辦黔匪見爲李逆等牽掣勢不得不先顧本境張家
寨匪股及孟溪上寨包逆老巢若有得力之軍直擣巢穴亦攻其
必救之策勞崇光等務須抽調勁旅迅圖殄滅不得專恃客兵致
多貽誤惲世臨甫任封圻值此邊境地方同時告警自當督同在
事文武悉心經畫固不可稍涉大意亦不必徒事張皇總當仿照
從前駱秉章毛鴻賓辦法以圖久安疆圉本日據恩麟奏甘肅軍

六

情萬緊請飭駱秉章令何勝必帶勇赴甘何勝必見已派赴漢南
 自不能再行赴甘而甘省鹽固逆匪久圍平涼南路清水秦安賊
 匪肆擾而西和伏羌等處回匪又復相繼竊發兵勇無多勢難兼
 顧亦屬實在情形著駱秉章酌量調派得力大員帶兵前往以拯
 西陲毋稍膜視將此由六百里各諭令知之○李桓以病免以孫
 長紱為江西布政使由鹽法道遷○倉景恬以病免以兆琛為湖南按
 察使由衡永郴桂道遷○庚辰曾國藩奏逆首黃汶金糾合大股竄入江
 西鄱陽等處疊經官軍截擊該逆遂竄入湖口分擾文橋等處六
 月初九十七等日江忠義李榕等軍分路進擊黃汶金受傷入壘
 堅匿不出二十八日我軍將花尖山等處之賊擊退七月初三日
 江忠義等乘夜將文橋賊壘攻破該逆向建德一帶奔竄我軍沿
 途截擊斃賊甚多江境一律肅清又奏近日軍情曾國荃派劉連

捷駐軍下關七月初八九等日連獲大勝攻毀印子山賊壘調蕭慶衍由江浦南渡分守要地鮑超病體尙未痊愈其將卒雖亦多病然較去歲則已少矣蕪湖守將吳坤修於十七日約會水師擊賊於雙斗門破其二壘乘勝追至水陽地方金柱關蕪湖等處防務稍鬆惟湖口肅清後江西羣賊悉數東趨二十日已繞過池州進撲青陽縣城守將朱品隆督軍固守賊以全力來撲勢甚危急朱品隆所部七營病者甚多未知能否堅守待援見在劉典一軍回駐徽州江忠義李榕席寶田三軍臣檄令作爲潯饒徽甯池五郡游擊之師李榕已抵東流江忠義席寶田尙未拔營入皖但願青陽保守無恙各軍陸續前進則皖南大局不至決裂又奏苗黨之踞守壽州者踰伏未動蔣凝學毛有銘周寬世成大吉所部各駐要區防守尙穩蒙城解圍後賊聚懷遠普承堯張得勝等攻懷

遠之師已被該逆截斷後路糧運梗塞臣派赴援臨之何紹彩陸

師二千人王吉丁泗濱三板八十號先後到防十三日水陸並進

水師攻奪宋家灘礮划數十隻惜河洲一壘未破前敵糧運仍爲

賊阻其畱守臨淮者兵力過單別無可濟之師殊少自全之策北

顧淮甸殷憂曷已唐訓方奏賊因各營撤退乘勢襲踞長淮衛意

在步步進偏直撲臨淮臣密令姚榮麒等乘賊不備直攻賊寨槍

礮環施該逆紛紛潰竄當將長淮衛克復姚榮麒步隊卽移紮該

衛丁泗濱等水師亦分營前往與沫河口互相聯絡先是臨軍未

退之時臣因蒙城糧路已通賊勢稍輕飭馬新貽以蒙事交英翰

姚廣武辦理而自率王才秀所部回援臨淮見在馬新貽已率王

才秀等將胡家圩攻破由蒙啟程繞道宿州已到臨淮惟苗逆狡

譎異常初於壽州潁上懷遠蒙城稱兵四出分我兵力且日出馬

隊乘隙肆擾飄忽無常臣惟有竭盡愚忱勉支危局並嚴飭英翰

會同姚廣武就見在兩處勇練妥爲防範俟援兵厚集剋期併進

上諭議政王軍機大臣等湖口肅清之後江西羣賊東趨繞過
池州進撲青陽縣城朱品隆所部未知能否堅守待援著曾國藩
卽督催李榕江忠義席寶田各軍陸續前進趕緊赴援仍飭朱品
隆竭力固守以待援師毋令稍有疏虞致皖南全局復爲震撼至
所奏苗黨之踞壽州者跽伏未動其聚於懷遠者將普承堯等軍
後路截斷糧道梗塞該督所派赴援水師各軍攻奪宋家灘賊划
數十隻而河州一壘未破前敵糧運仍爲賊阻臨淮兵力過單殊
少自全之策等語與唐訓方疊次奏報及本日吳棠所奏淮甸危
急情形均屬相符唐訓方前奏前敵水師困於賊中龔文林等恐
以資賊已將所帶礮船全數焚毀病傷士卒無一得歸情形萬緊

東華經金
茲據吳棠奏黃開榜見帶師船精銳已多損失不得已而退守恐
賊水陸下竄臨軍勢且不支以爲欲拯臨淮之急亟須生力一軍
先由宿蒙直擣懷遠北路以攻賊所必救並須數道進兵使賊面
面受敵方可以期得手等語所籌不爲無見僧格林沁之軍勦平
白蓮池教匪後該親王移師東昌合勦宋憬詩一股已遣新請歸
宗之陳國瑞帶兵三千名赴援皖北卽著唐訓方迎催令其速由
蒙城痛埽逆氛進攻懷遠北路其六潁各楚師如蔣凝學毛有銘
周寬世成大吉所部據曾國藩奏稱各駐要區防守尙穩惟遠防
不如近勦著曾國藩速飭進攻壽州使賊不得專力撲攻臨淮臨
軍復振自可與南北援軍三路齊力進擊俾賊疲於奔命以蹙其
勢曾國藩身膺重寄責無旁貸此等機宜亟應隨時調度與唐訓
方聯絡策應以求萬全總當於萬難籌措之中力籌援應之策正

在寄諭間唐訓方奏報攻復長淮衛進營固守見在賊復趨重蒙城一摺唐訓方派令姚榮麒等乘賊不備進克長淮衛水陸進紮有此一戰賊鋒少挫惟苗逆詭譎異常知臨淮猝難動搖又以其移蒙圖懷之賊轉而圖蒙蒙城雖糧路已暢而賊勢又復趨重唐訓方兵力本單分防臨淮蒙城兩處中隔苗圩二百餘里馬新貽見已率王才秀之軍將胡家等圩攻破繞由宿州以回臨淮蒙邑僅有英翰等軍尤虞單薄陳國瑞由北路赴援正可迎頭將趨重蒙城之賊痛加剿洗著僧格林沁唐訓方卽行嚴催陳國瑞之軍迅速進取毋失事機並著吳棠飭令姚廣武一軍與英翰等聯絡策應臨淮軍事稍鬆仍著唐訓方妥籌固守激勵諸軍與南北援師併力戰守以策萬全將此由六百里加緊各諭令知之○命湖南北每月各協解臨淮餉銀二萬兩○辛巳諭內閣前因陝西漢

南軍務緊要四川所派道員張由庚總兵朱桂秋兩軍數月以來
尙未出境所派之道員梁作楫亦復遷延未進降旨交部分別嚴
議議處茲據該部奏請將張由庚朱桂秋降二級調用梁作楫降
一級調用無庸查級議抵該文武員弁等於緊要軍情竟敢任意
耽延不以國事爲重卽照部議降調實屬咎有應得惟見當援師
雲集之際若將該員弁等各予降調轉得置身事外張由庚朱桂
秋著改爲革職畱任梁作楫著改爲降三級畱任卽著官文嚴樹
森劉蓉等飭令迅圖剿賊立功自贖儻再不知愧奮卽行從嚴懲
辦○諭前因陝西鳳翔岐山喫緊疊次諭令提督馬德昭帶兵馳
救鳳翔並飭副將王夢齡進援岐山立解城圍嚴旨諄促不啻三
令五申乃本日據多隆阿等馳奏該提督接奉諭旨屢次枝梧或
縱勇四鄉強拉牲畜名爲運載軍裝實則勒贖售賣並欲特設行

營糧臺添辦軍火車輛等項百盤才難藉詞推諉又稱賊撲城營或挖地道指日進攻致令百姓疑懼其實並無其事六月十五日曹克忠攻克光太廟逆巢疊催該提督派隊接應乃相隔八里堅執不前後因出營墜馬復又捏稱賊偏南關開槍馬蹶種種遷延捏飾殊出情理之外王夢齡見仍駐武功藉病請假耽延不前請分別懲辦等語馬德昭以一品大員受朝廷厚恩乃統兵一萬有餘駐省年餘之久老師糜餉不殺一賊迨派援鳳郡又復畏葸遷延多方捏飾實屬自外生成大乖職守甘肅提督馬德昭著撤去勇號拔去花翎卽行革職交新任陝西巡撫劉蓉軍營差遣委用儻再不知愧奮卽著從嚴懲辦候補副將王夢齡進援岐山逗遛不進實屬庸懦無能著卽行革職發往新疆效力贖罪不准畱營以示懲儆另片奏馬德昭隨營委員保舉知州普林輕儇佻達慣

東華續錄
造謠言候補州同張桐鳴請補赤金營都司梁元倉隨聲附和阿
諛順從請一併懲辦等語普林著卽行革職永不敘用張桐鳴梁
元倉均著一併革職以上三員並著逐回旗籍不准在陝逗遛滋
事見在多隆阿已進抵陝西省城卽著將馬德昭所統各營嚴加
整飭滌除舊習迅掃逆氛以副委任○諭議政王軍機大臣等多
隆阿奏馳抵西安一摺多隆阿已於七月二十二日帶兵馳抵西
安省城與穆騰阿張集馨等籌議省城內外防守情形並將防兵
老弱裁汰以節糜費所辦諒必妥協見在渭河以南及附省一帶
已無賊蹤惟咸陽盩鄠等縣交界尙有零星賊匪出沒著卽趕緊
派兵前往次第掃除並將省城布置周密卽行親赴渭北進攻高
陵一經得手便可乘勢西指與雷正綰所部會合進取以期廓清
全陝迅奏膚功甘省逆回四起固原未復平涼亦尙被賊圍蹙麟

坐守慶陽兵單餉絀不能有所展布恩麟近奏秦州所屬回漢尋
釁西甯回教蠻觸相爭卽蘭州省城附近之安定等縣亦有械鬪
之事總須陝省軍威日振節節疏通方不至回氛句聯一片見在
鳳翔被圍日久官民力守望救尤殷近更聲息不通多隆阿所派
之漢中鎮總兵陶茂林帶兵三千往解城圍卽由鳳翔西援平涼
著卽飭令星速馳往不得再事遲延陝南軍務總未得手毛震壽
甚不得力所奏艱難措拄等情似亦尙有可原劉蓉由川入陝尙
未奏報啟程川鄂兩省援師疊經嚴諭催促此時自可陸續前進
多隆阿仍應遵奉前諭隨時兼籌與劉蓉聲息相通以顧全局另
摺片奏參馬德昭挾詐恣橫遷延畏葸各款本日業經明降諭旨
照所請褫奪辦理瑛棨前爲馬德昭愚弄固無疑義惟陝西紳士
李宗沆等從前乞畱馬德昭至再至三或盛稱其保障西安之功

是以朝廷加之委任今據多隆阿奏參各情殊屬可惡馬德昭是何居心有無通回情事著多隆阿悉心察看酌量處置如解其兵柄後發往劉蓉軍營可資鈴束卽著押令迅速前往毋許逗遛馬百齡一員亦卽遵前旨嚴加防範省城回眾相安務須妥爲撫輯以定人心穆騰阿張集馨於省城防守事宜均各有責成務與多隆阿協力辦理多隆阿出省以後何員足資倚靠可以帶兵駐守省城並著多隆阿酌量一面調派一面奏聞將此由六百里諭知多隆阿雷正綰穆騰阿並傳諭張集馨知之○常清奏俄國哈薩克句串在博羅胡吉爾地方排隊向我兵開放火礮火箭經我兵用擡礮擊退復糾集黨與續來撲營我兵用槍礮拒敵隨受創敗去報聞○以中常爲內閣學士由大理寺卿遷○壬午予山西陣亡道員張錫蕃入祀昭忠祠○癸未諭議政王軍機大臣等晏端書等奏

續陳粵東各路軍務情形一摺高州肇羅一帶逆氛日久負固加
以客匪句結遂至東奔西突益肆猖獗見在崑壽等雖增兵募勇
相繼進取惟積玩之餘難期驟振且以粵東之勇辦粵東之賊恐
有呼吸相通情弊臨陣不肯出力毛鴻賓新募楚勇計已成軍卽
著恪遵疊次諭旨率此生力新軍迅速赴粵將高州等處賊匪次
第掃蕩務令壁壘一新令行威振迅奏膚公不得徒託空言致負
委任毛鴻賓郭嵩燾未到以前晏端書崑壽務當督飭各軍認真
防剿不得稍有鬆勁吳昌壽一軍已偏廣海寨城並著飭令熟籌
良策迅圖攻拔另片奏釐金濟餉訪諸輿論主客之見莫由解釋
應早定分成之議改歸地方官紳辦理以期事權歸一呼應較靈
等語著毛鴻賓郭嵩燾於到省後體察情形妥籌辦理將此由六
百里各諭令知之○甲申都興阿富明阿奏苗逆截斷皖師糧道

兇燄益張唐訓方撤軍退守臨淮待援孔迫若不設法抽派數營
前往則皖省大局決裂堪虞臣等見派忠新勇一千名交參將戴
錦芳統帶又派川勇一千名交王萬清統帶趕赴皖營救援歸唐
訓方調遣吳棠奏苗逆分黨前往蒙城勢將擁眾進逼總兵陳國
瑞援皖臣已飛催前進惟臣駐清江距蒙宿六七百里一切進剿
機宜實難遙度必得大員幫辦以一事權查陳國瑞治軍嚴整兵
民翕服若使之獨當一面必能迅掃狂氛可否仰懇 天恩飭陳
國瑞幫辦臣營軍務駐紮蒙宿一帶所有徐宿蒙城各軍均歸節
制責成該員北剿捻匪南剿苗逆定能勝任臣仍當隨時商榷共
濟艱難不敢稍有推諉 上諭議政王軍機大臣等據都興阿等
奏北渡難民均飭水陸防兵會同地方逐細查察安置見在南岸
官軍得手難民漸已紛紛南渡至所有句通髮逆之教匪盛廣大

等經通州知州黃金韶疊次拏獲訊辦與吳棠所奏相符卽著吳棠速飭將所獲各匪於訊明後卽行駢戮毋久稽誅其餘匪尙恐不免散處各屬仍著吳棠飭令各該地方官實力查拏以消內患都興阿富明阿亦飭令各防文武員弁嚴密巡查毋稍大意其撲犯倉利橋巫山夏港等處之賊經吳全美所部水師擊退旣據都興阿等查明該總兵督同各港師船聯絡調度尙爲得力著卽飭令嚴率所部聯絡滬軍互相策應並令往來梭巡於江陰各港何處有賊卽駛赴何處應援見當南岸官軍得手之際江防尤應嚴密以杜逆匪乘虛北渡江陰縣城業經克復其棄城竄出會合各路援賊分投打館之匪究係竄走何處著李鴻章詳悉速奏並督各軍乘勢追擊與都興阿等南北併力堵剿以杜紛竄江陰克復卽應進規常郡期與京口官軍及進偪蘇郡之兵聯絡策應以圖

攻取皖北軍情昨據唐訓方奏報馬新貽帶兵回至臨淮臨軍之勢稍紓而賊復趨重蒙城總兵陳國瑞由白蓮池移得勝之師赴援正資倚任該員疊經僧格林沁等奏報亦頗稱其得力吳棠所請令陳國瑞幫辦該漕督軍務之處本日已明降諭旨宣布著卽傳知該總兵當懍承恩命愈加忠勇奮發努力自愛毋稍滿假以期克保令名長承優眷並著飭令星速赴援卽將趨蒙逆黨迎頭痛擊會合英翰等蒙城戰守之軍力解城圍與唐訓方等遇事和衷聯絡策應以堵皖局一俟僧格林沁大軍南下大集諸軍蕩平苗逆同膺懋賞王萬清一員昨已有旨准都興阿等所請畱於軍營帶勇效力卽著都興阿等飭令與參將戴錦芳迅速統帶川勇等二千名星夜赴皖援救以厚兵力徐屬竄擾蕭縣等境捻股吳棠派兵迎擊北遁見往何處仍飭姚廣武等官軍追擊並令該總

兵仍須兼顧蒙城一路隨時應援並籌接濟將此由六百里各諭令知之○命儘先總兵官陳國瑞幫辦漕運總督吳棠軍務○命山東等省協解陳國瑞軍餉○丙戌諭議政王軍機大臣等張之萬奏毫捻擾及許境經兵練擊敗悉數西趨並另有股匪由淮甯縣境直撲西華縣城各摺片據稱毫捻由臨潁一帶竄徧許州占踞城外之大莊保全兩寨經官軍收復後該匪悉眾西遁訊據賊供捻首張總愚程大老砍李庫等均爲苗逆所使糾合悍黨圖竄陝西句結回逆如潼關有備卽折竄楚北老河口一帶句約髮逆入寇等語前因豫省官兵克復張岡當諭令張之萬駐紮許州遏捻匪西竄之路乃該撫不知酌量緩急徑回省垣致該匪得以乘虛奔竄深入腹地張之萬調度失宜實難辭咎著先行交部議處毛昶熙張曜駐軍陳宋各郡何以於毫捻西趨毫無知覺致各軍

東華續錄 卷之二十五
皆出賊後可見駐兵防堵全屬有名無實毛昶熙張曜均著傳旨
申飭見在長葛禹州邊境均有賊蹤張曜見擬派馬隊跟追並親
率步隊由北面取道山徑繞越賊前會合馬隊夾擊著卽奮力截
剿痛殲醜類張之萬出省後並當相機堵剿毛昶熙亦卽派撥兵
勇隨時策應儻任賊蔓延豫省或擾及山陝惟張之萬毛昶熙是
問此時前股賊騎已過許境或由邾汝徑趨盧氏西犯潼關亦意
中事且回匪被剿窮蹙難保不暗中勾串苗逆約會西來是潼關
一隅最關緊要多隆阿畱守潼關之兵是否尙在該處著該大臣
酌量情形如潼關守將不足深恃兵力不敷堵剿卽當添派得力
將領酌帶兵隊前往助守毋令一人一騎得以入關方爲妥善張
曜業已督軍西進該匪或聞風南竄則宛鄧之間處處可慮歐陽
正墉一軍駐紮襄陽去南陽不遠著官文等酌量情形或飭令該

道派兵馳赴宛鄧等處會同豫軍截擊或另派得力兵勇出境會
剿均著迅速酌辦毋稍遲延其商雒一帶亦係該匪熟徑並著多
隆阿張集馨會商布置以備不虞密縣禹州均有賊匪而密縣毗
鄰汜水晉省河防不可鬆懈著英桂嚴飭在防文武員弁認真防
守如匪黨竄近晉邊或附近潼關一帶屆時儻晉防兵勇足敷堵
禦尙有可撥之師渡河迎擊會合豫省之軍夾剿以期悉數殲除
該撫務當先期斟酌調派毋得稍有疏虞僧格林沁見在剿捕宋
逆正當喫緊之際張之萬請飭該大臣星速南來會合豫軍遏此
狂寇自應俟僧格林沁將宋逆殄滅後再行率師南下張之萬當
就見有兵力將闌入境內之匪痛加剿洗不得專盼僧格林沁之
兵致滋貽誤將此由六百里加緊諭知僧格林沁官文多隆阿嚴
樹森英桂張之萬毛昶熙並傳諭張集馨知之○李鴻章奏臣於

七月二十五日由崑山行抵常熟聞僞納王郅涿寬等撲陷蕩口鎮欲竄常熟當派總兵滕嗣武等水陸各軍分道迎剿臣親督師船繼進該逆節節潰退我軍追至蘇城齊門外攻破黃埭賊壘三座斃賊五六千人僞納王僅以身免立將蕩口鎮收復又奏江陰圍攻日久賊勢已蹙僞護王僞潮王僞武王僞齊王僞區王五大股糾眾十餘萬由常州蘇州等處分道來援綿互數十里李鶴章以賊眾兵單久恐難支立調張樹珊等六營由常熟福山馳往並調總兵郭松林等八營橫衝賊後剿破祝塘璜塘賊巢且戰且進沿途擒斬四五千人李鶴章劉銘傳周覽江城四圍賊勢西自江邊東至山口沿河紮木城十餘座其中石營土壘木卡大小百餘座守禦極堅因令各營分路進剿二十九日劉銘傳由中路進誘賊出敵郭松林忽自山後翻山逆眾拌命迎戰郭松林大呼殺入

橫衝直突該逆尾隊撤動頭隊遂亂劉銘傳張樹珊揮眾直擣中
堅賊遂大潰各軍追殺人馬自相蹂踐死者山積附城踞賊見援
眾敗走惶惑不定我軍乘勢蹙之遂將沿河木城石壘一律平毀
追過南門焚其船隻二百餘號城西各賊仍復死守劉銘傳添調
洋槍隊並帶炸礮乘勝轟擊先將石營一座轟塌各勇越濠踰牆
賊遂棄營而走黃翼升又將極西山邊賊營攻破於是城外各股
援賊剿逐淨盡李鶴章當飭各營將該城四面圍困七月三十八
月初一等日各軍分門進攻賊眾內亂我軍乘夜登城四面衝殺
逆勢披靡遂將城中之賊悉數殲除江陰縣城卽於初一日克復
偽廣王薰王是否死於亂刃之中俟查明續報查江陰縣城介江
海之衝拊常州無錫之背爲南賊北竄咽喉自臣軍攻剿日緊忠
逆卽嗾守賊偽廣王李愷瞬旬引通州教匪盛廣大等糾眾數千

謀爲內應幸先事發覺稍遏亂萌臣於克復崑太後卽派李鶴章
劉銘傳督兵進駐常熟楊厠自夏徂秋時與大股悍賊互爭必欲
力克此城以杜蘇常逆匪北竄之路茲各軍銳志攻取水陸將士
血戰二十餘日擊退援賊各股十餘萬先後擒斬賊眾約兩萬有
奇足以寒逆膽而振軍威又奏逆匪大股踞守楓涇臣派編修劉
秉璋等進紮官塘該逆前來撲營經道員潘鼎新擊退我軍牆濠
甫就賊忽來撲勢甚兇猛潘鼎新開礮轟擊逆眾驚潰擒斬百餘
名奪獲槍礮旗幟無算十三日劉秉璋等三路並進該逆不出各
營連放炸礮轟倒石壘數處忽嘉善援賊大至楓涇逆匪突出數
股迎拒遊擊蔡渭川等分隊繞過賊營之西將援賊擊退副將楊
鼎勳等繞至賊營東北該逆憑河抗拒我軍開礮轟擊立將賊壘
攻破斬擒甚多餘賊由嘉善縣一路竄去自楓涇克復後嘉興平

乍各賊來援嘉善者約三四萬人分踞干窰西塘等處綿亙二十餘里劉秉璋等拔隊進攻援賊分路迎拒我軍水陸並進分隊鈔擊該逆首尾不能相顧英人馬格里以開花礮擊斃賊十餘人我軍四面兜殺生擒七百餘人當將賊壘攻克西塘鎮一律肅清餘賊竄併干窰一路復經我軍進擊路破賊壘賊營餘逆遁入嘉善縣城臣維楓涇西塘兩鎮爲松江入嘉興要隘賊所必爭此次越境苦戰旬日之間攻堅奪隘連克壘卡二十餘座擒斬甚眾實賴將士用命見飭分路堵紮以扼蘇嘉之吭相機進剿以助吳江之勢上諭江陰一城介居江海之衝最關緊要見經官軍克復該逆渡江北竄之路業已斷絕從此乘勝進兵則常州無錫之賊亦必聞風膽落惟匪黨甚多失此要區難保不糾合醜類再來撲犯李鴻章見由常熟前赴江陰察看軍情所籌分路犄角取遠勢以

制敵使賊大局不振筋脈不舒則蘇城遲早可克各等語甚合攻
取機宜著卽照所擬妥爲布置將此由六百里諭令知之○戊子
諭內閣前因瑛榮巡撫陝西株守省垣膜視地方生靈荼毒一籌
莫展馬德昭派援鳳翔復種種捏飾刁難逗遛不進先後降旨革
職本日據多隆阿馳奏該大臣於抵省後查點馬德昭所統四關
各營勇丁三千八百餘名而實數僅一千八百餘名殘弱又且過
半瑛榮之存城營勇一千餘名僅四百餘名可用其每月糧餉各
營均按虛數支領覽奏殊堪痛恨瑛榮以巡撫大員貽誤地方至
於如此所部勇丁徒糜餉需毫無實用且藉保護省城爲名屢次
飾詞奏畱馬德昭鳳翔等城久被賊困置之不顧但爲馬德昭捏
報戰功且縱令馬德昭虛報勇數至二千名之多並不認真查點
通同蒙蔽朝廷實屬溺職孤恩大負委任前旨僅予革職尙覺情

浮於罪瑛榮著卽行發往新疆充當苦差以示懲儆馬德昭於軍務喫緊之際以提督統兵當派援鳳翔託病遷延其居心已不可問又復虛報勇數冒領口糧竟視軍務爲利藪置國事於不顧貪詐尤爲可惡馬德昭業經革職卽著交多隆阿劉蓉張集馨嚴行查訊奏明辦理西安將軍穆騰阿係專閫大員又同在一城於馬德昭冒領餉銀捏報戰功各節豈能毫無聞見該將軍何以前此並無隻字提及且屢次會同瑛榮奏保馬德昭戰守得力此次又復會同多隆阿張集馨奏參其因何前後自相矛盾之處著穆騰阿明白回奏○諭毛鴻賓奏請將釐捐積弊委管各員審辦等語湖南靖州所屬之洪江地方設有釐局係由地方官經理據毛鴻賓奏派員密查該局員於官設釐局之外復設上下二卡並未報明省局所收商釐並不填給照票且收數暢旺報解寥寥顯有侵

蝕情弊前任巡撫翟誥在辰沅永靖道任內委員辦理卽多不實不盡接署道陸傳應兆琛積習相沿弊端叢出難保無扶同徇隱情事請分別革職撤任查辦所有釐局委員委用知縣林慶光候補府經歷翟詵候補從九品董立誠均著先行革職翟誥業經休致其前署辰沅永靖道之見在代理貴州按察使陸傳應見升湖南按察使兆琛均著暫行撤任與翟誥一併交惲世臨提集應訊人證卷宗嚴審確情據實參辦○諭議政王軍機大臣等前因戶部議奏侍郎薛煥請於直隸添設四鎮一摺當經諭令各直省督撫速行籌畫覆奏茲據毛鴻賓覆陳直隸添設四鎮增兵四萬其中管帶招募約束之難及各直省徧地瘡痍籌餉之不易而流弊所及窒礙尤多如以直隸屏蔽京畿亟應設備或於劉長佑新募之勇略增其數再將旗綠營兵選將訓練嚴加汰革卽足以資捍

禦等語所籌不爲無見薛煥前請練兵籌餉之處原以畿輔重地營務廢弛亟應振作兵威妥籌捍衛惟此次勇丁旣經添設卽將來承平無事亦斷不能遽裁此時建議之初必須妥籌善策經久可行不至流弊滋生方爲妥善毛鴻賓所陳窒礙各情亦覺深切著明洞悉利弊劉長佑身任直隸總督於見在地方營伍情形自已知之最悉卽著將薛煥及毛鴻賓前後所奏各情通盤籌畫謀出萬全務使行之久遠永無流弊以副委任其應如何定議之處卽著速行馳奏原摺著鈔給閱看將此諭令知之○諭多隆阿等奏見辦省城防剿事宜分兵四路援應各摺片據多隆阿穆騰阿張集馨等會奏點驗四關勇丁數目虛冒甚多而每月糧餉則照虛數支領實堪痛恨各營營官見據多隆阿等奏明分別拏問自能將所有侵蝕蒙混等情訊查得實嚴加懲辦至所稱馬德昭營

中既未打仗所保人員應由張集馨查明概請撤銷自爲力祛冒濫起見惟一載以來該營官兵於省城戰守究竟有無出力抑果全係冒濫著多隆阿等詳悉查明確實具奏辦理西安省城見有旗綠各營官軍共七千九百餘名於省垣防守自己足敷分布穆騰阿張集馨卽將挑出精壯旗兵二千營兵一千實力勤加訓練以備緩急並飭令與城外之曹克忠七營及德興阿所帶馬隊聯絡戰守毋稍疏虞鎮安被逆匪竄陷著卽嚴飭總兵福兆迅速進兵克復其撲犯醴泉之匪及牛東一帶馬步回匪著多隆阿張集馨迅飭曹克忠馬陞等軍分投剿捕勿畱餘孽多隆阿俟省防布置妥協卽赴北岸進剿高陵等處之賊以次掃蕩肅清全陝陶茂林一軍既經張集馨給發餉銀軍火並令墊鄠等縣接濟軍食自可不誤師行圍攻鳳翔之賊一聞省城派兵往援更必很力來撲

該郡城以有數之兵練誓守經年屢經危險此時望救更必迫切
卽著多隆阿等嚴飭陶茂林星速赴援不許片刻耽延曹克忠移
營省城西南一帶足爲此軍先路之導卽著會合轉戰而前總期
剋日早達鳳郡立解城圍以紓廛系劉蓉自簡放陝撫以來尙未
據奏報由川入陝當此各路之軍已集著卽星速前進統率諸軍
先將漢中城圍力解督同李雲麟等將陝南羣醜奮力蕩平並卽
檄飭各廳州縣集團守險以助軍威嚴防豕突仍與多隆阿隨時
聯絡聲氣以籌全局將此由六百里諭知多隆阿穆騰阿劉蓉雷
正綰並傳諭張集馨知之○命富明阿帶兵赴臨淮助剿○予故
漕運總督袁甲三建祠○已丑左宗棠奏僞堵王等麇聚湖口經
劉典等分路進攻先將青山橋賊巢攻克其上下彭之賊亦經官
軍剿洗各逆紛紛下竄見在湖口等處一律肅清江忠義等分道

跟追諒可得手惟疊據賊供該逆有仍圖由徽竄江之計見在江防無事劉典一軍已取道回徽俟探明賊蹤卽當相機進剿又奏逆賊由皖竄江其謀雖狡然都昌各境北阻長江西臨鄱湖南隔章江皆有水師防堵賊匪鼠竄其間三面皆水實亦自趨絕地惟江西之浮梁及安徽之黟祁可爲旁竄之路安徽之建德石埭一帶可爲退竄之路臣於劉典援徽之始屬其嚴扼嶺路以保徽休黟祁知賊竄江則力保浮梁以杜紛竄劉典善審地勢故轉戰而前幸免隕越見據探報賊匪欲由石太竄入嶺內又有將趨廣德以援金陵之信臣維石太一帶無糧可擄賊難久踞能偪其下竄廣德以重兵扼之則徽甯之防可固卽浙師攻取湖州亦較易得手臣惟當隨時會商曾國藩飭令各軍相機進剿上諭議政王軍機大臣等左宗棠奏浙師援江獲勝江西肅清籌辦石太股匪

並臺灣粵勇潰散請飭林文察辦理該處軍務及見辦延平順昌土匪各摺片臺灣匪徒滋事日久吳鴻源所統兵勇數已不少不能於嘉義解圍以後迅圖攻剿輒於南靖莊等處頓兵數月致該匪得豫爲準備迨賊守禦既堅又不知分兵別覓間道相機雕剿以致師老財匱勇丁譁潰賊氛益肆猖獗實屬調度乖方業經明降諭旨將該員革職拏問仍著左宗棠徐宗幹確切查明如有別項貽誤情形仍據實奏明參辦毋稍徇隱林文察既籍隸臺灣熟悉情形卽著該署提督揀調得力將士渡臺聯絡紳團速將該處匪徒殄滅應需餉項卽飭福建藩司於援浙餉內酌量撥給延平順昌土匪僅數百人勦捕兵勇不下數千該統兵官任其回竄星橋老巢蔓延永安連城邵武歸化等處一味遷延不遵調遣業經左宗棠將吳連陞等分別咨參懲辦守備張連飛著於提省後嚴

東華續錄 卷之二十一
行訊辦按律定擬並責成曾憲德督率各軍將延汀等處土匪剋期殲除不准再事稽延致干重咎江西全境肅清已據沈葆楨曾國藩先後奏報此股賊匪非復竄江西卽回趨廣德此時江忠義等諸軍定可追賊入皖著左宗棠仍遵前旨辦理務令徽郡各營與江忠義諸軍聯絡聲勢前截後追將池太股匪就地殲除毋任蔓延旁竄滬軍見已攻克江陰蘇州嘉興等城攻勦正在喫緊賊勢漸蹙左宗棠當檄令蔣益澧等軍攻賊要害使賊兼顧不遑當更有一二處可以得手將此由六百里各諭令知之○諭駱秉章奏設立糧臺專辦援陝軍米賈洪詔奏設法安夷勦回並甄別文武以期得人各摺片駱秉章見調楚軍湘果嚮導各營赴陝援勦兵勇及長夫合計不下二萬餘人日需米糧甚巨自應設立糧臺委員會同各地方官在川陝附近米穀較多之處專司採買以資

接濟既據該督奏稱知縣梅錦堂等均能熟習情形卽著駱秉章
飭令該員等妥爲辦理以裕軍食滇省起釁情形始於楚雄府屬
之石羊銀廠有臨安人與回眾互爭地方官不能妥辦惑於省城
漢人不分良莠見回卽殺由此激生事端回眾恐夷民助官剿回
設法結夷並搶去勦辦回匪札文將回字乞改夷字給與夷目閱
看多方煽惑夷遂蠢動據賈洪詔奏稱必須設法用間先安夷民
以孤回勢方可痛剿逆回等語所籌不爲無見著賈洪詔會同駱
秉章勞崇光悉心籌商相機妥辦滇省見在武官自提鎮以下兵
符均爲回匪把持兼以徐之銘等甘心爲回匪所用若日復一日
恐其盤踞漸固不可動搖且漸萌窺伺川黔之意爲患滋大所以
此時縱未必有勦辦之力不可不豫備勦辦之方一俟川陝黔省
軍務稍定兵力漸可分撥駱秉章勞崇光賈洪詔卽當會商進兵

之策不可遲延滇省文武各員倚勢營私亡廉喪恥多與回匪勾通亟應嚴加甄別並著勞崇光賈洪詔將該省文武逐加遴選覈其邪正賢否分別去留庶可漸挽積習以收得人之效各鄰省如有得力之員堪供驅策者並准由該督撫奏明調往滇省以資差遣將此由六百里各諭令知之○諭張凱嵩奏貴縣官軍攻克龍巖並各村寨及勦辦由黔竄粵之青江苗匪昭平宣化等屬土匪道員蔣澤春一軍由潯粵進規容縣各摺片粵西潯州逆匪黃三久踞覃塘在貴縣之西而東路龍巖賊寨險固異常賊渠林漢潮與黃逆固結抗拒官兵附近之閩村等寨賊亦互相勾串藩司劉坤一自督軍攻破登龍橋賊巢後添派各軍分投攻擣閩村及龍巖均已破入將林漢潮父子擒戮劉坤一之軍進徧覃塘貴縣與遷江來賓等團練踊躍協助黃逆敗回老巢見在外援已絕團志

益齊各軍全集覃塘乘其敝而擊之可期一鼓殄滅其由貴州竄
粵之青江苗匪及粵西宣化昭平本地土匪均經張凱嵩飭令各
地方文武將馬津村火溜嶺涇田各賊巢攻破青江苗匪竄踞懷
遠縣屬之歐寨者亦經兵練擊走殲殪過半餘匪遁越黔境之大
年河道員蔣澤春一軍由潯州取道鬱林沿途攻剿蒲塘等處克
捷見亦進規容縣所辦尙屬得手潯州等處股匪與廣東之信宜
巨匪陳金缸等本通同一氣黃陳兩逆首數載負嶠容縣范亞音
亦久踞縣城與高州賊勢尤狼狽相倚見當廣西潯容兩處得手
之際東省高州諸軍崑壽前往督率立圖振作著卽與劉坤一蔣
澤春等會合兩省官軍同時進取以赴事機張凱嵩當仍督劉坤
一與蔣澤春等速將覃塘老巢攻破克拔容城盡殲醜類東省陳
逆股匪脣亡齒寒崑壽所督各軍卽當鼓其新銳乘機進擊其昭

平土匪之竄踞大洞新化等賊巢尙未全行埽滅宣化匪巢雖破而逆首未卽擒戮仍著張凱嵩嚴督知府盧定勳陳瀚等務將新地等賊迅速蕩平逆首黃敷信趕緊緝獲淨絕根株各地方善後事宜卽飭該守令等妥實辦理毋令奸宄復行煽亂覃塘克復其南甯所屬之橫永一帶須防餘匪竄越左江等處伏莽尙多並著張凱嵩分飭所屬文武及各兵練次第剪除各嚴守備以靖疆圉苗匪竄回黔境見由大年河遁往何處著勞崇光張亮基速飭黎平一帶兵練迎擊與粵省之軍前後夾攻毋任滋蔓毛鴻賓郭嵩燾均各奏報啟程赴粵計當不日履任粵東時務以大振軍威爲第一要著高州軍務久未得手而東西兩粵賊勢旣相勾結剿辦必須合力以圖卽著毛鴻賓郭嵩燾與張凱嵩隨時聯絡相機策應晏端書於新任督撫未到之日仍不得稍存膜視致誤事機將

此由六百里各諭令知之○庚寅諭議政王軍機大臣等劉長佑奏宋逆被勦南竄見籌防截情形一摺僧格林沁督師進駐清平縣之魏家灣劉長佑親赴該大臣軍營會商機宜後卽督同前敵各軍滾營前進由新集一帶徧近賊巢僧格林沁馬隊由柳林村進徧沿途疊獲勝仗賊勢不支自必乘隙旁竄據劉長佑奏稱初十日夜馬步賊匪在灘上村乘船搶渡經遊擊湯繼揚等擊退該匪被勦窮蹙乘夜南竄莘冠之交僧格林沁見派馬隊跟退劉長佑飛調徐廷楷赴小灘鎮扼守力遏西竄各等語宋憬詩馬賊頗多行蹤詭詐飄忽見雖南竄仍恐折而西趨乘虛竄犯直境不獨大名各屬防守喫緊卽西北正北亦應在在嚴防畿輔重地豈可復被蹂躪僧格林沁督辦四省軍務諒必統籌全局面面兼顧所有調赴東路之直隸提鎮各營及海口熱河洋槍隊等軍著卽飭

回劉長佑軍營交該督調遣分投截剿僧格林沁既抵清平所有
勦辦宋憬詩事宜著卽責成僧格林沁調度一切如慮步隊無多
查丁寶楨保德等所帶步隊爲數不少可卽檄飭與恆齡蘇克金
馬隊相輔而行該匪旣已出竄小醜跳梁諒僧格林沁必能痛加
截剿將首從各逆駢首殲擒決不令其西擾直境也劉長佑身任
封圻保全直隸境地是其專責該匪見已南竄該督卽可無庸深
入東境劉長佑擬親督兵勇馳赴冠館一帶追截任事甚屬奮勉
惟東省追徧愈緊則直省更覺喫重該總督當酌量情形馳回直
境擇要駐紮督同王榕吉徐廷楷姜國仲等分帶提標鎮標海口
熱河洋槍隊等軍會合各路兵勇民團分投扼住運河斷賊西趨
之路以衛畿疆而重職守閻敬銘前在博平近日曾否移營他處
並著隨同僧格林沁相機策應毋稍疏虞豫省滑濬內黃等縣接

壤大名見經劉長佑飛調河北鎮道扼要堵禦仍著張之萬嚴飭該鎮道等迅統所部馳赴直豫交界處所嚴密防範如防守不能得力致該匪闖入豫境必將該鎮道等從重治罪決不寬貸宋逆是否全股南竄其甘管屯李廣莊等處有無餘匪盤踞著僧格林沁等查明具奏恆齡見署直隸提督因勦辦宋憬詩股匪前赴山東事竣後該大臣尙須督師南下如必須恆齡前往卽著據實奏聞以便另派妥員接署直隸提督篆務俾免曠誤劉長佑所調之李明惠一軍早經惲世臨馳報啟程何以尙未到營著劉長佑星速催提並檄飭取道河北卽會合河北鎮道派出之軍將宋憬詩迎頭截勦不准逗遛貽誤前據御史劉慶奏東省招墾荒廢地畝所有首逆從逆之家及逃歸復業之戶請查明分別辦理等語該御史所奏各情有無可採之處著閻敬銘詳加酌覈妥議章程具

奏原片著鈔給該撫閱看將此由六百里各諭令知之○飭催山西等省欠解京餉○辛卯李鴻章奏臣於八月初四日由福山行抵江陰察看軍情各營將士血戰日久本應略加休養再行進兵惟當賊鋒大挫之際機會難失臣與黃翼升等悉心籌議如兵力足用則須分三路一進常州一進無錫一進蘇州之閶門使賊首尾難顧無如臣部陸師不過四萬自金山衛至江陰橫互四五百里面面賊巢蘇州四圍皆水賴有水師扼紮以補陸軍所不逮若更遠略常州實覺接應不暇爲今之計以規取蘇州爲要而蘇州旱路一由胥門葑門以達吳江平望程學啟帶兵扼之一由閶門澣關以達無錫須將無錫攻克始能由此路進勦是吳江爲南路咽喉無錫爲北路咽喉欲披其腹心須先搯其咽喉庶可漸逼漸緊見踞常州之僞護王陳坤書雖經我軍擊敗難保不圖再逞踞

守無錫之僞潮王黃擺子堅守不出當飭各軍乘勢蹙之擬令劉
銘傳進紮江常錫交界之青陽鎮兼防護逆繞襲我後周盛波紮
無錫之芙蓉山郭松林紮無錫之緱山道員張樹聲等紮張涇橋
爲郭松林周盛波後路援應又令總兵黃中元紮蕩口前之大橋
角以堵蘇賊竄常熟之路凡此數路均令黃翼升分派師船相爲
依護以固糧路而助攻勦李鶴章自督小隊往來調度總期進可
制賊退可自立接曾國荃函稱僞忠王因蘇常危急將由金陵回
援我軍前進必有大戰事臣惟諄飭諸將力求穩慎相機夾擊至
江陰縣城關繫緊要必須擇人駐守查副將駱國忠前曾力保常
熱心志甚堅近來營規益整所有京口協副將一缺應請旨卽以
駱國忠署理俾專責成又奏臣周歷江陰城內外屍骸枕藉慘目
傷心爲他處所未睹推詢其故由軍情日緊賊氛日盛徧肆焚掠

難民欲就近渡江於裏下河完富之區各求生路都興阿以防奸細爲詞禁絕北渡大拂人情以致常屬無告之民强者徧而爲匪弱者慘遭荼毒見在江陰旣克江北當可無慮而常州無錫正值用兵其子遺之民願就近避徙過江者宜聽其便江南民氣本弱其先與官兵遠隔賊尙假仁義以安民迨官兵壓境賊必大加焚擄聚資糧丁壯爲死守計窮民迫欲逃生斷無人人欲作奸細之理都興阿擁陸軍二萬水師數千專守揚州離賊較遠江陰至鎮江百餘里之江面果能整飭軍威認真防範大股賊匪斷難飛渡卽有一二奸細亦易查辦奚忍與此數百萬災民爲仇強分畛域耶謹據實上聞 上諭議政王軍機大臣等李鴻章奏克復江陰縣城附城一帶賊屍枕藉卽距城數十里地方亦積骸盈野穢惡難聞因思滬軍與賊接仗均在近城一帶所斃賊匪諒亦離城不

遠何以數十里外竟有如許積屍必係該匪被勦窮蹙遷怒於民肆行殺戮該百姓逃生無路止得俯首延頸供其荼毒實堪憫惻都興阿等前因江陰難民擺渡過江派兵禁阻該將軍等慎重江防保全完善辦理甚屬認真但不分良莠概禁北渡小民無辜被戮固屬可慘或因無處謀生飢餓倒斃亦殊可憫甚至強壯者被賊裹脅反爲該匪添助黨與於軍務甚有關繫見在江陰已復而常州無錫正值用兵之際其子遺之民亦必有徙避過江者自應量爲變通妥籌濟渡俾江南被脅難民獲有自逃之路相率求脫水火我多一民則賊少一兵被陷各城攻取更易得手著都興阿富明阿吳棠安速籌商於沿江要隘酌設渡口一二處分飭防江員弁及地方文武各官就兩岸渡口嚴密稽查如實係避難良民言貌形迹並無可疑或攜有家眷或經南岸帶兵大員及地方官

先期照會者均應准其陸續渡江妥爲撫綏安插用副朝廷軫念災黎至意如查有形迹可疑之人該將軍等仍當遵照前旨隨時認真查明懲辦務令奸匪無溷迹之所而良民有避地之方庶戢匪安良兩盡其道不至因噎廢食也將此由六百里各諭令知之○諭李鴻章奏行抵江陰籌布大略情形一摺江陰克復賊鋒大挫自應乘此聲威力圖埽蕩該撫與黃翼升等商酌擬令劉銘傳帶所部九營進紮江常錫三處交界之青陽鎮地方兼防護逆繞襲周盛波紮無錫之芙蓉山郭松林紮無錫之緱山道員張樹聲等紮張涇橋爲郭松林等後路援應又令總兵黃中元進紮蕩口前之大橋角以堵蘇賊竄常熟之路黃翼升分派師船相爲依護李鶴章自督小隊往來調度所籌均屬周密著卽照所議妥速進兵並嚴檄諸將不可屢勝而驕稍有輕敵之意總期進可制賊退

可自保方能節節進取克奏全功江陰一城關繫緊要副將駱國忠前曾力保常熟心志甚堅該撫派令扼守江陰可期得力所有京口協副將一缺卽著駱國忠署理李鴻章仍當隨時策勵俾該員益知感奮用收臂指之助上海釐捐各局著於回滬後妥爲整頓至南岸克復地方已屬不少並當督飭地方官各就所轄境內招集流亡分別安撫是爲至要將此由五百里諭令知之○壬辰唐訓方奏苗逆糾約捻股分紮蒙城西南正東各面其南面舊空賊營復被占踞並於渦河北岸添營五十餘座直抵小澗集下游北岸官軍已爲包鈔該逆復於南岸增壘十二座我兵雖竭力抵拒無如賊營人數旣多器械夙備若再增壘十餘並我南岸諸營包圍在內糧路直無一綫可通蒙城危在旦夕惟有日盼陳國瑞軍早到庶幾城圍可解徐圖進攻 上諭議政王軍機大臣等蒙

城四面皆賊唐訓方軍營兵餉兩絀萬難抵禦若不趕緊援救恐蹈壽州覆轍著僧格林沁懍遵前旨催令陳國瑞一軍迅速馳赴蒙城力解重圍陳國瑞餉需既已有著務當星速進行以保危城而維大局唐訓方於該總兵未到以前仍當就見有兵力竭力支持毋得稍有疏失薩薩布熟悉皖省情形本日已諭令劉長佑飭令該員馳赴臨淮交唐訓方差遣如該員見在該親王軍營卽著僧格林沁飭令薩薩布迅速前往臨淮以資得力協領穆克德布見尙未回吉林該協領係在何處是否尙在臨淮軍營著唐訓方查明如該協領打仗尙能得力卽由該撫酌量差委將此由六百里加緊各諭令知之○諭熙麟奏各路兵勇到營並見在辦理情形一摺所稱半載以來調到延綏鎮等各處兵勇經該督簡閱裁汰外僅得兵勇四千五百餘名其駐紮草地之伊克召兵一千名

並見紮草地之阿拉善官兵八百餘眾均由該督遣撤回旗所辦
尙爲覈實余萬明募到楚勇尙能得力軍械亦尙整齊卽著先行
派赴平涼力解城圍將馮元佐所帶練勇隨後繼進以爲應援並
卽催提副將王泰來續行招募之楚勇三千餘名迅速赴甘由該
督察看如能得力卽一併交余萬明王泰來統帶以厚兵力所有
調度涇甯二州兵勇各情均著照所擬分別調度遣撤及飭各該
地方官激勵民團妥爲召募以備防剿馬德昭一員見在多隆阿
親抵西安將其遷延浮冒等情據實奏參已有旨將該員革職交
劉蓉軍營差遣並將所奏該革員肆兇恣詐各情交多隆阿劉蓉
等嚴行查辦自難再令赴甘熙麟見在慶陽統領乏人著照所請
所有驍捷營各軍卽派已革潼關協副將張維義暫行統領進征
該員雖經前在商州防堵未能遏賊西竄爲瑛棨奏參革職如果

其材尙屬可用正可力圖報效以贖前愆熙麟所擬將各勇分飭
余萬明及馬天祥等各爲統帶暨飭令李玉安統帶營兵伊昌阿
福祿二員統帶蒙兵及甯夏滿兵之處均著照所擬辦理一併歸
張維義統帶由熙麟調遣已革遊擊余萬明並著賞還遊擊原官
頂帶熙麟卽行傳旨飭令各該員等奮勉圖功以期廓清甘省河
南布政使王憲潼關副將阿揚阿於余萬明所募楚勇過境之時
捐備軍械借給餉銀均屬踴躍急公能顧大局著由熙麟傳旨嘉
獎韓城縣知縣袁一陽動用地丁銀七百餘兩接濟勇糧能知緩
急准其於應解藩庫正款項下開銷並著將該員摘去頂帶處分
卽行開復以勵將來熙麟此時惟當勉爲其難激勵各軍速解平
涼之圍進克固原以期肅清甘境以副委任前據多隆阿奏派署
提督陶茂林帶兵三千馳赴鳳翔援剿解圍後卽可移軍平涼與

該督所派之張維義等軍會同攻剿熙麟可隨時知照多隆阿會商妥籌辦理將此由六百里諭令知之○諭前因皖省苗逆日熾僧格林沁派陳國瑞移軍助剿當經諭令閻敬銘英桂張之萬迅籌餉需解供陳國瑞一軍進剿之用本日據唐訓方奏苗逆悉調悍黨包鈔蒙城官軍後路並句捻四面築壘危急萬分專恃陳國瑞一軍馳救乃接該總兵函稱伊軍向由東省月給餉銀萬兩到東後八閱月僅領銀四萬兩見當千里赴援需費尤鉅深恐兵入皖境卽有乏餉之虞見在臨淮餉需亦屬艱窘請飭山東將應解皖營月餉連陳國瑞一營應解之餉一併解交該總兵行營以資兵食等語蒙城爲皖豫關鍵苗逆悉力圍攻情形萬緊陳國瑞一軍早經僧格林沁飭令赴援見以餉需無出致礙師行若使蒙城或有疏虞關繫甚非淺鮮著閻敬銘英桂張之萬迅卽遵照前旨

由藩庫不拘何款趕緊各先撥銀三萬兩解交該總兵軍營以應急需並由本年九月起仍按月各解陳國瑞軍餉銀一萬兩務當源源接濟不准稍存膜視致誤戎機其山東省應解皖營月餉並著閻敬銘一併由徐宿解送陳國瑞行營毋得以該總兵移師赴皖稍分畛域本日復據熙麟奏慶陽軍火匱乏煤鐵俱無且工匠均爲逆回雇去更屬無從製造已飛咨英桂於秦乙鎮採辦礮二千斤硝八千斤並撥該省局存火藥一萬斤見據英桂咨覆業已備齊等語著英桂速行派員解赴慶陽軍營以利攻剿晉省防務漸鬆前由京營派往之祥安等見在該省監製火器火藥等項需用自必裕如而甘省情形據熙麟所奏實係無從採辦著英桂卽將祥安所造之火箭炸礮子等項迅速酌量分撥解甘是爲至要將此由六百里各諭令知之○特普欽奏俄人在伊犁之博羅胡

吉爾卡倫與防堵官兵接仗我軍獲勝又在阿奇夏霍托瑪爾舊
葛爾奇等處越界耕種禾稼經副都統關保率兵平毀復向呼倫
貝爾所屬之蒙克西里地方越界割草經總管三都克多爾濟與
該瑪雨爾理論旋卽收回惟夾心灘一處該酋布色依輒以和約
內並未載明強稱爲兩國之地主使俄兵看守不聽平毀又有轉
行該國駐京使臣懇求暫借之語其喀拉爾河口越界安設水磨
板房一所及順喀拉爾河所蓋之柳條窩鋪三處均飭令委員向
該瑪雨爾據理曉諭令其將房間窩鋪全行拆毀報聞○撥吉林
黑龍江餘丁五百名綏遠城察哈爾馬五百匹赴臨淮助勦○予
安徽殉難布政司經歷鄭倬祭葬世職○癸巳予廣東殉難知縣
王炳祭葬世職○乙未僧格林沁奏臣於八月初四日行抵清平
縣之魏家灣擇地安營初七日各隊先後到齊初九日臣帶領各

東華續錄 同治二十五年 三
起馬步隊由魏家灣過河進兵先由柳林西南前進將趙家塔頭
等處村莊一律克復卽在各該處分紮營壘逼近甘官屯劉貫莊
賊巢初十日該逆由甘官屯東門逃竄我軍自北繞赴西南追剿
賊匪遁入劉貫莊寨內併力死守我軍卽將甘官屯賊寨收復當
飭恆齡春霖帶隊駐紮是夜探得該逆全股由劉貫莊向西南逃
竄十一日黎明蘇克金恆齡帶領馬隊跟蹤追剿臣復督帶舒通
額隨後策應並調魏家灣步隊駁位移至劉貫莊駐紮是日我軍
追出五十餘里查看賊蹤有向東南分竄之勢遂令蘇克金等向
西南追擊舒通額向東南堂邑一帶搜剿十三日夜臣督帶各起
馬隊取道冠縣迎頭兜擊大雨終朝未能前進探得該逆在冠縣
東南十餘里趙新莊等處盤踞十四日黎明出隊至煙店地方該
逆瞥見我軍出莊抗拒馬步賊匪約有二千餘名當飭舒通額督

軍衝擊該逆抵死不退正相持閒突出悍賊二百餘名直衝入營
總常德隊內協理台吉諾林丕勒見賊勢甚猛卽督軍橫擊盡將
悍賊殪死賊勢稍卻舒通額揮令馬隊一齊衝壓馬賊向東南敗
退步賊仍敢直前迎拒舒通額等督軍圍擊步賊不支紛紛亂竄
卽經我軍擊殺殆盡尙有步賊二百餘名向東鋌走當飭成保等
帶隊接剿其馬賊見步賊已潰卽向東南逃竄我軍追殺三十餘
里是日共斃賊一千餘名奪獲槍礮多件其餘馬賊六七百名知
我軍緊躡其後悉向西南奔竄據探該逆於十六日已刻竄過開
州官軍卽於午刻追過開州等語是否接仗尙未接據稟報臣因
東昌府所屬之莘堂曹州府之觀朝等縣圍寨素有匪黨窩藏見
在大股賊匪已經我軍擊殺殆盡其豫先竄散各匪難保不潛匿
各圩再圖聚眾滋擾是以督飭舒通額帶領馬隊仍駐紮劉貫莊

並札調各地方官督飭各團次第清理實力搜拏以絕根株而安
良善查直東軍務惟宋逆一股見已被剿窮蹙離巢遠竄此時不
過鎮壓搜捕無須多兵該督撫自應酌畱本鎮本汛官兵暨京營
黑龍江各起馬隊搜拏飭匪彈壓地方其兩省外調官兵及所募
勇丁共有兩萬餘名均應趕緊遣撤令其歸伍歸農庶不至別生
事端應請旨飭下該督撫迅將外調官兵飭令歸伍所募勇丁及
時遣散以節經費而免虛糜再查署直隸提督恆齡係黑龍江人
帶隊極爲勇敢若令管轄旗兵尙堪整飭惟該員於綠營一切事
宜未能諳練似未便署理提篆致滋貽誤應請旨另行簡員署理
以重職守又奏逆首宋憬詩屢降屢叛怙惡不悛直隸總督劉長
佑督辦三省剿匪事宜所統馬步兵勇不下一萬數千餘名沿河
駐防自春至秋數月以來賊勢愈張及至六月間該督奏稱擬用

滾營之法步步前進月餘之久仍紮臨清尙未逼近賊巢至八月初三日始行過河紮營尙距賊巢四十餘里坐擁重兵遷延不進實屬貽誤戎機至曹州鎮總兵保德山東臬司丁寶楨亦係管帶馬步兵勇駐紮堂邑專剿宋憬詩股匪並應聽劉長佑節制乃該員等不圖督兵剿賊及至堂邑西北二十餘里辛集地方輒與該逆晤面擅議收撫亦屬咎有應得相應請旨將劉長佑及保德丁寶楨一併交部議處 上諭內閣直隸總督劉長佑督辦三省剿匪事宜自應迅速進兵將宋憬詩股匪殄滅乃時經數月尙未成功殊屬遲延劉長佑著交部議處山東曹州鎮總兵保德按察使丁寶楨管帶馬步兵勇駐紮堂邑不思厲兵滅賊輒至辛集地方令宋憬詩謁見未經稟商劉長佑擅議收撫尤屬非是保德丁寶楨著一併交部議處尋議劉長佑降一級調用保德丁寶楨均降

三級調用係私罪毋庸議抵得旨劉長佑著加恩改爲降三級留任保德丁寶楨均著加恩改爲革職畱任○諭前因內外臣工奏參勝保摺內有勝保倚通匪回弁馬兆麒金回回爲心腹用債事勒休之提督孔廣順爲翼長收受通賊回弁馬振麟金益美女札給差使並將地方官拏獲從逆之回教廕生馬承恩索銀釋罪各等情當經諭令多隆阿嚴訊具奏茲據奏稱孔廣順於同治元年八月經勝保委充翼長旋以舊傷復發辭退九月初一日准陝西巡撫行知奉旨休致回弁馬承恩由世職充補駐京提塘住居省城北關被回裏去乘閒逃回勝保勸其捐銀助餉因無力應允發交長安縣監禁並未從賊亦無索銀釋罪情事回民馬振麟由武舉投充勝保軍營屢次打仗保至都司花翎上年六月經陝西巡撫派赴回營勸諭解散實未通匪八月勝保到省面委催捐回民

富戶送過黃精五加皮等藥並未送黃金美女回弁馬兆麟由守
備保升儘先都司前在孔廣順軍營帶隊後歸王夢齡統帶並無
潛通消息情事亦未在勝保軍營聽差請分別定擬等語前任固
原提督孔廣順經勝保派充翼長在未經休致之前且爲日無多
尙無弊竇該員業已老病休致著勒令回籍閉門思過不准在陝
逗遛馬承恩雖訊無甘心從逆及交銀免罪之事惟身爲職官被
賊擄去日久忍恥偷生實屬不知大義著卽行革職交地方官嚴
加管束以示炯戒馬振麟旣無私通回匪及餽送黃金美女等事
著與並未隨勝保當差之馬兆麒一併交多隆阿軍營差委以觀
後效儻再不知愧奮卽著從嚴懲辦○諭議政王軍機大臣等前
據劉長佑奏宋逆被剿南竄當經諭令僧格林沁督兵追剿並飭
劉長佑馳回直境嚴防該匪西竄茲據僧格林沁奏行抵魏灣安

營後卽督飭馬步各軍分路前進先後將趙家塔頭等處村莊克復直徧甘官屯劉貫莊賊巢連日斃賊數千尚有步賊二百餘名向東鋌走其餘馬賊六七百名向西南狂竄官軍緊躡其後該逆遂竄過開州見在派兵追剿各等語宋憬詩股匪經僧格林沁督師進剿擊殺殆盡所有逃竄馬步各賊爲數無多亟應悉數殲除肅清畿輔其東竄步賊業經成保等帶隊搜剿諒易殄滅惟馬賊狂竄開州該大臣務當嚴飭蘇克金恆齡盡力追躡乘其喘息未定將此股竄匪就地殄除毋令闖入豫境並著劉長佑督率兵勇由開州一帶迎頭截擊以剿爲防會同蘇克金等軍兩路夾攻仍嚴催李明惠由河北進剿以收聚殲之效張之萬當恪遵前旨檄飭河北鎮道扼紮直豫交界處所豫防餘匪竄越毋得稍有疏虞致干重咎僧格林沁因萃堂觀朝等縣素有匪黨窩藏見擬駐紮

劉貫莊調派地方官督飭各團次第清理卽著嚴飭各該員弁實力按拏務絕根株毋貽後患此時宋逆一股離巢遠竄鎮壓搜捕無須多兵該大臣請將直東調募兵勇趕緊遣撤自係爲撙節餉項起見惟直東交界地方人情浮動剽悍匪黨尙多僧格林沁指日督師南下劉長佑閻敬銘各有地方之責自應乘此軍威大振之時將各處伏莽陸續搜捕淨盡屆時察看情形兵力如果有餘自當分別遣撤以節糜費本日僧格林沁所陳應將兵勇分別酌畱撤遣歸伍歸農之處著劉長佑閻敬銘斟酌辦理恆齡於綠營事宜旣據僧格林沁奏稱未能諳練所有直隸提督一缺卽著改派江長貴暫行署理該員能否勝任仍著劉長佑隨時察看據實具奏將此由六百里各諭令知之○諭多隆阿等奏回逆大股渡河撲營擊剿獲勝及陰雨未霽陶茂林一軍不能拔隊遄行各等

語此次回匪渡河撲營雖經雷正綰督兵擊退而悍賊均赴高陵併力抗拒餘孽又在咸陽蘇家溝等處調來僞元帥孫義保率黨數千渡河意圖攻撲三原各營亟宜嚴加防範杜其西竄仍一面進剿高陵迅殲醜類並分兵攻擣永樂店等處老巢以牽賊勢不得稍有遲延致誤戎事至鳳翔被圍一年危在旦夕陶茂林一軍自應恪遵前旨星夜進兵即使泥濘載途亦應念鳳郡數十萬生靈望援之急迅速拔隊豈得畏難苟安藉口不進著多隆阿等迅飭該署提督剋日赴鳳立解城圍儻敢任意稽延致鳳翔或有疏失必當重治其罪決不寬貸雷正綰自入陝後所向克捷且能以少擊眾洵屬智勇兼優本日已明降諭旨交部優敘該署提督務當益思感奮廓清全陝與多隆阿同膺懋賞實有厚望焉吉順已准其開缺回旗其所遺河州鎮總兵一缺多隆阿輒請以曹克忠

補授殊屬不諳體制惟念曹克忠戰功疊著且知潔己愛民以之
補授河州鎮總兵可期勝任是以降旨允准嗣後遇有提鎮等缺
該將軍惟富請旨遵行不得再行擬員請簡以符定制多隆阿曰
內計已出省勦賊所有省城防守及籌運餉需各事宜卽著張集
馨會同穆騰阿妥籌辦理毋稍疏懈將此由六百里諭知多隆阿
雷正綰並傳諭張集馨知之○曾國藩奏臣疊奉諭旨令臣撥兵
援救臨淮並札調李世忠迅速進兵臣查濱淮之要區有五北曰
潁上曰懷遠南曰壽州曰鳳陽曰臨淮皆緊傍淮水者也距淮稍
遠之區有四北則濱潁河者曰潁郡濱渦河者曰蒙城南則濱淝
河者曰六安濱史河者曰固始皆匯於淮水者也自潁上懷遠壽
州悉淪於賊九處已失其三目下唐訓方所置守者爲臨淮爲蒙
城爲鳳陽三處臣所置守者爲六安爲潁州爲固始三處情形雖

稍分緩急而皆爲苗逆必爭之地臣前派何紹彩陸師二千人及

彭玉麟楊岳斌所撥三板八十號先後抵淮亦嘗戰勝一次因苗

逆徒黨日眾夾淮而軍懷遠蚌埠糧路已斷七月二十二日唐訓

方將各營撤退卽長淮衛小蚌埠一帶亦被苗逆占踞臨淮一軍

危如累卵臣本續籌援兵挽救全局况又疊奉諭旨責無旁貸無

如近淮諸軍如周寬世蔣凝學毛有銘成大吉等皆扼守最要之

地不能抽動周寬世所部分守六安迎河集二處尙嫌單薄頃又

調桐城一營併紮迎河蔣凝學所部分守潁郡霍邱三劉集三處

七月十七日攻破黃梁集西南二圩十八九日疊平數圩該處在

濶子口之南苗黨尙貫金嘯聚其間蔣凝學派隊出劉家臺湖口

焚其米船盡毀羣圩遂於八月初一日襲破尙逆老巢嚴防河路

爲將來進兵濶子口之計毛有銘所部駐守老廟集七月十七日

攻破陶家三圩旋又分紮板橋集凡壽南六安之良圩賴該軍以
自保成大吉所部分紮固始三河尖近爲潁郡聲援遠爲鄂省屏
蔽而潘閬等圩首鼠觀望亦須有該軍維繫其閒庶不至堅其公
然從苗之志凡此皆近淮諸軍難以調動之情形也至江南南岸
諸軍自江西肅清後黃汶金等股圍撲青陽守將朱品隆病勢日
篤不能登陴將士病者過半苦守兩旬兵單糧絕岌岌可危李榕
之由水路赴援者甫抵離城十八里之銅埠江忠義席寶田之由
陸路赴援者見尙未至池州青陽之能否保守殊無把握縱青邑
倖保無恙而賊意在圍魏救趙將徧擾皖南最要之區以掣金陵
官軍之勢凡甯國蕪湖南陵涇縣灣沚清弋江必將處處喫緊臣
以金陵各軍新破上方橋河西二壘城賊水運已斷不得已檄令
鮑超引軍西上以勦由江回皖之賊以救甯國蕪湖之急方今滬

軍極盛江陰新克已將蘇浙之賊截爲數段正在得手之際本宜加功於金陵收效於蘇郡臣分金陵之兵以救皖南已屬失算若再遠救淮上所失尤大此江南諸軍不能赴淮之情形也諭旨命臣札調李世忠迅速進兵並垂詢是否可資其力一節李世忠中心感愧與苗爲仇是其可信之端而將弁驕恣士卒攜貳又其不可恃之端該部所駐江北州縣惟滁州五河兩城稍有關繫數年之儲蓄各營之精銳畢萃於斯論守局則自顧身家或有堅忍之力論戰陣則向無紀律難操必勝之權該提督果迫於公義私憤併力勦苗自未便阻其敵愾之心致啟其猜疑之漸若必調勦以資其力則臣可保該提督之無他不能必該部眾之用命萬一軍心不固前敵挫失恐五河後路又蹈二浦覆轍欲拯臨淮之急轉貽全局之憂此又臣所不能不過慮者也竊計臨淮各營何紹彩

歐陽勝美等之陸師丁泗濱王吉等之水軍尙無損折普承堯張
得勝等挫退以後已逾半月尙可收集補綴次第成軍臣處解銀
二萬及子藥槍礮以資整頓儻陳國瑞援軍迅達臨淮或者勉力
支持保此危疆臣俟南路軍事略鬆仍當另籌一旅馳往會剿斷
不敢稍存膜視上煩宸廑上諭曾國藩奏皖南緊要未能撥
兵赴援臨淮一摺所慮甚屬周密陳國瑞一軍已屢經催令僧格
林沁飭卽速赴臨淮並令山東等省迅籌協餉當已拔營前進計
日可到蒙城前日以江北軍務稍鬆又令富明阿酌帶精銳兵勇
赴援臨淮准唐訓方派弁分頭迎探俟各城兵勇到齊斟酌機宜
妥速進剿臨淮兵力漸厚暫可無須曾國藩撥兵援應青陽危急
必須援兵早到方可保全江忠義席寶田二軍見在行抵何處著
曾國藩沈葆楨迅卽催提此項兵勇令與李榕水路之師會合力

解青陽之圍保全皖南要地曾國藩已檄令鮑超引軍西上以勦由江回皖之賊其甯國蕪湖南陵涇縣等處著飭各守將嚴爲戒備以鮑超爲遊擊之師無令逆氛肆擾此股竄匪由江西敗遁其膽已寒得江忠義等軍並鮑超一軍合勦當可聚而殲旃滬上各軍正在得手必須加功於金陵方可收效於蘇郡俟青陽賊股勦辦完竣仍令鮑超等軍前赴金陵以圖合圍而顧全局至李世忠之軍如其踊躍用命自不必拒絕以寒其心設仍觀望不前亦無庸催調以資其力此中操縱機宜諒唐訓方必能領會也蔣凝學等軍如可進擣逆巢安撫圩眾曾國藩飭令酌量戰守其倘貫金一匪是否殲斃並著查明具奏將此由六百里各諭令知之○丙申諭議政王軍機大臣等玉通奏花寺奸回勾結撒匪攻陷城堡已徧郡城見籌辦理及兵勇接仗情形一摺西甯花寺奸回肆擾

已將喇課鎮海堡等處營堡攻陷其南川營塔爾寺及威遠白塔寺各報回匪聚眾焚殺經各營官兵及各該寺呼圖克圖等會同攻剿各有殺傷見在該匪並從西川蠡擁進撲郡城盤踞城東關廂勢甚兇狠經玉通督飭兵勇登城守禦並分路出剿卽著玉通激勵該處員弁兵勇嚴密守禦相機出剿飛催所調青海蒙古番子官兵並阿家呼圖克圖等練勇星速到齊合力剿辦並著恩麟仍遵前旨迅卽派撥勁兵交前任提督經文岱統帶前往西甯進剿該處情形愈緊經文岱何時進發如果該員不克分身此外何員可以另派帶兵往剿之處著熙麟恩麟迅速辦理具奏西甯鎮營官兵餉銀欠發已一年之久此時郡城被回匪圍困該官兵晝夜防守僅由玉通於捐款內酌給口食飢危可想著熙麟恩麟督令甘省署藩司無論何款務卽趕緊籌撥解濟以資散放而振軍

心毋稍玩延青海蒙番業經玉通檄調其貴德巴燕戎格兩廳番族是否可爲我用著玉通恩麟仍遵前旨妥商籌辦也氏馬奎源母子此時曾否行抵西甯該頭人如果能爲回教信服解釋紛爭玉通卽遵前旨飭令道員雅爾佳納督率該頭人妥爲辦理此時該匪已偪城關兇燄正惡自應實力勦擊以挫其兇鋒如能疊加懲創退出城關該回眾實有兩教相持求爲剖辯等情卽著玉通相機妥爲辦理以平仇怨將此由六百里諭知熙麟玉通並傳諭恩麟知之○丁酉諭議政王軍機大臣等劉長佑奏宋逆被勦西竄親督步隊分道堵截及賊由濬縣渡過衛河竄入臨城一帶各摺片所奏宋憬詩被勦狂奔竄過開州等情與僧格林沁前奏大略相同該督以擒獲賊供有宋逆在井店被馬隊擊敗已由濬縣西渡衛河之信當派余承恩等各隊馳赴臨漳江長貴徐廷楷各

率所部馳赴臨洺關及順德府一帶以備邊防而資後勁詎賊已於十七八日爲馬隊追及由濬縣鳧過衛河竄入臨漳成安一帶是賊蹤已復自西而北余承恩等各隊曾否與賊相遇該督見駐大名正可督令與江長貴等各軍由順德臨洺會合堵剿王榕吉之兵馳赴鉅鹿參將劉祺馳赴正定亦皆可以聯絡接應著劉長佑迅卽嚴督諸軍迎頭截擊以防北竄恆齡蘇克金馬隊由內黃取道追剿是已在賊之南追剿愈緊必致賊蹤偏近畿疆此賊馬隊尙多直省官軍均皆步隊不足制賊死命著僧格林沁飭令恆齡蘇克金速卽間道繞出賊前自北而南奮力迎剿其河北一路著張之萬懍遵前旨飭令該鎮道等實力防剿並著張之萬嚴行督率認真防剿毋任賊匪乘間往來致干咎戾晉直交界相距漳洺道里非遙見在宋逆有圖竄山西之勢並著英桂豫飭所屬嚴

加備禦毋令賊於直境被擊得以西越晉疆擾及完善僧格林沁見在是否尙駐劉貫莊所有莘堂觀朝等縣窩藏匪黨搜捕如何如已有端緒卽可徑交閻敬銘督率地方辦理該署撫務當嚴督所屬聯合紳團實力按捕淨絕根株宋憬詩一股殘敗之餘率其死黨冒死紛竄諒人數已不甚多卽著僧格林沁督令各軍乘勢掃蕩盡殲醜類劉長佑督師日久未能將此賊迅圖殄滅見在賊蹤復擾直境尤應激勵各營兵勇與恆齡等馬隊會同夾擊以收速效其大名鎮道姜國仲祝塏二員所部兵勇見尙駐開州等處仍飭嚴防回竄隨時探明賊蹤與迎頭攔截之軍合力兜圍毋再貽誤將此由六百里各諭令知之○諭吳棠奏蒙城危急遵飭陳國瑞赴援一片據稱渦河南北兩岸之王圩宋圩皆爲賊踞自蒙城東南見繞至北面西面悉皆苗壘皖軍在城外所紮各營盡包

賊中其英翰小澗集官軍隔於賊西該城糧道四絕萬分危急苗逆以馬隊七八千出外分鈔英翰一軍被賊衝退經姚廣武從旁夾擊該逆復以步賊數千由南路衝上兩面包裹兇悍異常官軍奮勇苦戰逆眾始行潰遁等語蒙城自馬新貽移軍赴臨後賊勢趨重築圩環偪實屬情形萬緊該城所恃以爲援應者惟陳國瑞一軍該總兵已於八月十四日抵徐卽著吳棠傳知該員迅速進兵先通蒙城餉道力解城圍毋得稍事遷延致令孤城坐困北竄捻股旣由豐縣南遁回巢宿西一帶有艾憲銀一軍諒資堵剿其姚廣武一軍卽著吳棠飭令與陳國瑞之兵聯絡策應合力進取毋誤事機前因江北軍情稍鬆而臨淮甚緊有旨令富明阿酌帶官兵赴臨援應此時蒙城危急萬分富明阿之軍如能早到臨淮相機進取亦可掣動蒙城賊勢卽著該都統懍遵前旨迅卽拔隊

兼程前進與唐訓方合力戰守江北防軍久經休息臨淮得此生力之軍亦可大振聲威兼籌進取則蒙城軍事或可稍鬆解圍必當更易諒富明阿必能領會機宜迅速前進也江北防務卽著都興阿督令在防各軍嚴扼要隘毋稍疏忽以副委任將此由六百里各諭令知之○諭李雲麟奏馳援陝南通籌進剿請由楚陝兩省各設糧臺一摺陝南軍務亟須整飭毛震壽雖尙能措拄而剿辦總難期得力卽著李雲麟迅由鄖陽帶領所部星馳赴陝速解漢中城圍分救鎮安其漢陰及山陽所屬之漫川關等處分部各軍卽照所擬辦理仍著劉蓉迅速由川赴陝以資統率劉蓉到陝南後一切地方軍務及毛震壽李雲麟新舊各軍均歸該撫節制以一事權李雲麟卽可會同劉蓉陳奏事件毋庸自行單銜具奏至楚陝兩省應行各設支應糧臺著官文嚴樹森劉蓉張集馨等

查照辦理並將陝南軍餉由兩省源源解濟毋令缺乏李雲麟見在帶兵由鄂赴陝如需襄辦營務文案等件之員秦楚兩省自不乏人可以隨時擇調所請國子監司業紹祺兵部郎中國英二員均著毋庸前往將此由六百里諭知官文嚴樹森劉蓉李雲麟並傳諭張集馨知之○諭勞崇光奏查明前署督臣殉難及滇省大概情形一摺所奏前署雲貴總督潘鐸死事緣由與前日駱秉章所奏大略相同見在杜汶秀仍盤踞大理叛逆已成馬榮踞尋甸馬聯陞踞霑益皆受杜汶秀僞職時至附近各處滋擾徐之銘一言一動皆聽回教諸人指揮是非倒置任意欺罔實堪痛恨馬如龍心術隱微固不可知既據該督奏稱外貌頗襲取忠義之名不肯自居叛黨且具稟該督詞尚恭順卽著勞崇光賈洪詔乘機誘掖或尙有可用之處卽著照該督所擬設法暫與羈縻但須隨時

防範不可墮其詭謀省城兵權利權均歸回民雖當此兵餉兩絀未能遽挽積弊然將來應如何辦理亦當豫先籌畫庶可漸圖規取勞崇光賈洪詔務當隨時確查該省情形與駱秉章悉心籌商妥爲辦理至本地團練如臨安之梁士美東川之楊盛宗旣稱得力應如何加意拊循俾爲我用之處並著會同妥籌設法駕馭將此由六百里各諭令知之○諭勞崇光等奏通籌黔中下游大局並攻克桐梓縣屬鼎山城賊巢黔西州水城廳肅清各摺貴州黎平之六洞鎮遠之張家寨石阡之荆竹園等處賊匪負隅老巢句結蔓延雖張家寨荆竹園竄匪疊經官軍堵剿獲勝將火燒橋等處各賊巢先後攻克惟黎平等府賊匪仍尚不少亟須痛加剿洗著勞崇光張亮基督飭將弁激勵兵勇實力進攻務當掃除羣醜迅殄逆氛所稱貴州驍將健卒尙不乏人但由湖南撥餉按月解

黔不難陸續蕩平無須以楚援黔等語該督撫辦理貴州軍務是其專責今但借資湖南之餉而不復資其兵力諒勞崇光等確有把握定能剋期掃蕩以慰朝廷廑系桐梓縣屬之鼎山城賊巢見已攻克黔西水城一律肅清惟賊蹤飄忽時散時聚從前田興恕辦理軍務於各該地方屢復屢陷甚不足恃該督撫務將已復各州縣督飭該地方官嚴密守備認真防禦毋令賊匪再行闖入以期次第廓清儻業經肅清之地方復被賊匪竄陷惟勞崇光張亮基是問貴州教民一案昨因時閱月餘未據該督撫將辦理情形覆奏復諭令勞崇光等查明如田興恕之任性妄爲實由劣員謝葆齡等愚弄所致究竟何員尤爲可惡係屬罪魁該督等卽將其愚弄田興恕及或有挑唆慝戇等情切實查明盡法懲辦並將該劣員謝葆齡等罪狀奏聞著勞崇光張亮基懍遵八月十五日寄

諭妥爲辦理設法趕緊了結該督撫老成練達素顧大體諒能不負委任也將此由六百里各諭令知之○諭景廉奏遵旨偵探俄羅斯布魯特情形倭里罕後裔下落並密陳綽坦仍宜承襲汗爵各摺倭里罕是否陷入霍罕城或由城內逃出被害斜黑阿渾子孫是否在倭什地方或附從希皮察克布魯特均無確實消息著景廉仍行設法切實探明隨時具奏至綽坦冒襲汗爵一案見據景廉奏稱哈薩克奉綽坦爲汗業已相安日久且所屬部眾多在塔城附近地方不願附俄本日據明緒等奏尙調綽坦等輕騎前赴塔城曉諭自應設法羈縻俾爲我用綽坦本未降旨革除汗爵著仍循其舊本日已諭令明誼等將常清咨文撤銷並諭令常清知悉矣將此由六百里諭令知之○予貴州陣亡知縣陳澍南雲南陣亡通判吳榮禧等祭葬世職○調烏魯木齊綠營兵一千五

百名阿克蘇換防兵五百名赴伊犁協剿○戊戌陝甘總督熙麟奏平涼被圍檄飭余萬明等飛速往援得旨平涼被圍已久急盼援兵該督當嚴飭余萬明激勵將士一鼓作氣迅解城圍俟所募楚勇到齊再圖分攻合鞫廓清大路接仗情形仍著續行奏聞○己亥諭議政王軍機大臣等英桂奏皖捻闖入豫西調派各路兵勇嚴防一摺據稱探報捻匪大股已由許州竄至洛陽相距河岸及潼關不遠晉省在防兵勇數止萬餘如該匪銳意西趨一至新澗陝州則垣曲縣之東灘渡平陸縣之茅津渡芮城縣之大禹等渡皆係一河之隔在在須防該撫已飛飭袁復清統帶楚勇先往東灘渡駐紮並抽撥勁旅分赴茅津渡等處與原派防兵嚴加守禦如匪黨竄近晉邊或附近潼關一帶豫省有兵追剿晉師尙可酌派渡河會擊儻豫省無兵賊勢浩大沿河口岸同時喫緊卽有

東華經金
自顧不遑之勢等語據奏報防河情形尙屬認真著卽飭令和昌
劉子城等於防務較鬆處所撥派兵勇扼賊來路無論捻匪宋逆
竄及河干均卽實力剿擊勿使一人一騎得以偷渡如豫省直隸
有追剿之師卽派兵渡河會擊以期一鼓殄除其潼關一帶卽咨
會多隆阿張集馨迅派兵勇迎頭截擊並飭令潼關廳將沿河各
項渡船全提北岸以免搶渡張之萬於八月初七日奏報捻匪擾
及許境被擊西趨至今將及二旬未得該撫續報見據英桂奏捻
匪大股已由許至洛似已蓄意西趨張之萬當一面飛催英桂派
兵堵剿一面仍飭張曜等兵繞出賊前痛加截擊不可徒成尾追
之勢致令竄入晉疆昨據劉長佑奏宋憬詩由開州竄越濬縣渡
河業經擾及衛輝屬境亦經諭令張之萬督率防剿毋任乘間往
來該撫身膺疆寄於捻逆宋逆分道肆擾蔓延豫境惟當會同毛

昶熙商調兵勇分投堵截保衛地方豈可遷延貽誤莫展一籌再
蹈鄭元善覆轍著卽嚴飭帶兵各員弁實力勦辦並將近日軍情
迅速馳奏將此由六百里各諭令知之○諭前據左宗棠奏臺灣
粵勇潰散情形當經降旨將署提督吳鴻源革職拏問所有福建
水師提督卽命林文察署理責令迅速啟程渡臺勦匪本日接據
原任臺灣道洪毓琛六月初三日摺報所陳軍務遷延兵餉匱絀
情形並請特派大員來臺督師勒限滅賊各等語雖未將吳鴻源
等貽誤實情據實參劾而軍事之掣肘呼應之不靈實已意在言
外該故員於病勢危殆之際猶能念切時艱殫心籌畫實屬可憫
見在林文察一軍是否渡臺卽著左宗棠徐宗幹飭令該署提督
懍遵前旨趕緊前赴臺郡督率諸軍力圖埽蕩並著左宗棠等酌
度賊勢軍情勒限蕝事儻再逾限無功吳鴻源覆轍具在斷不能

爲林文察寬宥也丁曰健受朝廷厚恩膺斯重任當與林文察等
妥籌防剿毋得稍有疏懈致干咎戾將此由五百里諭知左宗棠
徐宗幹並傳諭丁曰健知之○命和潤等清查奉天各員虧空○
允左宗棠奏畱廣東紅單師船歸閩省調遣○庚子諭議政王軍
機大臣等本日據議政王軍機大臣呈覽僧格林沁信函一件內
稱蘇克金恆齡於十七日追賊至開州西北花谷集尙有馬賊千
餘步賊六七百名列仗抗拒官軍進剿斃賊八百餘名步賊均已
殲盡馬賊至北高店搶渡衛河淹斃之外尙有馬賊五百餘名向
西北奔竄等情又據曲周縣稟報馬賊一股約四五百名自廣平
府城東竄至雞澤小寨一帶後有官兵尾追等語前據劉長佑奏
報賊由濬縣內黃竄至臨漳成安一帶當經寄諭該大臣督撫等
督飭諸軍會合堵剿並飭令蘇克金恆齡等馬隊繞出賊前自北

而南迎頭截擊見在賊復自廣平而竄雞澤是又已由臨漳成安
駸駸北竄劉長佑前所派赴順德臨洺鉅鹿正定諸軍及馳往臨
漳之余承恩等各隊究竟曾否到防何以未見迎擊著卽嚴督各
軍迅卽探明賊蹤聯絡堵剿直軍多屬步隊不足制賊死命恆齡
蘇克金等馬軍僧格林沁務卽遵奉前旨飭令間道繞出賊前迎
頭截擊與直省各軍會合勦辦速將此股敗殘匪黨悉數殲除毋
任節節尾追使賊日趨於北偏近畿疆甚至沿途復肆裹脅賊氛
轉熾致干咎戾此時賊如尙在雞澤一帶江長貴徐廷楷及王榕
吉之軍正可由臨洺關順德鉅鹿東西兩面迎頭攔截若令賊再
北竄各軍又必悉成尾追之勢步步落後不能及賊劉長佑甫經
被議此時賊復竄入直境務當激勵諸軍迅圖滅賊毋再遷延前
據僧格林沁奏報賊自東境被剿之後所餘馬隊不過六七百名

何以此次蘇克金等又復報稱馬步賊匪尙千餘名是否沿途尙有黥黨接應已由僧格林沁飭各地方查明稟覆並著劉長佑一體飭屬確查具奏宋憬詩首匪是否尙在竄賊之內僧格林沁信函亦未敘明並著偵查確實具奏當宋逆南竄時卽據劉長佑奏報飛調豫省河北鎮道迅率所部兵勇會集滑濬等縣團勇在於直豫交界擇要堵禦何以賊蹤往來直豫沿邊未見豫軍截擊著張之萬嚴飭該鎮道等認真防剿與直省各軍前後聯絡以收夾擊之效賊蹤日近邢洺晉省邊防尤應早爲設備著英桂嚴飭所屬於潞平一帶調集兵團豫籌堵剿毋令乘間豕突前曾寄諭英桂以甘省軍火缺乏飭令將祥安在晉所造火箭炸礮子等項酌量分撥解赴熙麟慶陽軍營應用本日復據熙麟奏報平涼失陷該省軍情愈緊所請由京營撥運軍火雖經諭令管理該營王大

臣酌辦殊恐緩不濟急著英桂仍遵前旨將祥安所造火箭礮子各項速卽酌撥派員解往慶陽應用將此由六百里各諭令知之○諭多隆阿奏馳回北岸進剿一摺熙麟奏平涼失守並調外火器營官員工匠火器等各摺片多隆阿已由省啟程馳赴渭北並檄令穆圖善將南岸各營移過北岸合力痛剿見在陝省回匪屢經敗創賊膽已寒多隆阿正宜乘官軍屢勝之威一鼓作氣將十三村餘匪掃除進拔高陵並令雷正綰一軍由西路進攻涇原等處賊巢以期肅清渭北潼關地方防務緊要皖捻竄入豫省後日向西趨該大臣務當隨時偵探加意嚴防商雒等處亦宜嚴密布置扼要堵禦不可稍涉大意致有疏虞甘省平涼府城見已失守回匪兇燄日張勢必併趨涇州冀與固原賊匪聯成一片該省賊眾兵單軍情緊急較甚於陝多隆阿如攻克十三村兵力自可有

餘卽著速撥一軍馳援甘省以顧大局儻不能另撥兵勇亦宜速
飭陶茂林一軍迅解鳳翔之圍以便前赴平涼毋稍遷延致誤事
機熙麟所派余萬明等軍往援平涼尙未啟程該處城垣已先爲
賊攻陷尙非赴援不力所有自請嚴議之處著加恩改爲交部議
處仍著飭令余萬明等嚴扼涇州相機堵剿毋任與固原賊眾勾
結仍飛催王泰來續募楚勇星夜馳赴慶陽以便規復平涼其平
郡西南各路扼要處所卽著恩麟迅速調派兵勇嚴密堵扼毋令
蔓延他處致成燎原前據熙麟奏請撥火器營所造火箭等項曾
經諭令英桂將火器營官祥安在晉省製造之火箭炸礮子等項
勻撥赴甘本日復諭令英桂迅遵前旨就近撥往此次熙麟續請
撥解炸子火箭等項並調吉慶等七員雇募工匠解運鋼銅赴甘
該營精於製造之人本屬無多銅鐵等項本係由部支領運往亦

覺不易本日已交管理該營王大臣酌覈辦理矣將此由六百里諭知多隆阿熙麟並傳諭恩麟知之○諭熙麟奏平涼府城被匪用地雷轟陷該匪有會同固原大股攻撲涇州之勢請飭總兵唐友耕帶兵飛速援甘等語平涼見已失陷該逆擬句合固原大股直撲涇州甘省兵力甚單情形萬分喫重多隆阿所派之陶茂林一軍前據奏稱先須馳援鳳翔俟郡城圍解餘匪盡殲始能漸達平涼相機勦辦見在亟須鄰省大支勁旅星速馳援始足以壯軍聲而遏狂寇駱秉章素顧大局諒必能統籌兼顧著仍懍遵疊次諭旨迅速抽撥得力兵勇二三千名剋期赴甘卽交唐友耕統帶前往如該總兵見因在川帶兵一時未能出省卽著駱秉章遴選知兵鎮將大員迅行帶往以利攻勦甘省情形糜爛已極該督惟當不分畛域速籌救援萬不得以兵力無可分撥爲詞稍存膜視

將此由六百里諭令知之○添設順天府四路捕盜營經制外委額
額外委各四員馬兵四百名○辛丑諭議政王軍機大臣等閻
敬銘奏移軍東昌按剿餘匪並擬紮調陳貫甲來營各摺片閻敬
銘移軍東昌後以莘堂冠館餘匪麇聚飭保德呼震等分赴朝城
莘冠館堂各路帶隊捕剿各營陸續按殺並將朝城之付驛集攻
毀擒獲餘賊辛魁元等及宋逆家屬二口正法辦理尙屬認真該
處爲直東交界降匪教匪嘯聚之區從前帶兵及地方大吏姑息
養奸未能大加勦洗兵至爲民兵去爲寇養癰貽患流毒至今兼
以東省團練從前辦理不善以致惡團林立抗官徇民恃強玩法
幾於良莠不分正宜乘僧格林沁大軍攻剿宋逆得手之時痛加
蕩滌掃除羣醜庶幾境內敕安不至大兵一撤萌孽復生此等皆
地方大吏應爲之事該署撫惟當飭令保德等分道實力按捕並

將各處黑團嚴行懲辦無得草率從事儻將來官兵撤後再起變
端惟閻敬銘是問宋逆見餘馬賊五六百名由廣平竄至雞澤恐
直隸官軍堵禦嚴密該逆復回竄東境臨清館陶一帶防務甚關
緊要務當督飭丁寶楨等軍嚴守要隘與直隸各軍聲息聯絡會
合兜剿毋稍疏虞東省強團臨邑陳貫甲爲尤著該團首私養護
身壯勇至數百餘名日常製造槍礮軍械勒捐居民盈千累萬旁
及濟陽等處紳富均各派捐愚民附和修築圩寨周圍一二十里
私設公局收理呈詞似此壞法亂紀已成尾大不掉之勢該署撫
以該團防堵擒匪亦屬有功尙無變亂實蹟擬札調來營歸標候
補並設法散其團眾自爲消患未萌變化民風起見卽著照所擬
妥速辦理儻該團不服調遣須煩兵力卽當速爲剿辦乘僧格林
沁大軍尙在直東境內聲威所懾自易剿除斷不可姑容釀亂亦

不可輕發損威將此由五百里諭令知之○浙江巡撫曾國荃奏
陳湜等將江東橋石壘攻克得旨據稱陳湜等攻克江東橋石壘
尙爲出力著將詳細戰狀及應行獎卹人員咨明曾國藩彙案陳
奏見在曾國荃尙未履浙撫之任嗣後金陵攻剿情形著與楊岳
斌彭玉麟一律隨時稟知曾國藩統由曾國藩奏報曾國荃毋庸
單銜出奏以一事權○壬寅命駱秉章於夔關項下提款濟李雲
麟軍餉○癸卯諭議政王軍機大臣等劉長佑奏賊竄直境東北
經各路步軍追截折奔東南見籌合力防剿一摺宋逆以敗殘餘
匪避兵而行一晝夜輒狂奔三百里是其力將竭其技已窮派出
馬隊果能認真追剿何難聚而殲旃乃恆齡蘇克金等自開州花
谷集接仗後及賊竄至阜城東光徐廷楷等率步隊跟追距賊不
遠而恆齡蘇克金馬隊尙未見到本日伯彥訥謨祐到京召見面

詢賊情與劉長佑所奏均相符合並據奏稱道經阜城宋逆亦跟蹤而至詢以恆齡蘇克金馬隊則尙落賊後未之得見直隸各軍步隊居多全賴恆齡蘇克金馬隊追剿可以制其死命乃賊匪馬隊如此狂奔而恆齡蘇克金馬隊獨遲遲不進是其貽誤戎機實難辭咎恆齡蘇克金均著先行交部議處見在該員等所部馬隊行抵何處卽著僧格林沁嚴飭迅速前進與直隸官軍會合夾擊盡殲醜類儻敢仍前玩泄意存觀望必將該員等從重治罪見在宋逆竄至東光一帶該處東距天津南距武德在在須防且該逆於武邑境內劫去餉銀二萬兩藉資盜糧若不趕緊撲滅其勢必將復熾劉長佑見已馳赴景州卽著督飭徐廷楷余承恩等跟追痛剿不得再落賊後一面嚴催江長貴王榕吉等分紮滄州等處力扼西北兩路以固畿輔門戶並著僧格林沁閻敬銘速撥馬步

兵勇由德州臨清等處迎頭截剿總期四面夾擊共除窮寇儻派出各軍堵剿不力致賊匪再行紛竄何路有失卽惟何路之帶兵員弁是問決不寬貸天津兵勇大半徵調四出洋槍隊是否已由僧格林沁飭回見在何處著劉長佑查明如此項槍兵業已飭回卽著仍在天津歸崇厚調遣此時賊蹤逼近一切防剿事宜卽著崇厚妥籌辦理毋稍疏忽將此由六百里各諭令知之○唐訓方奏臨淮自攻復長淮衛後臣因兵力尙單未遽責令進取深慮苗逆詭謀百出見雖趨重蒙城而懷遠之賊狡焉思逞益以附近逆圩其勢尤重臨淮後路設被包鈔則我軍仍首尾不能兼顧臣當飛飭各營分屯要害南至定遠九十里北至固鎮一百二十里聲勢聯絡橫截該逆鈔擾之路並親赴長淮衛履勘尙可不至疏虞惟蒙城情形倍形危急據知府英翰稟稱渦河南北兩岸見已合

圍英翰將河北各營抽調至小澗集迎頭抵拒河南官練併入城中死守等語至姚廣武一軍飭令援蒙而該總兵不能不兼顧徐宿見聞捻首李大箇子已竄至豐碭地方勢須分兵堵剿是該軍僅可藉助蒙軍聲勢而不能恃以解圍近接陳國瑞函已於本月十六日行抵徐州俟軍裝火藥到齊即可赴蒙援剿又蒙 聖恩念及都興阿所派二千人尙屬不敷剿辦飭富明阿多帶精銳赴臨助剿指日各處援兵大集三路進攻之策可以次第舉行惟用兵之道事權貴有專屬而後緩急有所稟承責任必有專歸而後功罪無從諉卸近來軍營習氣成則歸功於己敗則諉過於人平時各軍其將莫肯相下一旦賊有可乘之利則環視而莫敢先或一軍爲敵所乘則又環視而莫之救積習相沿亦其勢分不相統攝散漫無紀以致此也竊觀皖北各路軍營南則蔣凝學成大吉

諸軍雖不相統屬而有曾國藩遙爲節制進止應合機宜卽臨淮一軍由臣約束隨時調度亦尙可期得力惟北路陳國瑞雖功績素著而年資稍輕姚廣武以客軍來援齒望較重或不爲下以臣之愚伏願 皇上特伸乾斷以蒙城一路專委陳國瑞勦辦而與以調遣之權淮河北岸專委富明阿俾與蒙軍連合俟蒙圍解後卽進規苗逆老巢至潁壽一路專委蔣凝學等軍而淮河南岸則臣獨任之何路稍有疏虞卽惟責成之人是問庶事權較有歸宿而後同力齊心刻期並進不致遷延觀望坐失事機至臣職任皖撫責無旁貸凡屬皖省一村一堡其得失皆繫於臣儻有疏失罪無可逭所以爲此請者實爲一事權專責成起見並不敢稍存推諉之私 上諭臨淮一軍自攻復長淮衛之後唐訓方飭各營分屯要害南至定遠九十里北至固鎮一百二十里聲勢聯絡橫截

該逆鈔擾之路惟蒙城情形倍形危急渦河南北兩岸見已合圍知府英翰將河北各營抽調至小澗集迎頭抵拒河南官練併入城中嬰城固守姚廣武因捻匪竄豐碭地方須分兵堵剿陳國瑞已抵徐州俟軍營火藥到齊即可赴蒙援剿前諭富明阿帶精兵赴臨指日各軍齊集足可分道進攻唐訓方慮事權不一所籌不爲無見惟各率一軍分路並進責成雖專而事權未一設遇有互相援應之處仍恐觀望不前尙宜斟酌變通於各專責成之中仍能聯絡一氣方爲妥善陳國瑞見抵徐州其軍火當已到齊著吳棠唐訓方就近催令進兵迅解蒙城之圍蒙城一路著卽專歸陳國瑞勦辦所有徐宿之姚廣武等軍均聽陳國瑞調遣卽著迅速由徐前進無得遷延觀望致干重咎富明阿統帶揚營兵勇赴援臨淮何日啟行尙未據該都統奏報著卽添調各軍並前派之王

萬清等駐紮淮河北岸力顧淮北一路並督同陳國瑞之軍互相聯絡策應力解蒙圍解圍後卽會攻苗逆老巢潁壽各路曾國藩當飭蔣凝學等軍悉歸唐訓方調遣並隨時偵探賊情認真防剿聽候唐訓方指授機宜以期事權歸一呼應較靈其淮河南岸唐訓方固當獨任其責相機戰守惟該撫身膺疆寄責無旁貸富明阿等到皖俱係客兵恐於地勢賊情未能諳習唐訓方應派得力兵弁助攻以壯聲勢不得專恃援軍致有貽誤軍營積習勝不相讓敗不相救最足僨事見在淮河南北一岸賊氛富明阿到後當與唐訓方會商督飭諸軍力圖掃蕩如何路有失朝廷卽惟何路是問惟有執法從事勿謂言之不早也將此由六百里各諭令知之○予安徽陣亡參將彭朝維等祭葬世職○是月豁免山西沁州等二十八州廳縣暨甯遠等五通判所屬積欠糧租緩徵直隸

東安縣被水新舊額賦旗租蠲緩山東臨清等三十九州縣被旱
被風被雹被擾新舊額賦雜課

[The main body of the page contains multiple vertical columns of text, which are mostly illegible due to fading and the quality of the scan. The text is arranged in a traditional vertical format, reading from right to left.]

[A vertical column of text on the far left edge of the page, also mostly illegible.]

東華續錄

同治二十六

臣王先謙敬編

臣張式恭恭校

九月乙巳朔諭內閣前因穆騰阿歷次與瑛棨聯銜奏保馬德昭戰守得力嗣因多隆阿張集馨奏參馬德昭虛浮兵數穆騰阿又復會銜入奏前後自相矛盾當經降旨令穆騰阿明白回奏茲據奏馳抵西安後與瑛棨會商防剿擊退撲城賊匪未敢隨同粉飾馬德昭奉旨派援鳳翔藉詞遷延該將軍因其本有勞績且時值逆回西竄城防喫重未經奏參嗣與多隆阿等查出馬德昭虛冒兵數等情隨卽會銜具奏等語穆騰阿以專闡大員與瑛棨馬德昭同在一城於瑛棨之貽誤地方馬德昭之浮冒兵數既未能據實陳奏於先迨奉旨飭令明白回奏猶敢摭拾浮詞枝梧掩飾於

後於馬德昭奏參奏保先後自相矛盾之處仍復含糊未能明晰實屬昏憤西安將軍穆騰阿著交部議處○諭議政王軍機大臣等憚世臨奏越境擊退黔匪並髮逆闖入楚境迎剿獲勝請畱郭崑燾及朱孫詒擬卽赴陝各摺片此股髮逆係屬百戰之餘見在蓄意回竄楚南且恐與沅寶一帶餘匪句合憚世臨見令總兵趙福元暫駐洪江並令田宗營等協防沅州府城分飭王永章所部及戈鑑一軍會合防剿著卽督飭在營將士嚴密布置務將匪徒就近殲除毋得縱令他竄黔中苗匪屢次撲近涼繖均經楚軍擊卻著憚世臨督飭在防文武扼要堵截俟髮逆撲滅後卽調周洪印等軍越境赴黔會合該省兵勇埽淨逆氛以清積年邊患見在楚省軍務未平郭崑燾著准其暫畱湖南幫同該撫辦事俟全省肅清後仍遵前旨飭令該員前赴直隸交劉長佑差遣陝省軍情

緊要朱孫詒既已病痊著卽飭令迅赴多隆阿軍營毋稍遲誤將此由六百里諭令知之○命已革署甘肅提督馬德昭馳赴甘肅慶陽軍營交陝甘總督熙麟差委○丙午諭議政王軍機大臣等閻敬銘奏宋逆餘匪由直隸回竄東境見已派隊迎剿崇厚奏遵旨籌辦津郡防守事宜各一摺據閻敬銘奏該逆於二十六日由東光竄入陵縣關廂卽於是日竄入平原縣境二十七日竄至高唐州境二十八日竄至清平縣境又分零股由戴家灣偷過河西該撫已派都司楊通廉等往清平迎剿飭總兵保德由朝觀一路回擊所籌尙妥著卽督飭在事各員及文武地方官嚴密堵剿務期就地殲除勿任再行竄越其由戴家灣過河之匪距臨清堂邑均屬相近僧格林沁此次未曾拔營當可調派一軍將此畸零匪股悉數斬擒並探該逆大股已至何處卽派兵迎頭擊剿與閻敬

銘所派之兵會合夾擊此股匪眾數日之間奔突千有餘里已屬強弩之末官軍以逸待勞自不難收效旦夕恆齡蘇克金見在何處賊匪奔馳不息當是恆齡等在後追剿之故著僧格林沁仍飭跟蹤緊躡並設法分隊繞截其前會合東省之兵聚而殲旃劉長佑見在景州一帶不必深入東境仍須嚴防該匪回竄如該逆被擊回竄卽與東軍合力夾擊該匪蹤迹飄忽不常且聞其裝束與官兵無異鄉團見而不敢卽擊前次狂奔直境揚言北犯原欲引官軍盡入直境彼得乘隙回竄東省遂其勾結裹脅之謀見在東省追剿甚緊恐其另有詭謀或仍聲言北犯而乘閒突竄河南山西著僧格林沁閣敬銘設法杜其旁竄於各要隘設伏以待使其無隙可乘並著張之萬英桂督飭在防將弁實力堵禦毋令入境天津各屬防守事宜崇厚仍遵前旨嚴飭地方文武認真辦理毋

稍疏懈將此由六百里各諭令知之○賈臻奏請改勇爲兵分隸營伍命劉長佑等妥辦○丁未諭內閣沈葆楨奏假期已滿病勢增劇懇恩開缺回籍調理一摺沈葆楨自簡任江西巡撫以來察吏安民事事均臻妥協本年髮逆大股竄入江境復能督飭在事員弁兵勇力挫兇鋒見雖賊氛遠遁而一切防守布置均須該撫力爲經畫朝廷正資倚畀豈可遽請退休沈葆楨著毋庸開缺賞假四箇月在任安心調理江西巡撫卽著孫長紱護理○張之萬奏皖捻由許州西竄見分三股眾逾數萬一竄禹州登封八月初三四等日張曜率軍沿途雕剿斬殺甚夥初九日官軍馳抵嵩山據探西南窪村一帶賊眾林立張曜飭總兵保英等各率馬步馳往力勦斃賊二百餘名匪向西南紛竄我軍沿山搜殺敗匪墮巖落澗死者不計其數訊據擒賊供稱逆首張總愚大隊盤踞登封

西南之大金店尙有黑旗一股已竄河洛等語初十日張曜令各軍乘夜入險奪隘進攻並派保英等攻破箕山顧家嶺諸要隘乘銳力進直逼大金店賊巢忽山中援賊紛出參將宋徵文把總王訪同時戰歿副將敖天印一軍奪取耿樓要隘賊棄險而逃我軍乘勝逐北遂將小中廟文村諸要口同時攻奪沿途斬馘無算查點我軍陣亡哨官擬保守備千總何紹林千總黃仕祥盛繼隆武金太及勇丁五十餘名統計是日之戰擒斬匪眾千餘名其黑旗一股已於初八九等日竄至鞏縣境內圖過洛河經兵團截剿該匪向龍門東南回竄登境欲與大金店之匪合股張曜率軍擬由窪村滾營進紮逼賊出險再行鈔剿其南走襄城一股經副將孫之友等督軍追殺斃賊無數餘匪夜遁邠縣境內總兵黃得魁等帶勇截擊斃賊甚夥該匪竄向東南寶平邊境擾及葉縣裕州等

處欲由博望進窺宛郡因戒備甚嚴卽由裕境直趨賒旗店竄入唐縣境內南陽府知府傅壽彤見飭練勇馳往援剿並商同南陽鎮總兵圖塔納派兵策應其由沈邱續竄之股由西華等處竄入周口圍攻河西河南各寨經毛昶熙派參將邵春仁率兵往援該匪疾走臨潁復分股竄撲臨潁鄆城縣城均經兵團擊退頃據探報賊蹤竄近邾境臣已飛催孫之友李世玉兩軍趕緊鈔擊勿任會合前股以目前賊勢而論西路登封之股爲逆首張總愚大隊該處山境西達秦陝設該逆由此西犯疾趨潼關或久踞爲巢進窺河洛均屬可慮張曜一軍入險出險尙形不足臣見飭副將王永奎張士元兩隊就近馳赴登封會合進剿並飛調駐紮沈境之郝永剛兩隊卽日西行聽候張曜調遣其南路一股已飭南陽鎮府趕緊調營集練探蹤截剿一面飛飭孫之友李世玉星夜馳赴襄

邲一帶嚴扼竄路勿令蔓延陣亡各員籲懇 天恩飭部從優議卹 上諭議政王軍機大臣等皖捻接踵竄豫見分三股一由禹州竄登封依山踞險經張曜等揮軍奪隘匪勢不支向龍門東南回竄登境張之萬等已添派永奎等會合進剿著卽督飭張曜等滾營進紮逼賊出險再行鈔剿勿令與大金店匪股句合致辦理又形棘手其南走襄城之股經沿途兵練截殺見竄唐縣知府傅壽彤調賒旗鎮練勇往剿並商令總兵圖塔納派兵援應著卽飭令調齊兵練探蹤進剿毋任擾及宛洛一帶其由沈邱續竄之股經李世玉等剿勝馬賊又竄近邲境張之萬已飛飭孫之友李世玉等馳赴襄邲一路嚴扼竄路著卽飭令認真進剿勿令與前竄各股會合致滋延蔓西路登封股匪爲張總愚大隊該處山徑紛歧設由此西犯趨潼關秦晉二省皆將震動著多隆阿英桂張

集馨嚴飭在防文武加意防範如探聞逆匪有竄近消息卽派兵
出境會合豫省之軍合力夾擊毋任匪蹤擾及境內是爲至要唐
縣股匪距隨棗不遠恐該匪被勦狂竄闖入楚疆爲患滋大著官
文嚴樹森派隊嚴防責令地方文武各員悉心守禦毋任竄犯如
竄近楚邊卽飭在防將士出境迎勦毋存畛域之見張之萬駐軍
許州必須多發偵探悉心籌畫以期漸次掃蕩宋憬詩一股又由
直境竄回東省去豫稍遠惟匪蹤飄忽不定仍當飭令河北鎮道
晝夜嚴防其竄擾登封捻股恐其渡黃北犯尤須飭該鎮道一律
嚴防劉長佑前調之李明惠一軍如已抵豫卽著該撫截畱派令
帶隊勦賊以厚兵力在籍總兵黃得魁向在軍營尙稱勇往如能
責令帶勇專勦襄郟一路當可得力著張之萬妥籌調度毛昶熙
督辦通省團練見在匪蹤紛竄毫無阻扼著通飭各屬加意整頓

務使與官兵相輔而行以收保衛之效並嚴飭永奎等分投截擊不可稍有鬆勁袁保慶卽著令其辦理潁陳團練俾豫皖各團有所聯屬不至爲苗逆誘煽俟各賊股勦辦完竣再圖進取以牽賊勢將此由六百里諭知官文多隆阿嚴樹森英桂張之萬毛昶熙並傳諭張集馨知之○戊申李鴻章奏程學啟規蘇各軍進紮婁門外跨塘旋調水陸官兵滾營前進八月初四日至永安橋屯紮直逼城根賊由婁葑齊三門突出二萬餘人分路來撲程學啟等軍分門迎戰槍礮齊施立將賊隊壓退斬斃數百名初九日臣旋抵上海卽飭總兵陳東友等各帶礮船並咨商李朝斌酌撥太湖水師數營駛入寶帶橋一帶與陸軍會剿初十日賊匪五六萬人分門復出官軍奮勇攔擊斃賊三千餘名賊眾奪路狂奔追至護城河落水淹斃者甚夥據探僞忠王李秀城已於十一日由金陵

回蘇所帶賊黨甚眾意欲立解蘇城之圍該逆見於婁葑兩門外
堅築石壘我軍礙難猛撲必先攻克東南官塘之寶帶橋賊壘進
步方寬十六日程學啟等督率水陸各軍將寶帶橋之西石營一
座東土營三座先後奪取分軍進剿賊眾棄壘而逃遂將賊壘踏
平程學啟親督各隊分段駐扼查蘇州形勢甚固米糧甚足實與
金陵爲犄角忠逆見由金陵回救意欲護此巢穴程學啟督軍進
紮直薄城根足扼東南衝突之路寶帶橋爲水路要區蘇垣鎖鑰
茲賴官軍協力攻取該逆失其屏蔽從此進鏟附城逆壘即可設
法攻城臣又調總兵張遇春副將梁安邦知州吳毓芬等四營交
程學啟調遣以資進剿又奏八月十二日總兵郭松林親督馬步
各隊由東亭鎮節節進攻適潮逆率萬餘人憑壘抗拒官軍進逼
逆壘連開槍礮奮力勦擊賊始敗走我軍乘勝追至無錫南門外

刃傷潮逆幾爲我擒約計斃賊二三千名奪獲旗幟器械無算自東亭鎮至無錫東南兩門沿途賊壘賊卡一律踏平臣飭劉銘傳等趕緊進紮聯絡攻剿 上諭議政王軍機大臣等寶帶橋爲水陸要區見經我軍攻克則攻取蘇城已成破竹之勢著李鴻章激勵將弁節節進攻以期迅克堅城仍須穩紮穩進計出萬全不可稍涉大意至無錫一路攻剿正極得手著李鴻章迅飭劉銘傳等軍趕緊進紮與郭松林等軍聯絡聲勢爲規取無錫之計僞忠王李秀城已於八月十一日由金陵回蘇所帶賊黨甚眾意欲立解蘇城之圍見在忠逆旣回蘇郡金陵老巢勢必空虛我軍正可乘此機會迅圖攻取著曾國藩督飭曾國荃等將如何乘虛進擣圖拔堅城俾金陵蘇州之賊首尾不能兼顧庶我軍於該二城或有一處可以得手之處酌度機宜妥爲辦理將此由六百里各諭令

知之○諭李鴻章奏上海學習洋人火器見製開花礮自來火等件麤具規模必須好學深思之文員會同講求始可推行盡利查有江西候補知縣丁日昌在廣東高州軍營督辦火器業已告竣請飭催赴滬等語上海官軍刻下進攻蘇州逼城而壘正形得手所需軍火尤屬刻不容緩著毛鴻賓晏端書郭嵩燾速卽飭令丁日昌趕緊啟程赴滬督匠趨造以資攻剿毋稍遲延將此由六百里各諭令知之○諭張集馨奏楚軍回防鄖西見飭石泉等縣聯團防河並籌防省城潼關暨漢中近日軍情各摺片川匪藍二一股竄擾鎮安經多隆阿等派兵進剿圖竄山陽復爲該縣團勇截擊未能逞志著多隆阿張集馨卽飭該地方文武速行進剿並督令商州知州會合攻擊務令就地殲除毋任蔓延他處李桓所募義勝三營楚勇經官文等畱紮鄖西未能進援興安川省進援漢

南之兵見已雲集該處逆匪被剿窮蹙勢必東趨興安漢江以北
防兵甚少石泉令陸莖見飭漢陰甯陝西鄉各廳縣每處挑選壯
丁一萬名以一半畱守本邑以一半出境防剿漢江劃河爲界憑
險扼守並令楚師礮船梭巡上下辦理甚合機宜張集馨見令該
員總司其事著卽飭令西鄉等廳縣一體照辦毋許從中牽制如
有出力官紳卽著從優保獎鄖陽一帶扼要處所並著官文嚴樹
森飭令梁作楫設法嚴防毋令匪蹤東竄鄂疆整鄠道路旣通陶
茂林一軍卽著多隆阿飭令整隊前進速援鳳翔平涼府城業經
失陷並著多隆阿迅飭陶茂林一軍於鳳翔解圍後飛速行往或
另籌勁旅會同甘省各軍實力攻剿迅圖克復蘇家溝距省較近
爲羣逆屯聚之所難免不出撲省垣一切稽查奸細防守城垣均
不可稍行疏懈並著多隆阿速將十三村賊寨攻克拔取高陵以

次進攻將省城西北一帶賊巢埽除毋稍遲誤至今輸糧之從逆
村莊是否甘心抑係被逼曾否隨賊攻城戕害兵勇焚擄村莊亦
應分別良莠辦理不得概令輸糧一律聽其贖罪以致兇徒漏網
復畱餘孽潼關南岸渡船見已提歸北岸惟豫省前股捻匪屯聚
登封蓄意西竄後股捻匪復竄宛葉並恐折竄商雒多隆阿張集
馨仍當督飭潼關及商雒一帶文武加意嚴防勿稍疏忽劉蓉由
通江前赴漢郡旣據甯陝西鄉等廳縣稟報何以至今多日無入
陝消息該員擢授陝撫業已兩月至今杳無摺報亦無起程日期
實屬玩誤見在川陝諸軍俱集漢南亟須大員統率著劉蓉懍遵
前旨迅赴漢南督率諸軍力解城圍並著駱秉章速催劉蓉赴陝
毋再遲延將此由六百里諭知官文嚴樹森多隆阿駱秉章劉蓉
並傳諭張集馨知之○己酉諭議政王軍機大臣等僧格林沁奏

添派隊伍追剿宋逆股匪請飭嚴防北竄一摺宋憬詩以敗殘餘
黨晝夜狂奔乃前竄開州卽有匪首朱登豐一股接應合夥所至
遇河躡渡到處勾結土匪豕突狼奔實欲誘我官軍疲於追剿此
次回竄東境徑回堂邑地方因僧格林沁大營未動不得遂其回
踞老巢詭謀復因官軍跟追向開州一帶竄走似此亡魂窮寇一
經舒通額等各軍馬隊追及當不難卽日埽除惟是賊眾狂奔之
際必須前有攔截則後追馬隊方能及賊痛加剿洗僧格林沁以
各隊步軍追剿馬賊徒勞無益不若扼要分布以杜賊北竄所籌
甚合機宜著劉長佑卽行督飭各軍在正定東北至河間一帶滹
沱子身等河岸憑河據守嚴防北竄該處河溜甚急有險可扼僧
格林沁前調直省各軍步隊除酌留海口營弁兵四百餘名守護
礮位之外餘皆飭令回直聽劉長佑調遣務卽沿河妥爲分布一

俟賊蹤竄至卽與追賊之馬隊各軍前後夾擊共殲醜類宋逆見竄開州恐其此次詭謀欲乘我不備而蓄意北犯劉長佑以逸待勞務當加意截剿不可稍鬆河南山西兩省係該逆往來熟徑又恐該逆故作北犯之勢而意在窺伺該二省乘隙旁趨均不可不豫爲之防並著英桂仍遵前旨督飭鍾秀於平遼一帶實力籌防毋稍疏忽張之萬前奏賊竄衛境曾經河北鎮將楊長春帶隊擊剿此時更當早爲備豫仍卽懍遵前諭飭令該鎮道等隨時偵緝設防與僧格林沁派出追賊之馬隊各軍聯絡聲息豫籌堵剿毋許徒託空言致賊乘閒竄越自干罪戾李明惠一軍曾否至豫前諭張之萬於該員過豫卽行截畱以資分布其該撫前調之道員金國琛本日復准曾國藩所奏調赴皖北統帶蔣凝學等各軍保皖卽以保豫如果潁六賊不得逞豫省光商卽可無虞如金國琛

行入河南境內並著張之萬飭令速卽遵曾國藩所調迅赴皖北毋稍遷延舒通額與蘇克金等各軍何日追賊及於何處著僧格林沁迅速馳奏以慰廑念莘堂等境散匿各村敗竄步賊仍著閻敬銘督飭保德丁寶楨等分投搜捕淨絕根株毋畱餘孽直東豫省各屬地方當此賊蹤飄忽靡定均應一律聯合兵團早爲備豫何得任令賊氛所到一無阻擋並有匪徒聚眾豫爲接應著劉長佑閻敬銘等各飭所屬一體設防互相警備是爲至要將此由六百里各諭令知之○曾國藩奏金陵上方橋爲東南隅糧路賊築壘久踞七月二十日蕭慶衍等滾營進攻並用巨礮晝夜轟擊賊堅壁不出曾國荃於二十九日潛遣熊登武等繞過上方橋五里許築營以截賊後賊糾眾來撲蕭孚泗李臣典等揮軍迎戰賊始駭潰合軍追及秣陵關破十餘卡並將上方橋賊壘攻毀醜類悉

殲罕有脫者其江東橋一路爲西南要隘賊築石壘環繞木城城外隔水二道八月十一夜陳湜選銳卒數百涉流而渡潛匿壘下飛擲噴筒賊方驚駭陳必友等衝過浮橋分左右鈔擊陳湜督大隊繼進各軍奮力登壘賊惶遽失措奪路爭竄遂將眾壘一鼓下之兩處要隘既經攻克當俟上游軍事稍鬆即可圖圍金陵又奏近日軍情青陽一城賊匪圍攻已歷一月文報不通米糧久斷李榕部將鄭陽和等至距城十里之袁橋紮營旋被該逆攻陷喻吉三率三營繼進於八月二十一日攻破袁橋賊壘小有擒斬二十二日江忠義席寶田兩軍繼進將合謀力戰以解重圍青陽迤北爲銅陵縣突有另股竄入彭玉麟派在防水師一戰而卻其迤東爲涇縣賊股紛擾劉松山自甯郡督隊至涇會同守將易開俊勦賊於金村等處疊獲大勝又有花旗股匪竄犯甯國郡城劉松山

引軍回郡力戰卻之目下皖南羣盜如毛幸劉典等由徽州分道出嶺進規石埭太平二縣而臣所調鮑超一軍亦由金陵上援先赴蕪湖甯國或可力保皖南支持全局上諭金陵官軍攻克上方橋江東橋諸賊壘勦辦甚屬得手著曾國藩卽行知曾國荃督飭將士乘機攻取將城外各賊營次第掃蕩俟各路官軍會齊後再圖合圍以期攻拔堅城青陽被圍一月有餘危急萬分李榕部將鄭陽和在袁橋紮營被逆匪攻陷雖經喻吉三攻破袁橋賊壘而賊勢並未大創江忠義席寶田兩軍見已繼進著曾國藩嚴飭該提督等合謀力戰迅解城圍以拯倒懸並著曾國藩左宗棠分飭劉典王文瑞王沐等軍速由徽郡分道出嶺規復石埭太平與江忠義等軍會合夾擊將此股賊匪就地殲除毋任旁竄蔓延他處見在皖南羣盜如毛非西趨江右卽東併金陵曾國藩見調鮑

超一軍回援上游先赴蕪湖甯國著卽飭令會同該處駐守各軍併力合剿先將涇縣甯國各匪埽除淨盡再行約會池太各軍將該處賊氛悉行埽蕩以期肅清金陵後路皖北軍情緊急富明阿見帶馬步勁旅二千名力勇三百名由揚州馳赴臨淮著與唐訓方籌商合力攻剿前經諭令富明阿督同王萬清所部駐紮淮河北岸力顧淮北一路並督同陳國瑞之軍互相聯絡策應先解蒙城之圍卽會攻苗逆老巢著仍遵前旨辦理陳國瑞所部兵勇餉需火藥著吳棠懍遵前奉諭旨迅速籌給以便該總兵卽行起程赴蒙並飭姚廣武一軍歸陳國瑞調遣見在宋憬詩股匪數日之間往返馳騁千數百里該匪均係馬隊飄忽異常且係官兵裝束誠恐假冒官兵僞稱救援蒙城與苗逆合夥著富明阿吳棠唐訓方卽行知照各路軍營與地方文武各官先事豫防勿爲所誤其

淮河南岸潁壽各路仍著曾國藩飭令蔣凝學等軍悉歸唐訓方調度認真進剿不可株守一隅李世忠見已親督五千人赴臨夾淮分屯著唐訓方加意籠絡以收指臂之助見在臨淮兵力已厚應卽力圖進攻淮南各要隘以掣蒙城苗逆之勢不可畫疆自守坐失事機富明阿骹疾未痊不能乘騎著准其乘坐肩輿該都統見將所製開花礮六尊並存米一千餘石帶赴臨淮並咨明糧臺將姜堰等三處河釐提取爲添造礮位購買米石之用都與阿所奏南岸包港超瓢港陸洲等處共有逆匪三大股約二萬餘人並有賊船停泊孟河等語難保該匪非因江陰潰退無處奔逃意欲四散紛竄江陰等處被難百姓固不宜禁其北渡然匪徒之溷迹冒充亦不可不嚴行稽察臨江一帶渡口甚多豈容概行弛禁漫無防限著於衝要地方酌定何處渡口濟渡難民總以愈少愈妙

以便易於盤詰將其餘渡口概行封禁以防逆匪溷迹並著都興阿吳棠李鴻章妥議章程務於體恤難民之中仍寓防範奸宄之意仍著都興阿督飭水師嚴密梭巡毋令賊匪占踞沿江洲地致防剿又形費手將此由六百里各諭令知之○諭前因豫省將領乏人節次諭令官文嚴樹森催令金國琛赴豫差委茲據曾國藩奏稱苗逆兇熾益熾臨淮一路有都興阿二千人赴援富明阿帶兵繼進李世忠親督五千人夾淮分屯尙足自固苗逆若不得逞於臨淮則上游六安潁州固始三河尖處處喫緊周寬世成大吉蔣凝學毛有銘各守一方勢均力敵不相統屬深恐心志不齊調度乖錯查前任湖北安襄鄖荆道降補同知金國琛與成大吉等同出自李續宜部下若令調赴湘營籌剿苗逆必能勝任請飭該員改赴皖北等語皖豫邊境同以苗逆爲巨患楚軍各守一方亟

須得力將領前往統率調度埽除皖匪正以保衛豫疆著惲世臨
飭令金國琛改赴皖北責令總理周寬世等四軍營務仍往來固
始三河尖等處會辦皖豫交界勦苗事宜卽著該撫飭令金國琛
趕緊啟程毋許稍涉遷延致誤戎機將此由六百里諭令知之○
己酉予山東陣亡副都統伊興額建祠○庚戌諭議政王軍機大
臣等吳棠奏援蒙官軍到防妥籌進取並臨淮兵力厚集請特派
督辦以一事權各等語苗逆擁眾數萬全力圍攻蒙城情形危急
陳國瑞見已督隊抵宿自應趕緊進兵吳棠屬令先通蒙城餉道
穩紮穩進尙屬持重之見第蒙城爲皖北形勝之地望援孔急到
防援兵固不可冒昧輕進致挫銳氣然亦當於慎重之中圖進取
之計陳國瑞勇敢素著所部亦稱善戰見在吳棠抽調守徐之官
軍四百餘名駐浦之馬步隊五百名齊赴該總兵軍營又爲之接

濟軍食是該營聲勢漸壯可戰可守卽著飭令陳國瑞迅速拔隊
滾營前進疏通糧道立解城圍不得以待兵待餉爲詞致有貽誤
至宿西餘捻有姚廣武一軍隨時防剿當不至貽陳國瑞後顧之
憂前因臨淮援軍漸集而責成未專恐致互相觀望曾諭令富明
阿唐訓方等聯絡策應吳棠本日所稱帶兵之員素不相習擬請
特派督辦大員節制調度等語與前旨之意尙合此時富明阿馳
赴臨淮卽著懍遵前旨與唐訓方和衷共濟妥籌防剿並督飭陳
國瑞迅解蒙圍如臨軍兵力足可自守而援蒙之軍勢尙單薄著
富明阿唐訓方酌量添撥勁旅迅往助剿毋稍遲誤其陳國瑞一
軍糧餉軍火仍著吳棠源源接濟毋令缺乏將此由六百里各諭
令知之○左宗棠奏蔣益澧一軍圍攻富陽自四月以來城壘各
逆伏匿不出江西肅清後劉典引軍還歛相距漸近臣乃調康國

器所部馳赴富陽與蔣益澧合軍進剿富陽之北雞籠山以下連築賊壘十餘處地勢最爲險要必由此進攻奪其要隘斷其糧道始可制賊死命八月初七日遊擊徐文秀攻雞籠山賊壘副將楊政謨等攻倚城賊壘蔣益澧自率親兵馳往督戰該逆見官軍大至齊出猛鬪徐文秀督隊奮擊將頭層賊壘攻破該逆拌死回拒槍礮如雨官軍鼓譟大進遊擊余朝貴等繼之搶入二層賊壘賊勢不支余朝貴等復奮力衝殺斃賊百餘名將大小賊壘賊卡盡行攻破新橋出賊千餘來援亦經徐文秀等擊退遂因賊舊壘背水結營其原泊江中挖罟廣艇及對岸大小礮船連放炸彈向城轟擊城賊大震楊政謨等攻倚城大壘城賊分隊來迎蔣益澧令副將劉清望等助戰徹夜轟擊傷賊無數初八日黎明蔣益澧復親督李運榮等馳往助剿軍士勇氣百倍首先攻破賊壘一座賊

勢靡亂不敢入城竄向新橋一路總兵王月亮等督軍截殺斃賊數百名蔣益澧飭徐文秀等由雞籠山繞出新橋併力追殺遂將富陽縣城克復其新橋各壘踞逆經高連陞等分路進攻該逆出悍黨萬餘迎敵諸軍奮力攻擊立破賊壘六座殺賊數百名劉清亮等亦踏平賊壘五座殺賊七百餘名徐文秀等督勇追至合兵長驅共破賊壘二十餘座沿途斃賊不計其數生擒七百餘名奪獲旗幟器械無算查富陽一城地處上游爲杭城鎖鑰逆賊負隅死守與新橋賊壘相爲犄角此次水陸各軍晝夜環攻將城壘一律攻克實足快人心而彰天討蔣益澧當飭劉連陞等營渡江一面令劉清亮等八營駐紮新橋王月亮等兩營駐守富陽餘悉隨蔣益澧沿江而下規取杭省距杭城十五里而營水師戰船已薄杭城轟擊臣復飭康國器迅率所部由富陽直趨餘杭魏喻義

由新城出師夾擊如餘杭攻克卽調康國器所部襲取海甯州以固浙東之防據探首逆偽聽王陳炳汶往援嘉興見聞富陽攻破星夜回杭臣卽移營富陽相機調度至嚴州爲居中策應要區臣

見畱兩營及水師一營駐之並調駐遂安之副將劉明珍兩營至嚴駐紮以資鎮壓臣仍隨時兼顧上諭富陽一城爲杭城上游

鎖鑰逆賊負隅踞守經左宗棠督飭水陸各軍竭數月之力將縣城攻克並將新橋賊壘一併攻破該逆望風逃竄自應乘此聲勢規復杭城見在蔣益澧統率各營沿江而下逼杭城十五里而營左宗棠亦已移紮富陽相機調度著卽激勵諸軍鼓勇前進攻拔堅城毋失機會水師戰船業已進薄杭城著該督嚴飭該將弁等認真攻擊與陸軍相輔而行勿稍疏懈康國器已由富陽直趨餘杭魏喻義由新城出師夾擊著該督卽飭令該員等迅圖攻克以

孤杭城之勢一俟餘杭攻拔卽迅速攻取海甯州城則浙東之防可固且與蘇省規取嘉善之軍聲勢可期聯絡僞聽王見由嘉興星夜回杭嘉郡自必空虛如機有可乘李鴻章卽可檄飭將士相機乘虛進擣以牽賊勢著李鴻章酌量調遣浙省餉源以鹽務爲大宗紹所早經克復新鹺亟須整頓運司李榕見在帶兵一時未能赴任著該督遴選賢能署理俾免曠誤將此由六百里各諭令知之○以各省獲盜人員夤緣濫保仍照舊例送部引見○辛亥諭議政王軍機大臣等劉蓉奏籌辦陝西軍務次第先將大概情形馳奏一摺據稱四川派援之嚮導等營已計日均抵漢境毛震壽所統之果健營易佩紳一軍亦移紮兩河口請飭李雲麟馳抵軍營卽由西鄉會剿其竄赴鎮安之張逆一股界連孝義商州及鄖西一帶該撫已咨張集馨等防剿俟漢郡圍解卽調川防之武

東華經金 卷之二十六 十五
字定武兩軍會剿通襄沔驛路然後馳赴整屋剿辦曹逆再赴省
城商辦回匪於西省軍情剿辦次第實能瞭如指掌著卽照所議
辦理至於賊情詭譎旦夕變更該撫當隨時斟酌機宜妥籌進止
不爲遙制李雲麟一軍前據奏稱已由襄陽啟程當經諭令迅由
鄖陽赴陝解漢中之圍分兵救鎮安漢陰等處並令歸劉蓉節制
其應由何路進剿著該撫酌度機宜就近知照辦理藍二一股竄
擾鎮安業經諭令多隆阿等飭該處地方文武速行進剿鄖陽一
帶扼要處所亦諭官文等飭梁作楫一軍設法嚴防毋令匪蹤東
竄鄂疆襄沔一帶餘匪亦經諭令駱秉章派兵迅速剿辦與該撫
所陳均相脗合如賊股紛竄著飛咨川楚等省督撫迎頭合擊均
須就地殲除勿任再擾完善劉蓉受朝廷特達之知不數年間擢
膺疆寄應如何感激圖報著卽迅督所部先靖漢南以次廓清全

陝用副委任漢南一切軍情仍著隨時奏報以慰馳厯將此由六
百里諭令知之○諭晏端書黃贊湯奏高州勦賊疊勝連破逆巢
暨陽江陽春軍情並克復廣海寨城各一摺逆匪陳金缸竄踞信
宜以南山爲屏蔽該處崇岡疊嶂密菁深林從前屢次進兵多未
得手崑壽督飭卓興等激勵將士鼓勇猛攻連破南山白花塘等
處賊巢實爲數年罕有之捷可見兵勢強弱全在統領得人見在
驍賊劉超等疊次敗潰其鋒已挫從此轉戰而前可冀揜渠擣穴
毛鴻賓郭嵩燾均已啟程赴粵著於到省後督飭各軍乘勝進勦
迅奏膚功未到以前仍著晏端書會同崑壽妥籌進勦不得因已
獲勝稍涉大意陽江陽春二縣爲省城至高州水陸必經之地一
日不靖則高州之軍火餉銀終形梗阻晏端書等擬將該處各匪
先行勦除自是正辦卽著嚴飭各路官軍妥速進勦以通餉道粵

東庫款支絀兵餉不敷轉瞬毛鴻賓所募楚勇陸續到粵餉項又復增多晏端書等見已設法籌辦並著毛鴻賓郭嵩燾於抵任後實力籌畫務令餉源充裕以收士飽馬騰之效廣海寨城業經克復在逃餘匪尙多自應嚴爲搜緝惟土客互鬪本屬蠻觸相爭若辦理不得其平仍不能弭爭端而釋仇釁著毛鴻賓等督率地方官吏持平妥辦殄除首惡寬免脅從俾土客各民知畏知感庶可永消後患吳昌壽似應暫緩赴任或調往高州助剿抑令先清陽江陽春等處各匪並著該督撫斟酌妥辦將此由六百里各諭令知之○予陣亡廣東知州許錞身山東署知縣張振榮建祠○壬子諭議政王軍機大臣等劉長佑奏宋逆折回東境分股狂奔見在分籌防剿一摺宋逆由吳橋溝店堡等處折向德州邊臨鎮一帶經余承恩等跟追該匪竄至夏津分爲兩股一係宋逆自率千

人由戴家灣潛渡牯河回竄老巢一係賊目楊澱一領馬賊五六百名向高唐東北竄去經余承恩等由恩縣迎剿向東北逃走狂奔恩縣一帶又由德州東南竄向平原陵縣交界地方與僧格林沁前奏大略相同劉長佑見派遊擊蔣希夷一營駐紮河閒參將劉祺所部援剿德州吳橋一帶余承恩等分紮邯鄲成安永年曲周威縣一帶王榕吉調湯繼揚等營在館陶尖莊嚴防祝塏守禦龍王廟上下遊各口岸著劉長佑卽行督飭各軍嚴密守禦力扼該匪回竄之路遇有賊蹤竄及卽可會同跟追各軍兩面夾擊以圖聚殲豫省滑濬等縣並著劉長佑嚴飭河北鎮道扼要防守毋再被匪闖入昨據僧格林沁奏該逆竄入開州卽有匪首朱登豐率黨接應此股開州之匪是否見已回竄東境著僧格林沁劉長佑查明實力追剿余承恩等軍正由恩縣迎剿何以該逆仍得由

恩縣狂奔而去著劉長佑嚴飭該員等認真勦辦不可稍有粉飾有名無實並著僧格林沁仍遵前旨督飭各軍將此股逆匪趕緊殄滅以期肅清畿輔僧格林沁劉長佑務當戰守兼籌兩面夾攻毋得專事尾追徒勞無益宋憬詩究竟見在何處恐該逆故設疑兵分路竄突自行遁歸南捻冀逃法網亦不可不豫爲之防該親王等務當確實查明毋令逆首遠颺致墮詭謀將此由六百里各諭令知之○諭官文嚴樹森奏毫捻大股由豫竄鄂見籌勦辦並請調回梁作楫一軍駐紮鄖陽各摺片毫捻程二老坎等大股復由隨州地方擾及鍾祥縣境官文等派令副將黃勝日一營移紮鍾祥城內以資守禦並飭總兵趙克彰等水陸各軍截擊迎勦布置尙屬妥協著卽嚴督各軍迅速會合勦辦並飭黃勝日與參將蔣榮華等嚴守安陸府城保全要郡毋稍疏虞其移紮九子墩及

由應城前進之總兵梁洪勝副將王桐柏等軍力保武漢一路相機策應防剿兼施痛殲醜類此股捻匪南趨爲苗逆所嗾使此時擾及鍾祥尤恐其窺伺襄樊形勝圖與漢南藍逆等股勾結不可不爲之備著照官文等所請卽將梁作楫一軍由興安調回駐紮鄖陽以固鄂西門戶飭令與見紮襄陽之歐陽正塘所部聯絡堵剿並著多隆阿劉蓉張集馨迅速飭知遵照辦理劉蓉昨已據報由川啟程赴陝著卽星速前進懍遵疊次諭旨迅抵陝南督催川省援陝各軍與李雲麟所部力籌剿辦藍逆迅解漢中之圍毋再遷延多隆阿督辦全陝軍務仍應隨時兼顧與劉蓉聲息相通以籌全局豫省捻氛四竄潼商一帶緊接豫疆亦須早爲豫防張之萬前奏豫捻三路竄逸其由陳州以竄臨潁及自禹州擾及登封各股見在剿辦情形如何南竄葉裕一股前據奏稱飭令孫之友

等軍及飭南陽鎮府調團集練探蹤剿擊此時匪蹤已越鄂疆孫之友等曾否躡追著卽飭令嚴防回竄與鄂軍聯絡實力堵剿毋得以鄰爲壑一經驅賊出境遂爲了事自蹈軍營惡習致干咎戾將此由六百里諭知官文嚴樹森多隆阿劉蓉李雲麟張之萬並傳諭張集馨知之○諭駱秉章奏派兵防堵川北籌濟漢南軍食一摺川省援陝之師共一萬三千餘名見已陸續出境劉蓉亦已於八月十二日自省啟程取道南江進剿該逆一經官軍攻擊難保不紛竄蜀疆此時川北之防正當喫緊駱秉章見飭周達武曾紀鳳兩軍分布廣元昭化及陽平關一帶並派振武軍二千名防堵太平城口等處布置尙屬周妥著卽飭令在事文武嚴密堵截並著周達武曾紀鳳兩軍俟襄沔二處肅清後川北防務稍鬆仍著進紮漢郡聽候劉蓉調遣速解城圍所有川省撥援陝南各軍

月餉並應需糧石均著駱秉章源源接濟勿令缺乏將此由六百里諭令知之○調江忠濬爲四川布政使以馬新貽爲安徽布政使英翰爲安徽按察使

由潁州府知府遷

○癸丑諭內閣朕奉兩宮皇

太后懿旨軍興以來需餉甚鉅一切度支均從節省八旗兵丁錢糧亦暫減成開放每念及該兵丁等仰事俯育軫恤時殷亟應量加撫恤所有八旗兵丁著加恩賞給一月錢糧○諭前因山西員杜氏謀產誣節一案情罪重大疊諭愛仁等詳審定擬嗣據愛仁將原審失實各情覆訊具奏並據御史尋鑾焯奏稱該尙書等覆審此案恐有不實不盡復經派令尋鑾焯馳赴山西隨同愛仁審辦茲據愛仁奏於尋鑾焯馳抵山西後遵將此案再行覆審定擬此案山西民人員偕之妻員杜氏以員楊氏無出欲以伊子丕鏜承祧兩房屬令員楊氏之僕婦曹武氏乘該氏病故將使女春桃

所產嬰孩捏稱該氏私產身死於報官後復勸令員楊氏之幼弟
楊學孟攔請免驗該前任太谷縣知縣沈長材率行允准接署知
縣孫培金遽將員楊氏待繼之案出示准銷並有縣署簽押韓虎
臣門丁劉二卽劉成快役李泳昌從中私受謝儀過付銀兩情事
嗣員億與楊學正以該氏身死不明疑爲毒斃赴省呈控經該撫
英桂派令沈長材隨同前任太原府知府保齡等承審復以曹武
氏供出楊學正約來田車氏爲楊氏收生遂將楊學正熬審逼供
誣姦定案快役趙權書吏張冠先牛福海均各得受銀兩見經愛
仁將全案卷宗人證覆加詳審供證確鑿並稱亦已詳詢尋鑾煒
並無疑竇員楊氏實係病死而員杜氏謀產誣節洵屬無疑該原
審承審各官於此等重案並不秉公研鞫而員杜氏復以銀錢賄
賂上下交通書吏僱工通同一氣遂使該孀婦於身死後冤抑蒙

垢該革員等得受贓銀復以事屬暗昧恃無左證堅不承認似此徇私昧良實屬目無法紀除案內要犯員杜氏業經病故毋庸議外其受屬誣節之曹武氏一犯著卽發交駐防爲奴不准收贖懷疑妄控之員億著革去舉人說合過贓得受銀兩之杜惠高耀先均著革去監生王步段春善均著革去從九職銜其應得罪名及其餘案內各犯罪名均著照擬辦理李泳昌劉致和均著不准援免並不准收贖畱養趙權杜惠高耀先王步韓虎臣段春善許升楊天佑張冠先牛福海田車氏員光苑員丕孚均著不准援免田車氏並不准其收贖在逃之劉二一犯仍著嚴緝務獲究辦其始終承審此案之已革知府前任太谷縣知縣沈長材著卽發往新疆效力贖罪不准援免前署太谷縣知縣孫培金著卽行革職交該撫嚴行看管俟要證劉二一犯緝獲到案質明是否得受贓銀

再行照例辦理原審此案之候補道前任太原府知府保齡幫審之文水縣知縣黃宜之候補知縣龔衍淮均著交部嚴加議處審轉此案之巡撫兩司等均著該部查取職名照例議處至刑部司員桂返衡於此案開檢後尙未提訊遽稱員楊氏旣非毒死卽係產死請照原案辦理憑空臆斷實屬謬妄已極該尙書僅請將該員議處殊屬輕縱桂返衡著交部嚴加議處○諭議政王軍機大臣等愛仁奏陝省道路梗阻自陳患病情形各摺片前據多隆阿奏明將勝保被參案內之革員閻丕敏施鵬寶型並委員汪耀奎李連芳陸續解赴山西交愛仁審訊見在審辦若何是否卽可奏結著愛仁卽將交審各案見辦情形具奏再降諭旨將此諭令知之○吳棠奏據陳國瑞函稱八月二十四日行抵蒙境侯圩督隊赴狼山查勘形勢以紅里賊圩關繫官軍糧道派總兵郭寶昌等

軍攻破該逆第一壘賊聞風先遁乘勢襲破紅里圩追斃匪徒百餘名二十五日陳國瑞派遊擊王豹文駐紮紅里圩以堵東面竄賊一面令姚廣武帶隊往攻大宋小宋等圩陳國瑞至小澗集會合英翰等軍先將王圩攻克畱隊駐紮二十六日陳國瑞督軍攻母家圩苗黨先已遁去餘眾開門乞降時姚廣武亦攻拔小宋賊圩進圍大宋賊圩英翰一軍移紮蒙北渦河北岸陳國瑞又赴蒙城西南進攻賊壘見賊壘聯絡外掘長濠三道極其寬深遇有官軍進逼卽由圩內開放槍礮官軍屢次逼攻未能得手把總魯元林戰歿陣亡勇丁多名二十八日官軍收復渦北王圩一處進攻蒙北賊壘賊負嵎不出陳國瑞飭各隊奮勇齊進都司張學勝陣亡弁兵受傷者二百餘人揆度賊意以官軍遠道赴援利在速戰是以踞圩死守以老我師且賊勢甚眾將蒙城四面圍包官軍太

單不能自外包賊進退維谷屬臣趕提協餉以期添兵制賊等語

臣查蒙城四面賊壘求通一綫之糧道亦復不得相持日久儻城

中糧盡變生關繫大局非淺親王僧格林沁在東昌剿匪屢勝入

皖之期當不甚遠而蒙圍甚急可否仰懇 天恩飭下僧格林沁

先將礮隊撥赴皖境會同陳國瑞等軍併力援蒙該親王隊內有

開花礮位用以進攻賊壘最爲得力仍求飭令六潁臨淮各軍進

攻正陽壽州懷遠等處以分賊勢或飭唐訓方就近抽撥臨軍助

解蒙圍則官軍即可出奇進剿漸次戡除臣見派都司張保聖等

帶馬隊二百名赴蒙隨剿並切屬陳國瑞相機持重不可再損將

士致傷銳氣並屬招徠從苗各圩先散逆黨藉孤賊勢 上諭陳

國瑞所部進攻圩壘傷亡已多蒙城四面賊圍求通一綫糧道而

不可得尤慮日久變生官軍勢單不能自外包賊進攻則徒傷士

卒不進攻則無以解蒙圍吳棠以僧格林沁隊內有開花礮位用以進攻賊壘最爲得力請飭先將得力礮隊星夜撥往救援卽著僧格林沁速將在營得力炸礮派兵解赴陳國瑞等軍營合力攻擊富明阿帶領官兵馬步二千餘人赴淮前已有旨令其先解蒙圍務卽迅速前進與陳國瑞力籌進取賊勢趨重蒙城臨淮情形稍鬆著唐訓方酌量抽撥得力兵將助解蒙圍及力攻懷遠逆巢並著曾國藩仍遵前寄諭旨飭令六潁等處官軍進攻正陽壽州以分賊勢吳棠所派都司張保聖等馬隊赴蒙隨剿爲數無多陳國瑞進止機宜務須令詳度地勢相機而動不可輕率深入致墮詭謀富明阿到後兵力較充卽可妥籌進剿之方尤須先將被脅附苗各圩先行解散以孤賊黨吳棠仍將各省協餉催提源源運濟毋令缺乏黃開榜所部礮船遺失多隻著吳棠飭令設法籌購

東華經錄 同治二十一年
三
礮位修補船隻仍卽回防以資得力裴蔭標以在營將弁公然爲盜縱勇殃民可惡已極經總兵陳文勝查拏該漕督並派員前往會同將裴蔭標正法並咨明李世忠辦理甚爲允協李世忠親率所部五千人馳赴臨淮助勦苗逆如果實能效命並著曾國藩吳棠唐訓方隨時策勵與爲聯絡以盡其用吳棠摺著鈔給僧格林沁閱看將此由六百里各諭令知之○廣安徽盱眙縣學額一名○甲寅諭內閣宋憬詩以屢降屢叛之賊竄擾直東一帶地方經僧格林沁劉長佑等督軍勦洗疊有斬獲該逆以失巢窮寇豈能久延殘喘惟念宋憬詩自外生成罪在不赦其他脅從之罪或因迫於饑寒被其驅使或因家產破亡被其逼脅其罪可從末減其情尙屬可矜自今以後凡宋憬詩之夥黨內有能不甘從逆自拔來歸者朝廷悉准赦其既往之罪仍著帶兵大員及地方大吏妥

爲安插如有能將宋憬詩捆縛拴斬以獻者則非但無罪而且有
功必當予以獎勵總之朝廷所必欲誅者惟宋憬詩一人其餘被
脅之眾概可從寬務須及早歸順切勿甘心從賊自取滅亡也著
僧格林沁劉長佑閻敬銘將此旨刊刻謄黃廣爲曉諭以示朝廷
法外施仁之至意○諭議政王軍機大臣等本日呈遞僧格林沁
信函稱初二日寅刻我軍由袁莊拔隊向西南行三十餘里卽見
該逆在何莊宋寨一帶攻撲民圍當卽齊隊進剿該逆列仗迎拒
約計馬賊千餘名勢甚兇猛官軍一擁衝壓逆勢不支紛紛向西
南狂奔計追殺一百餘里至開州地方所贖敗匪尙有數百名恆
齡等仍在前追殺舒通額等齊隊繼進等語此股竄匪剿辦已經
得手不難緊躡其後一鼓剿平著僧格林沁卽行飛飭恆齡等晝
夜跟追並設法分兵繞擊毋任再行竄擾蘇克金等亦當飭令整

東華新金 卷二十一 三
隊追賊不得藉口沿途搜剿竄匿餘匪多所遲誤致干重咎宋逆以失巢狂寇到處狼奔豕突沿途裹脅之人未必盡甘心從逆然宋逆詭詐多端安知不誑騙其脅從之眾以爲歸順朝廷萬無生理使從逆者心愈堅而勢愈固爲今之計若能解散脅從使首惡之勢日孤則剿辦更易爲力本日明降諭旨一道著僧格林沁劉長佑閻敬銘於奉到後卽行刊刻謄黃徧行張貼或懸賞購綫務將宋逆殄除以靖地方將此由六百里各諭令知之○諭張之萬奏大金店股匪被剿南遁見飭追躡迎剿一摺盤踞大金店之張總愚大股恃眾阻險經張曜督飭馬步各隊奮力攻剿該匪棄險狂奔張曜拔隊由汝州一路追躡張之萬見調永奎馬隊由葉裕繞出賊前並飭王文行勇隊取道襄城遏賊東竄著卽嚴飭諸軍前截後追乘該匪喘息未定盡力剿洗並檄飭南陽鎮總兵知府

督率兵團遏賊奔軼之路毋得稍有疏虞其李大箇子股匪由永夏之交突竄會亭一帶雖經毛昶熙督飭成景等擊退惟蘭考睢杞之間無險可扼難保不乘我不備率眾西趨仍著張之萬毛昶熙檄飭各營及地方文武嚴密防範不得稍有鬆懈貽誤事機尹嘉賓徐連陞克復高寨而擒首秦宣等竄入沈阜邊界之李王兩寨並襲破劉坤圩以爲犄角之勢亟宜乘勝殄滅肅清疆圉著張之萬等飭令尹嘉賓等會同地方團勇迅將王李等寨攻拔殲擒秦宣各逆期於盡絕根株張之萬另片奏李明惠一軍由皖赴汴見已遵旨催令北渡馳赴直省等語著劉長佑查明該總兵行抵何處飭令會同河北鎮道及直省派出之將領等四面兜剿務將此股賊匪盡行殄滅毋令乘閒他竄將此由六百里各諭令知之

○諭張集馨奏漢中城固相繼失陷一摺據稱川援八軍暨果健

等營進攻油坊街將士深入致被包鈔傷亡軍士遺失器械甚多退至青石關等處屯紮賊匪遂於八月二十日攻陷漢中府城二十三日復陷城固見在分別咨行妥籌堵禦並自請議處等語漢中被圍日久堅守待援張由庚等軍前既遲延不進迨進屯雲峰等要隘復不能慎重進剿致軍聲大挫郡城失陷實屬貽誤戎機劉蓉已由南江啟程著卽星夜前進督率漢南諸軍相機剿辦一面嚴飭毛震壽等招集潰敗兵勇繞赴西鄉防堵北面李雲麟將抵山陽卽著取道興安迎頭截擊俾免藍逆與漢郡匪徒勾結爲患梁作楫一軍業經楚省調回興安一帶空虛可慮見在城固礮船盡爲賊擄若沿江而下其勢更熾知府周有全所帶礮船自應畱泊茶鎮著官文嚴樹森妥籌辦理其鄖陽所屬地方並著該督撫嚴密防範以備不虞周達武曾紀鳳等營分布廣元等處距漢

中尙不甚遠著駱秉章飭令該總兵等以剿爲防毋事株守多隆
阿已將臨潼十三村攻克進師塔底剿辦正當得手能否分兵策
應並著該將軍妥籌兼顧石泉首當賊衝子午谷尤關緊要多隆
阿務當與張集馨選派勁旅前往擇要扼剿並飭令該處鄉團協
同堵禦毋稍疏虞張集馨所奏旗綠各營兵丁饑疲已久逃亡滋
多與前奏裁汰訓練及聲勢甚壯之語自相矛盾該署撫前奏石
泉等州縣每邑集團萬人密布漢江北岸興安一帶可保無虞此
次又據陸埜等稟輒稱西北勢甚空虛可見該署撫從前奏報徒
事鋪張著傳旨申飭至此次漢中失守情形摺內聲敘未詳並著
劉蓉張集馨查明據實詳細具奏將此由六百里加緊諭知官文
多隆阿駱秉章嚴樹森劉蓉李雲麟並傳諭張集馨知之○命步
軍統領等衙門嚴拏京畿聯盟聚眾匪犯○慶昫奏甯夏回匪具

呈悔罪命妥馭之○予陝西陣亡遊擊梁仕紳殉難訓導葉兆蘭
祭葬世職○予湖北陣亡道員王壽同建祠子恩晉等附祀○以
陝西漢中城固府縣兩城失陷革道員張由庚總兵官朱桂秋職
仍畱營署巡撫張集馨布政使毛震壽等分別議處嚴議○乙卯
諭議政王軍機大臣等多隆阿奏收復高陵縣城涇河池北一律
肅清及攻拔永樂店等處賊巢各摺片見在軍威大振該逆自必
聞風膽落亟宜乘勝進攻以收破竹之效著多隆阿督飭諸軍移
營前進節節掃蕩迅將咸陽池西乾邠等處賊巢削平並嚴杜該
匪往西北奔竄之路期於聚而殲旃廓清全陝以副委任馬陞一
軍曾否馳抵咸陽如敢任意遷延卽著從嚴參辦鳳翔被圍已久
望援急切若赴救再遲恐蹈漢中覆轍該大臣當嚴飭陶茂林速
將曹逆殄除剋日直達鳳翔以拯倒懸之急多隆阿亦當親督大

軍由高陵節節前進爲之聲援漢中失守以後賊勢若何潰散兵
勇能否招集成軍仍著該大臣速飭毛震壽就見有兵力扼要堵
禦毋令再行竄擾完善該處兵將無所統屬事權不一多隆阿仍
當妥籌兼顧其子午谷一帶爲省垣門戶關繫甚重著督同張集
馨豫爲布置毋稍疏虞洛陽捻匪雖由東南竄去惟該逆匪奔突
靡定且張總愚一股勢甚剽悍潼商等處防務未可稍鬆如有西
竄信息卽速撥勁旅前來截剿毋稍大意將此由六百里諭令知
之○諭張凱嵩奏剿擊東西兩省股匪籌辦容岑軍務情形暨嚴
防李逆竄越邊境各摺片范逆盤踞容岑負嵎自固經官軍移營
進逼勢漸窮蹙遂以重賂招致信宜賊酋鄭金等由南渡趨援益
以附近土匪眾逾二萬經蔣澤春等疊擊獲勝而兵力尙單未能
大挫賊鋒著張凱嵩督飭該道員力督兵練迅將信宜援賊擊退

埽平附近土匪趕緊規取縣城爲擣穴揜渠之計見在高州軍務大有起色著張凱嵩咨會崑壽等同時進取以分賊勢覃塘首逆黃三率黨踞伏平天寨地方並分黨上竄橫州業經劉坤一分投圍剿卽著飭令該藩司分派將士實力進攻以期揜斬首惡殲除醜類石逆餘黨李幅猷竄入湖南麻陽縣境榆市地方恐其仍循熟徑回竄粵省自應分路嚴防以免竄越著張凱嵩咨會蕭榮芳偵探賊蹤扼要堵截並檄飭各該地方文武員弁厚集團練實力防堵毋稍疏虞將此由五百里諭令知之○丙辰以覆奏失實革將軍穆騰阿職賞副都統銜授爲巴里坤領隊大臣○丁巳諭議政王軍機大臣等本日議政王軍機大臣呈覽僧格林沁信函內稱宋憬詩敗竄至張秋鎮駛過黃河逃走官軍追剿另股馬賊於廣平屬境各情形與閻敬銘所陳大略相同逆賊宋憬詩分遣其

黨竄踞於運河東西直東各境牽掣官軍而自率死黨由張秋搶船駛過黃河逃遁此賊亡魂漏刃帶領不過數十人當亦無難擒拏就獲惟賊蹤詭異猶恐所至潛行煽結餘燼復然卽著閻敬銘嚴飭保德吳樹森等緊躡跟追使賊不得喘息並飛飭東阿山南各地方四面兜捕毋任遠颺僧格林沁亦卽飭國瑞就近自鄒縣酌派馬隊馳往肥城東平一帶探蹤搜剿如果宋逆確由此路遁走非欲於兗沂等處句串教匪餘黨卽圖竄越豫境與各捻股結連及投入苗沛霖夥內以爲藏身之固宋逆見在棄舟翻山去當不遠務須跟蹤設法購綫拏獲以絕後患東阿陽穀與曹屬毗連爲從前賊擾豫東熟徑著張之萬嚴飭所屬於曹考等處交界沿河各地面嚴密截拏以防該逆乘閒竄越見在運河東西兩岸賊首楊澱一朱登豐各帶股匪竄擾著劉長佑閻敬銘嚴督所部務

將各該股匪就地殲除僧格林沁函內聲稱大兵所追係朱登豐
一股如果蘇克金等馬隊緊躡其後劉長佑見駐衡水督率諸軍
迎頭攔擊並催令李明惠之軍由河北前進與蘇克金等馬軍聯
絡兜剿諒能聚殲不至再虞紛竄其盤踞運河以北之楊灘一夥
黨僅數百名務即趕緊殲除毋使再行滋蔓著閻敬銘催督各軍
劉長佑分飭所部與東省之軍互相策應迅速辦理至宋憬詩過
河逃走既未的實尤恐賊計狡譎聲言棄眾南竄而仍潛伏近處
或仍在賊股內另作詭圖均屬不可不防諒該大臣督撫等必能
計及閻敬銘另片奏平毀莘縣所屬延家營教匪巢穴首夥擒戮
等語直東各境似此伏莽恐復不少著劉長佑閻敬銘隨時督令
帶兵文武及各地方妥籌辦理將此由六百里各諭令知之○諭
唐訓方奏陳國瑞攻克王圩等處各情形一摺該逆併力圍攻蒙

城志在必得陳國瑞兵力較單精銳被傷較多恐未能制賊死命
富明阿督率所部計已行抵臨淮著迅遵前旨帶兵馳赴蒙城督
同陳國瑞並姚廣武英翰各軍疏通糧道力解城圍以固大局仍
須審察路徑形勢謀定後動不可稍有疏失並著吳棠飭令姚廣
武與陳國瑞聯絡聲勢合力攻剿以厚兵力毋得退守宿西各不
相顧唐訓方見飭王萬清等進紮淮北洪家圩並令王才秀何紹
彩等軍分紮南北兩岸規取小蚌埠等處攻賊必救圖牽逆勢又
令克蒙額等軍於渦北一帶馳驟雕剿以亂賊志能否掣動蒙城
逆眾回顧懷遠尙無把握此時蒙邑危在呼吸自當先聚全力以
解倒懸臨淮見在兵力較厚如富明阿兵力不敷剿辦卽著唐訓
方抽撥兵將助解蒙圍本日據閩敬銘奏宋憬詩股匪被剿窮蹙
翻山奔逸此股逆匪係官兵裝束風聞有宋逆在內或乘閒南竄

東華錄卷之二十六
淮徐或竄赴皖北句結苗逆均未可定吳棠唐訓方務當督飭地方文武嚴密稽查實力巡緝如遇該匪竄至卽行悉數殲擒勿稍疏縱將此由六百里各諭令知之○己未諭議政王軍機大臣等富明阿奏到臨日期並遵旨力顧淮北一摺富明阿見已督兵行抵臨淮與唐訓方會商擬赴長淮衛一帶查勘地勢駐紮前敵先將附近要隘賊營賊圩妥爲勦撫再行相機進取所籌尙屬周密著懷遵前旨督同王萬清等軍迅將渦河懷遠一帶賊營剋期掃蕩與陳國瑞聯爲一氣俾聲勢可壯力保要區唐訓方仍派得力兵弁隨同富明阿前往攻勦庶客兵得有鄉導方不至貽誤戎機至淮南北賊營賊圩被苗逼脅者居多臨以大兵當知畏懼如其歸誠效順卽須乘機招致以孤苗逆之勢富明阿致議政王等信函所稱苗沛霖黨與眾多必須設法解散勦撫兼施方可較有把

握及臨淮各營兵餉放款須歸畫一等語均係實在情形卽著與唐訓方酌度情形妥籌辦理另片奏行抵盱眙該邑士民環遞稟呈請畱知縣李金庚暫緩調任等語盱眙屢遭兵燹民不聊生有此深得民心之地方官自應仍畱該處以順輿情著唐訓方酌覈辦理將此由六百里各諭令知之○庚申諭議政王軍機大臣等劉長佑奏敗賊窮竄分合靡常經兵團截擊南奔兼籌防剿及催提李明惠一軍前進兜剿各摺片所陳賊分兩股東西竄擾於直東各境並擾及河南滑濬等縣地方東路股匪據稱係楊澱一而於西路股匪未據聲稱賊首何人是否卽朱登豐一股所稱都司陳定邦等擒獲賊供宋憬詩已於開州太平莊率黨百餘人乘船遁逸與前日僧格林沁信函閻敬銘奏報內所稱宋逆自張秋鎮下駛棄船翻山帶領數十人逃走等語又復小異殊恐獲賊所供

均非確實該逆狡計故爲聲揚棄眾逃走而實則仍在賊股內或別圖竄擾均屬不可不防各股賊竄分合之處摺中聲敘亦尙多未明晰嗣後務須將何股賊首何人竄由何路一一偵探確實分別另單簡明開載方能一目了然僧格林沁前稱大軍所追係朱登豐一股此次劉長佑亦稱西路股匪屢經恆齡等馬隊追及鉅鹿等境見在此股北竄定州復由新樂回竄橐城著僧格林沁嚴飭恆齡蘇克金等馬隊迅卽探蹤追勦毋再遷延劉長佑督令直省各軍及地方文武嚴扼北竄之路並豫備迎頭截擊與恆齡等馬隊會合夾攻盡殲醜類橐城地近晉邊前經疊諭英桂於平遼一帶嚴防竄越著卽飭令鍾秀嚴督所部兵勇實力設防以保完區該省防兵頗單直省諸軍果能前截後追賊不得越獲鹿井陘自可無虞犯及晉疆劉長佑見駐滿城卽分飭諸軍妥籌兼顧其

分股零星餘匪向濮州竄去者僅有四五十人該地方文武實力
捕拏即可全數殲擒著劉長佑飭令所屬認真辦理楊澱一一股
由棗強南竄見又已至何處並著劉長佑閻敬銘各督直東兩省
各軍聯絡兜剿務將敗殘餘匪剋日殄除毋許遺孽復行滋蔓賊
蹤竄至滑濬等境河北鎮道何以均未在防楊長春遇賊於張官
屯何以未及接仗屢經諭令張之萬督飭該鎮道等嚴密設防究
係如何辦理著再行申諭該撫嚴飭該防文武痛加振刷毋再玩
延致干咎戾李明惠一軍著劉長佑再行提催或卽飭令駐紮豫
省要路與直省官軍會合夾擊毋致與賊相左宋憬詩究係逃往
何處有無另作詭圖著該大臣督撫等嚴切確查隨時具奏將此
由六百里各諭令知之○麟興奏俄人在伊犁卡外屢次撲犯官
兵營盤均經我兵擊退見仍飭坐卡侍衛實力偵探報聞○辛酉

諭內閣多隆阿奏請將發遣大員暫畱軍營效力等語已革都察院左副都御史王履謙雖係在籍幫辦團練紳士惟前據瑞昌王有齡密摺稱其與地方官種種掣肘以致貽誤全浙軍務瑞昌等並有死不瞑目之語其罪已無可逭且於紹興失守後倉皇遠遁又復飾詞諉罪前經降旨將該革員發往新疆效力贖罪已屬法外之仁該革員見在行抵陝西豈得藉口道途梗阻希冀逗遛多隆阿請將該革員暫畱軍營之處著不准行○諭議政王軍機大臣等多隆阿奏官軍疊破賊巢大獲全勝見仍督軍西進並陶茂林由郿縣進剿情形各摺片逆回由渭河至涇河綿亘十餘里排隊抗拒經多隆阿親督各營分左右兩路進攻將蘇家溝渭城賊巢先後攻破渭城餘匪奪路奔逸者馬賊不過五六百人步賊不過一千餘人此時賊勢窮蹙難保不竄擾近省一帶以圖牽掣大

軍之勢著張集馨會同德興阿嚴密防範相機截剿雷正綰統帶所部各營仍由涇陽渡河曹克忠見赴咸陽卽著該署提督等擇要駐紮力扼該逆西竄之路其咸陽之白起營馬家埠賊巢及醴泉邠乾等賊黨著多隆阿節節進剿以期迅就肅清派援鳳翔之陶茂林一軍由省取道盩鄠郿縣一帶前進沿途遇有賊匪經該總兵整隊截殺屢破賊壘見在槐芽鎮至郿縣四十里尙有餘逆肆擾著卽飭令陶茂林統率所部乘勝進攻埽除零匪疏通糧路俾官軍暢行無滯得以速抵鳳翔庶可力解重圍鳳郡望援甚急多隆阿嚴飭該總兵趕緊前進毋得稍涉遷延正在寄諭閒據穆騰阿奏訓練旗兵及防守出力並應行遣撤各員請分別辦理各摺片所稱挑選精壯旗民二千名時加操演各事宜係西安將軍應辦之事著多隆阿卽飭管帶各員勤加訓練以備防剿其所請

各員獎勵等情並著多隆阿覆加查覈如果實有勞績再行奏請
獎敘穆騰阿原摺片著鈔給多隆阿閱看王履謙雖係在籍辦團
紳士惟種種貽誤取巧厥咎甚重本日已明降諭旨不准畱營該
大臣嗣後遇有似此獲咎僨事之員斷不可輕率奏畱致啟僥倖
趨避之漸前據多隆阿節次奏請將勝保案內閻丕敏施鵬寶型
汪耀奎等解交愛仁等審訊均經奉旨允准除閻丕敏施鵬二員
愛仁欲俟赴陝查辦外其實型一員何以本日據愛仁奏稱並未
奉旨交訊豈該大臣未將奏准奉旨之件鈔錄行知此後又何以
不將該革員解晉汪耀奎一員亦何以至今尙未解晉卷宗亦未
移交此等奉旨交審要證辦理何以如此參差遲誤著多隆阿查
明覆奏將此由六百里諭知多隆阿雷正綰並傳諭張集馨知之
○壬戌命劉長佑嚴防畿南騎馬賊匪○癸亥曾國藩奏逆匪十

數萬眾竄撲青陽縣城四面築壘圍逼八月初八日李榕督率所部由洪山口乘夜攻破袁橋賊卡礮划銜尾而上十六日派鄭陽和陳由立各將三百人進紮袁橋守城將士望見援兵出隊應之賊眾兵單城圍仍未能解十八二十一等日喻吉三喻俊明江忠義席寶田水陸各軍先後進紮徐家村石墨鋪等處軍聲一振二十四日席寶田由五溪橋踰嶺攻破賊卡逆匪驚潰適彭玉麟來自池州周歷形勢商令江忠義率八營出董家村山後爲攻卡正兵喻吉三率三營出陳家村後爲鈔襲之兵李榕率師會於董家村口爲接應之兵並以喻俊明柳壽田水師分進夾山洪由兩口專攻大小賊壘爲陸師依護之兵八月二十七日水陸大舉江忠義親督黃仁遺等行近董家村從山後榛莽中揮隊緣巖而上江忠義鈔上巖腰斬賊無算徐德生躍過濠溝撲卡直入喻吉三涉

水而前會合黃仁遺等擊退援賊移軍轉攻賊壘相持逾時堵逆
突糾大股數萬環布壘外圖鈔我軍後路江忠義揮軍直前縱橫
盪決賊遂大潰守城之軍自內擊出會合援軍悉埽賊巢直抵城
根青陽之圍立解計平一百三十餘壘殲擒實逾萬人餘賊遁歸
石埭一路查青陽一城逆賊以全力爭此要區意將大擾皖南掣
我金陵兵勢幸托 聖主威福諸將士內守外援歷三十餘日卒
能拔出重險力保危城實屬有裨大局又奏近日軍情大江南岸
青陽解圍後太平石埭旌德甯國四縣尙爲賊踞劉典等軍正擬
由徽州出嶺會剿適因太平之賊竄入箬嶺延擾許村石門一帶
雖經劉典唐義訓擊退而浙江富陽新復左宗棠札調劉典回浙
該臬司去後徽州防兵單弱勢難再圖嶺外見令江忠義席寶田
等分兵兩路進攻石埭太平等縣惟該數軍轉戰數月尙多嬰疾

未愈朱品隆亦因大病過久請假回籍調理鮑超一軍已至南陵擬先令搜剿新河莊等處圩賊由建平直達東壩其甯國守將劉松山涇縣守將易開俊自八月初九十一等日大捷後十七日賊圍甯國府劉松山力戰卻之二十二日賊至廟埠又卻之而易開俊亦於八月二十四九月初三日先後破賊於涇縣之茶坑平垣等處但求將皖南各股悉數驅除東接浙師之氣北絕金陵之援則事機漸順矣 上諭議政王軍機大臣等青陽雖已解圍而太平石埭旌德甯國四縣尙爲賊踞徽郡防務仍未可稍鬆左宗棠見因富陽新復札調劉典回浙想係因徽州防兵較前單弱勢不能出嶺會剿惟徽郡所屬地方爲江浙兩省屏蔽設或復被竄擾則剿辦又重煩兵力左宗棠見在駐軍富陽距徽防稍遠但關繫浙師後路亟須妥籌兼顧仍著左宗棠隨時策應與皖南諸軍聯

絡聲勢迅埽妖氛毋稍大意太平石埭旌德甯國四縣城於何時失陷見在是否均淪於賊著曾國藩查明具奏江忠義席寶田各軍業經曾國藩分飭進攻石太等縣見今秋氣已深軍營疾疫當已盡痊著該大臣嚴飭帶兵員弁激勵軍士鼓勇前進會同鮑超一軍將皖南被陷各城次第攻克期於直達東壩會師金陵或進取廣德爲蘇浙各軍後路援應以收聚殲之效朱品隆因病請假回籍曾否定有日期該總兵平日帶兵得力一俟假期將滿卽當催其迅速來營毋得似張運蘭之一經回楚遂不回皖也陳國瑞進援蒙城疊破賊圩近復諭令富明阿相機援剿兵力漸厚蒙城當可解圍苗黨倘貫金句結醜類分竄擄掠據曾國藩奏稱不至遽謀深入但該逆詭詐多端聲東擊西是其慣技仍著該大臣檄飭蔣凝學等以剿爲防俾何紹彩蚌埠之師得以乘勢進攻該逆

應援不暇則勦辦自可得手諒該大臣必能統籌全局毋誤事機將此由六百里各諭令知之○諭李雲麟奏兵抵鄖西與賊逼近探聞漢中失守見籌防勦各情形一摺藍逆句結回逆分擾楚陝交界之湖北口係在何縣地方句結何路回匪約計賊數多寡李雲麟諒已督軍迎勦軍情賊勢均著官文等隨時馳奏李雲麟援勦遲延以致漢中城固相繼失陷咎無可辭所請嚴議之處著加恩改爲交部議處該京堂卽當激勵部將將鎮安股匪痛加勦除毋任闌入楚境仍迅卽取道興安節節進勦隨時與劉蓉會商妥辦無稍大意周有全礮船前經諭令畱泊茶鎮該京堂復派張殿甲率該營水師由鄖陽上駛卽著飭令認真防勦梁作楫一軍前經官文等調駐鄖陽固鄂西門戶係在漢中等城未失之先見在漢中城固不守儻該逆乘勢下竄興安空虛甚屬可慮李雲麟請

令梁作楫分凱字三營駐興安親統兩營紮茶鎮並調度兩營水師嚴行防禦著官文嚴樹森卽飭該道員力顧興安毋庸退紮鄖陽以資控扼如鎮安賊眾李雲麟兵力不敷仍著官文等妥籌調派以壯聲援劉蓉諒已由川入陝著懍遵前旨星速前進嚴飭毛震壽等繞赴西鄉防堵北面並督飭張由庚等力圖規復郡縣以贖前愆興安爲楚陝門戶其地險峻易守該撫當督飭地方文武及楚省援軍極力固守以勤爲防勿使再有疏失李雲麟一軍勦辦鎮安股匪之後應由何路會勦著隨時知照辦理川中援陝之師前因統率無人號令不一致有挫敗該撫到後務當申明禁令一新壁壘自能所向有功不負朝廷破格擢用之意勉之將此由六百里各諭令知之○甲子諭議政王軍機大臣等劉長佑自方順橋馳奏賊股竄至清風店爲官軍攔截復由新樂橐城渡滹沱

河南竄之後此兩日來未據續報軍情見在風聞有劉長佑帶兵前赴易州之信未知是否確實該督刻下帶兵究係駐紮何處其前由臺城渡滹沱河南竄之賊復竄何所各路官軍前截後追勦辦如何著劉長佑卽將詳細情形迅速馳奏易州地方與紫荆關倒馬關切近均可直達晉省該處毫無豫備尤應妥爲防範卽著劉長佑嚴加堵禦毋稍疏忽晉省所屬與易州一帶亦多毗連並著英桂妥籌兼顧隨時偵探賊蹤毋任匪黨乘閒竄擾劉長佑前奏此股賊匪敗殘餘黨不過數百人如果官軍前後夾擊無難聚殲恆齡蘇克金等馬隊是否前後追勦著劉長佑飛檄嚴催並著僧格林沁飭令與直省各軍聯絡兜勦迅圖蕝事毋得遷延觀望致該逆肆行鋌走到處誘煽又成燎原之勢王榕吉見在駐紮何處勦辦何路近聞其帶兵甚不得力劉長佑前次摺報稱其在館

陶尖莊一帶防剿嗣後並未提及該員帶兵剿賊情形著該督卽行飭知該員令其督率官軍與恆齡等馬隊實力剿賊毋得遠駐無賊之地自干罪戾如實意存觀望不聽調遣卽著劉長佑嚴行參奏至直省帶兵各員有不能得力者著劉長佑一併嚴參懲辦該督於治軍馭將一節亦不得一味寬厚致將玩兵疲賊勢永無了期也將此由六百里各諭令知之○諭富明阿奏會商長淮南北全局妥籌戰守並抽兵赴蒙援應一摺見在李世忠派兵助剿富明阿等正可迎機激勵妥爲駕馭作其忠勇之氣俾得及時自效而官軍得此勁旅亦可聯絡聲勢藉資攻剿著卽飭令李世忠勦辦南岸之賊以專責成富明阿見由北岸進攻所派前敵各軍卽著統歸富明阿調遣唐訓方兼顧南北兩岸後路並著隨時偵探何路緊急卽由何路策應毋得稍有疏虞蒙城日形危急城圍

迄今未解亟應設法拯救以支危局著卽嚴飭派出之總兵宋慶帶領所部迅速馳援富明阿卽督率各軍繼進會合陳國瑞等援蒙之軍力解重圍毋得遷延觀望致誤戎機正在寄諭聞據富明阿奏遵旨撥兵援蒙親赴蚌埠察看地勢卽移營前進並擬勦撫懷遠賊圩各摺片見在該將軍親赴長淮衛卽著相機進取與陳國瑞等軍聯絡一氣以杜聲援至應如何將懷遠一帶賊營賊圩分別勦撫以牽圍蒙賊勢之處並著富明阿妥籌布置將此由六百里各諭令知之○諭憚世臨奏髮逆搶渡沅河竄陷會同綏甯追擊防堵情形一摺逆首李幅猷率黨由浦市竄向芷江黔陽一帶奪簞爭渡猝陷會同縣城經官軍追至將城池攻克賊復竄陷綏甯官兵跟蹤追至該逆遂竄長安堡青林界憚世臨見飭周洪印戈鑑等扼駐靖綏以防回竄令陳士杰熊宗洛水陸各營防堵

永州等處趙福元等諸軍由武岡新甯至東安一帶沿途探剿並
畱張運蘭等入粵之師先在郴宜樂安暫駐以防該逆東竄江省
惟此股賊數尙不下三四萬人每以尾股牽掣追兵而前股則乘
虛狂奔勢甚剽疾此次官軍雖於托口及會同縣城鳳陽坪等處
斃賊各千餘名均已勢成尾追於大股賊勢無損惲世臨務當分
飭各軍迎頭攔剿截其去路以便痛加掃蕩毋得徒事跟追致令
賊蹤任意蔓延擾及鄰省江西爲皖浙金陵諸軍後路東南大局
最關緊要見在江忠義李榕諸軍已由九江進剿池州所屬之青
陽等處劉典一軍前已由江西回駐徽郡見復經左宗棠調回浙
省饒九兩郡防兵勢已較單設李幅猷一股再由楚南竄入江境
恐東西兩面防剿卽有兼顧不遑之勢著惲世臨嚴督在事文武
實力堵剿就地殲除毋得縱令東竄並著沈葆楨選派得力將士

鼓勵鄉團扼要堵截勿令賊蹤擾及邊境是爲至要綏甯地接融
懷兼可東趨永甯等處著張凱嵩速撥兵勇分扼龍勝永甯及興
安金州灌陽等處以防賊匪竄入並與楚軍互相聯絡務期迅掃
逆氛不可稍分畛域將此由六百里各諭令知之○諭前據多隆
阿奏報官軍疊破蘇家溝渭城等賊巢當經寄諭該將軍等節節
進攻張集馨等嚴防渭城餘匪竄擾近省一帶茲據穆騰阿等奏
攻克馬家堡白起營要隘等情形諒多隆阿奏報當亦在途咸陽
境地廓清醴邠一帶更可乘機進剿雷正綰攻克塔底等賊之後
自可與多隆阿會合務將陝省西路迅速掃蕩盡殄逆氛曹克忠
之軍著卽准其回駐近省以顧根本或分兵一二營會同福兆調
集鄉團前往商南將藍二逆股迅籌撲滅兼顧潼關門戶以防豫
捻乘閒窺竄著多隆阿妥籌辦理潼關商雒地方均極扼要見在

豫省捻股竄及河洛藍逆尙踞鎮安潼關東南兩面同爲喫重多
隆阿務遵疊次諭旨妥籌備禦毋稍疏虞曹克忠一軍旣駐近省
其子午谷要口卽應責令隨時嚴備漢中逆匪下竄以固省防其
陶茂林之軍沿途轉戰將郿縣柿林及槐衙鎮等賊壘一併攻克
著卽懷遵前旨飛催前進由扶風岐山直趨鳳翔力解城圍毋稍
遲滯漢中城固失守情形據張集馨所奏何以毛震壽與川將所
稟互爲歧異究竟該城是否爲賊所踞漢郡人民曾否潰圍而出
盧又熊何以開門出走見往何處沔縣文武收復城池是否確實
劉蓉由川入陝計已行抵漢南著將漢中城固被賊確實情形迅
速查奏並懷遵疊次諭旨統率各軍速籌進剿之方將漢郡等城
早圖攻克洋縣等賊痛加剿創以殄逆氛藍逆尙踞鎮安李雲麟
前奏擬將此股先爲掃除以期次第進剿著卽迅速進兵官文等

飭令梁作楫所部固守楚邊卽與李雲麟進剿之軍相爲策應石
逆中旗一股竄及略陽境地經代理知縣劉希寬督團擊走旣從
白水江一路將入甘省地界該省兵力更單豈容悍賊再行紛擾
並著劉蓉李雲麟力籌兼顧毋任賊氛延及甘省張集馨另摺奏
整頓撫標三營籌畫津貼銀兩招募缺額以實營伍各節卽著照
所議辦理至各省舉行團練及堅壁清野之法歷經奉有諭旨諄
諄訓誡該署撫所請通飭陝省遵行之處著毋庸再降諭旨卽由
張集馨遵查歷屆所頒諭旨條款認真舉辦惟當慎選賢能官吏
督率紳民悉心講求自能收守望相助之益無俟紛紜條教爲也
雷正綰督兵赴甘軍餉甚爲緊要仍著張集馨督飭藩司設法籌
撥源源接濟毋令缺乏將此由六百里諭知官文嚴樹森多隆阿
劉蓉李雲麟並傳諭張集馨知之○諭多隆阿奏陝省軍務大有

就緒見飭雷正綰統帶十營赴甘並嚴防潼商及自陳病狀各摺片陝省軍務漸就廓清該大臣見在撥足十營發給餉銀軍火令雷正綰統帶由醴泉一路取道直赴固原其陶茂林一軍俟鳳郡解圍卽由汧陽隴州一帶節節進取與雷正綰互爲聲援足見該大臣不分畛域實能通盤籌畫顧全大局該省平涼固原先後失陷待援甚急卽著該大臣飭令雷正綰迅統十營由醴泉直趨固原與該省之兵會合夾擊力圖克復雷正綰並准其徑用木質關防與熙麟聯銜奏事如有緊要軍情不及咨會之處並著卽行單銜馳奏以重軍務陶茂林一軍著俟鳳郡解圍各屬零匪肅清後該大臣卽飭由汧隴進取與雷正綰聯絡策應甘省得此重兵聲威旣壯固原平涼不難剋期恢復熙麟惟當飭令調到各軍與陝省援師合力痛加剿洗雷正綰援甘之師去陝日遠所有一應糧

餉卽著熙麟由甘省就近設立糧臺一面迅速知照恩麟將該營糧餉源源接濟如甘省或有緩不濟急之處仍著多隆阿行知張集馨兼籌接濟毋得稍分畛域以期士飽馬騰多隆阿數月以來力疾督軍近復勢益增劇覽該大臣所陳病狀塵繫殊深所稱賊氛未靖國事方殷不敢以病軀自懈具見忠忱懇款見在乾邠長武醴泉扶風等處之賊該大臣業經分兵四路掃蕩官軍乘破竹之勢剿敗殘之匪自無難一鼓蕩平該大臣籌定機宜飭令各軍分投勦辦卽可酌量回駐省垣居中調度以便安心調理速去沈疴用副朝廷眷倚之意將此由六百里各諭令知之○予湖南殉難知縣鄧爾昌陝西陣亡知縣劉希寬等祭葬世職○賞五城貧民棉衣銀○乙丑李鴻章奏各營規取無錫聯絡進紮八月二十二十一二等日李鶴章派令張樹聲等軍列隊芙蓉山突有賊匪

七八千人來撲各軍迎前擊退連奪賊卡追至城根立將西北兩門各賊壘一律平毀燒毀賊船十餘號二十六七等日僞侍王李侍賢等率眾四五萬人由無錫南門至坊前梅村三十餘里賊氛一片高橋大股亦分眾七八千人擾至西高山李鴻章派令各軍分路迎剿郭松林督帶馬隊衝殺東路散賊設伏誘擊賊隊大亂悉向坊前梅村敗走滕嗣武等軍由東王橋包鈔夾擊擒斬千餘人張樹珊等合擊街西股賊正追殺閒該逆復出礮船數十號將鈔我後張樹聲等揮隊截擊並飭參將李正珮槍船助剿將陸路之賊斬擒幾盡並奪獲礮船五六十號生擒賊目三十餘名高橋大股及北門出竄之賊亦經周盛波等擊退賊敗入城二十九日僞忠王糾合水陸賊匪十餘萬由蘇州竄出直犯大橋角官軍營盤李鶴章督軍馳援周壽昌率親兵數千人向賊船施放槍礮燒

毀賊船八隻斃賊數百名其對河悍逆復由浮橋偷渡圍逼官軍營盤吳勝清督率各軍擊斃賊屍狼藉適援軍大集勇氣百倍張樹珊率洋槍礮衝擊斃賊百餘賊猶死拒各軍分隊鈔擊連拋火彈延燒該逆藥簍張士芳等揮軍直入往來馳突四面環攻該逆奪路奔竄復被董鳳高等率劈山礮隊扼橋截擊斃賊數百名餘匪落河溺斃者無數南面之賊並經黃翼升等率洋槍隊橫擊之擊沈賊船多隻大橋角之圍立解其退踞黃埭及分竄緱山芙蓉山之賊均經官軍連日擊退擒斬甚多並燒毀大輪船礮船多隻訊據賊供僞祥王黃滢芸僞納王郅泳寬僞忠王之子均被官兵擊敗落水淹斃查我軍進圖無錫蘇賊日見危蹙僞忠王李秀城僞侍王李侍賢率大股來援欲攻破大橋角營盤直入常熟太倉擾我後路掣我兵勢幸將士用命苦戰連旬轉危爲安臣仍慎密

防備並飭李鶴章程學啟等穩紮穩進以圖攻取又奏程學啟一軍自攻克寶帶橋後卽商同李朝斌戈登扼要駐守八月十九日忠逆糾眾七八萬來撲程學啟督兵截擊鏖戰八時之久傷斃無算賊始敗退九月初二日賊由齊婁葑三門分股出犯約四五萬眾程學啟督軍迎戰槍礮輪施逼賊退至護城河邊始行收隊嘉興大股分路入竄踞紮七里橋蔓延二十餘里經駐守之副將何安泰等迎擊力戰竟日斃賊數百總兵陳有昇馳至腹背夾擊賊始敗退初四五等日湖州嘉興之賊分竄吳江東南其由平望至同里一路賊眾亦四出焚擄李朝斌等督隊擊退平毀賊卡數十處查蘇州城大池深附河堅壘攻取頗難忠逆又挾眾來援時欲乘虛擾我後路刻下兵力尙單似須各路得手賊勢稍分乃可乘機攻克 上諭議政王軍機大臣等李鴻章督飭各營進規無錫

聯絡進紮將斷蘇州咽喉之路僞忠逆侍逆等各率大股自金陵來援帶領白齊文黨眾火輪炸礮等船計圖攻破大橋角等營盤直入常熟太倉掣動各軍後路勢極狡橫諸軍喋血苦戰擊走援賊各營得以轉危爲安僞忠逆等計索而去白齊文亦窮蹙乞降雖爲賊所囚殺尙未確實亦復無能爲役我軍將士此次實爲異常出力踊躍用命深堪嘉尙著李鴻章加意拊循傳旨嘉獎此時援賊屢敗城賊亦經屢創而困獸猶鬪仍令飭令李鶴章程學啟等穩紮穩進毋以垂成之功稍涉驕懈蘇州城大池深賊以附河堅壘面面死守屢欲乘虛狡逞著李鴻章飭令程學啟李朝斌等嚴扼要隘制其奔突仍當聯絡各路之軍相機攻取左宗棠所部蔣益澧等軍自攻克富陽後卽當進圖杭城曾國藩昨奏青陽圍解將督各軍驅除皖南各股東接浙師之氣北絕金陵之援並著

李鴻章隨時函會咨商總期金陵杭蘇同時並圖進取以挽東南全局將此由六百里諭令知之○諭張之萬奏宋逆黨匪闖入河朔兵練截擊敗竄等語前據劉長佑奏報賊自大寨向西竄走適河北鎮道均未在防總兵楊長春遇賊未及接仗等語當經寄諭該督撫等飭令實力嚴防茲據張之萬奏賊由開州進窺滑濬楊長春探蹤迎剿由彰郡帶兵行抵郡南之張官屯遇賊揮軍進擊立即壓退並於初四等日督隊至楊家新莊及臨漳之南駱村一帶疊加剿擊追賊出境直至直隸肥鄉縣之李林鋪王安堡而還等語與劉長佑前奏情形迥不相符是否楊長春等及各地地方文武捏報勝仗希圖追責抑係劉長佑前奏探報失實均屬不可不察各省帶兵將領及地方官吏往往於賊蹤所過不能豫備截擊及賊去而捏飾稟報輒稱某日某處擒斬賊匪若干名大吏不察

據以入奏而賊實往來境地毫無阻截以致逆氛所至延蔓積習相沿痛恨實深前河南軍務之無起色未必不由於此此次楊長春等於河朔地方擊賊究竟有無其事著劉長佑張之萬均各確切查明據實奏聞毋許稍存文飾如實係防剿不力事後捏報勝仗卽應據實嚴參軍營探報亦往往有偵查不實之弊劉長佑亦不可不加查察運河東西分竄股匪節據僧格林沁劉長佑等所報均各餘匪數百餘名日來勦辦究復如何其自橐城越滹沱河南竄之賊又經竄向何處宋懞詩是否果已棄眾潛逃見在曾否捕拏就獲直豫兩省防剿各軍仍著劉長佑張之萬嚴督前截後追迅殲醜類毫捻李大箇子由睢杞折趨蘭考避兵東歸經毛昶熙派令遊擊呂振河等率領馬步疊加勦創遁回亳巢此股捻匪爲苗逆指喉出而滋擾仍難保不復圖窺覷豫境仍著張之萬飭

令宋防兵勇扼要嚴防張之萬前奏大金店盤踞之張總愚股匪被剿南竄見在各軍勦辦若何此股賊匪復又竄往何處著張之萬詳悉具奏善慶所帶黑龍江餘丁早已進口南行何以尙未抵豫著張之萬迅卽迎提並著劉長佑飭令所屬沿途查明催趲前進薩薩布一員卽准張之萬所請飭令赴豫帶領馬隊卽由張之萬傳旨截畱善慶帶兵到豫仍卽飭令遵奉前旨抽撥吉林黑龍江餘丁五百名綏遠城察哈爾馬五百匹統帶赴皖以資攻剿毋稍遲延李明惠一軍見已行抵河北毋庸再行折赴許州轉費周折仍著劉長佑遵旨飭令由河北探明賊蹤攔截與直省官軍速收夾擊之效俟賊股殲滅後此軍仍回直隸歸劉長佑調遣將此由六百里各諭令知之○丙寅諭議政王軍機大臣等有人奏護理陝甘總督甘肅布政使恩麟辦事顛預不學無術當陝西回變

初起該護督並不於接壤要隘嚴密巡防以致該匪聲息相通潛
往助逆焚掠之後滿載回甘如入無人之境河州狄道回變繼起
百姓赴省請兵該護督閉署不問迨賊氛逼近省垣惟於衙署內
添兵環守不許難民入城而於回民出入城門不敢過問該護督
見逆燄鴟張遂借招撫爲補苴之計乃王阿宏甫昇頂帶而固原
鹽茶相繼失守其爲詐降內潰情弊顯然恩麟竟以另股賊匪含
混入奏民人王福等集眾聯團意圖除害該護督輒坐以謀叛大
逆斬首四人又逼令紳士裁撤團練使招募之勇訓練之功廢於
一旦革員成瑞趙秉鑑和祥係債事獲咎之員該護督欲見好數
人遂令辦理招撫藉圖保舉該廢員等遂餽賊求和且逼令難民
改裝隨教號曰新回以致回逆愈撫愈橫省南省北一帶蠡屯蟻
聚滋蔓難圖皆由舍勦議撫貽誤大局請飭查辦各等語恩麟護

理督篆已逾一年而回氛日甚一日甘肅全省幾有糜爛之勢若非該護督惟怯無能養癰成患何至賊勢猖獗若此著多隆阿熙麟按照所參各款嚴密訪查據實覆奏毋稍徇隱原摺著鈔給閱看將此由五百里各諭令知之○諭昨據富明阿等奏妥籌臨淮戰守及分兵援救蒙城業經諭令該將軍等相機進取與陳國瑞聯絡聲勢迅解重圍茲據吳棠奏陳國瑞一軍見已移紮王家窩圩在蒙城迤東七里賊亦率黨而東與官軍夾河相守擬俟水漲稍涸乘黑夜渡河襲賊捻首李大箇子魏羣等由豫回踞石弓山一帶逼擾臨渙等處關繫蒙軍北路餉道經陳國瑞添派佐領訥穆錦等帶領馬隊協同艾憲銀先將捻逆擊退再赴蒙城等語蒙城被圍日久情形萬分危急苗逆與李南華素有仇隙此次糾黨圍困蒙城挖長濠三道誓欲得而甘心覽吳棠所呈官軍紮營

地圖益形焦急本月初旬李南華因城內糧缺密遣勇丁乘夜赴營求救雖經陳國瑞慰勞給銀五百兩飭令分帶回城該勇丁能否踰濠而進尙難豫必吳棠見調副將張從龍知縣吳炳庭等帶勇馳援而兵力仍未甚厚且道遠非旦夕可致著富明阿唐訓方恪遵昨日諭旨速飭派出之總兵宋慶星速前進會同陳國瑞各營併力進攻迅解城圍富明阿唐訓方並設法策應毋許遷延貽誤懷遠近日賊勢若何若王才秀北岸之兵一時不能掣動圍蒙之賊莫若添調勁旅徑赴蒙城助剿分扼全家集一帶截賊糧運則蒙城之圍可期速解著富明阿唐訓方酌度機宜妥爲調遣張從龍所部並著吳棠催令趕緊遄行不准逗遛干咎將此由六百里各諭令知之○御史丁壽昌請責成畿輔各州縣辦理團練嚴定賞罰得旨允行○戊辰諭議政王軍機大臣等劉長佑奏敗賊

紛竄經兵團截剿殆盡兼獲巨欸見仍分路搜捕一摺宋憬詩棄
眾潛逃餘黨分股一爲楊澱一一爲朱登豐並有劉厚德程敬書
岳金聲諸賊目分道狼奔據劉長佑奏楊澱一著名悍賊兇狡尤
甚前由恩縣等處折竄至武城之夾馬營潛渡運河與程敬書合
竄南宮邱縣館陶一帶於本月十三日在大名府之石槽坊地面
經該地方文武兵勇截擊將楊澱一生擒正法其黨岳金聲率領
敗殘餘匪百餘騎竄至任縣隆平交界復經余承恩等兵練圍剿
窮蹙乞降當將岳金聲正法餘眾遣散馬匹器械全數收繳其朱
登豐一股由臺城渡滹沱河而南經恆齡等擊之於趙州復爲柏
鄉任縣沙河等各地地方官帶團截剿至邱縣館陶之楚家莊一帶
由西南安淨村渡河東竄所餘馬賊諒亦無多卽著僧格林沁飭
令恆齡舒通額等馬隊乘勢追擊劉長佑督飭祝塏等兵勇隨同

跟追務將此股餘匪及早殲除淨盡毋畱餘孽宋憬詩究係逃往何處劉厚德亦著名兇悍是否果與宋逆潛逃劉長佑張之萬閻敬銘一體飭令帶兵文武搜捕並令各地方探蹤購綫務將渠魁就獲毋任漏網致令潛謀煽結餘燼復然如宋憬詩劉厚德等復有在何處再行滋擾之事必爲該督撫等是問見在大名曲周廣平等縣尚有馬賊各四五十名七八十名不等往來奔逸更難保劉厚德等不仍藏匿其中且恐直屬地方似此零股馬賊所在滋擾亦尙不止大名曲周等縣爲然此次宋逆分股竄擾直東各屬被其蹂躪百姓荼毒已屬難堪見在餘賊敗殘無難早日肅清劉長佑見由方順橋回紮衡水李明惠所帶勇隊已抵廣平足資助勦著卽嚴督各路兵勇速行將朱登豐殘股並大名曲周等縣零匪悉就殲除不得以楊澱一一股就殲稍涉鬆勁尤不得任令各

地方粉飾遷就以爲了事自干咎戾也將此由六百里各諭令知之○予江蘇陣亡參將廣霖祭葬世職○已已諭內閣本日據吏兵二部奏遵旨嚴議毛震壽等處分一摺陝西布政使毛震壽候補知府易佩紳辦理漢南軍務疲玩遷延日久無功甘肅肅州鎮總兵何勝必記名提督蕭慶高帶兵援陝連失二城該文武各員等均有統帶專營之責不能迅解城圍以致漢中城固兩城相繼失陷實堪痛恨蕭慶高何勝必易佩紳均著照該部所議卽行革職並著仍畱軍營以觀後效至毛震壽督辦漢南軍務各營將士均歸統率兵力不爲不厚且在營已及一年之久乃一味遷延觀望以致連失二城厥咎甚重經吏部先後兩次遵旨分別嚴議毛震壽著卽革職交劉蓉差遣委用責令戴罪殺賊自效儻再不知愧奮卽著劉蓉從嚴參辦重治其罪以示懲儆暫署陝西巡撫按

察使張集馨於漢中城固兩城失守未能先事豫防著照部議降
二級畱任不准抵銷○諭議政王軍機大臣等僧格林沁奏追剿
宋逆股匪首逆逃竄嚴飭搜捕遵卽督兵南剿捻苗並請飭直東
督撫遣撤募勇安置災民各摺片宋憬詩匪黨分竄昨據劉長佑
奏楊澱一股業已殲除茲據僧格林沁所奏略同並稱朱登豐
一股由橐城柏鄉一路被擊竄至廣平府地方分路復竄南館陶
搶渡衛河經僧格林沁派令副都統定安等馬隊分投追剿至莘
縣元城冠縣等處疊加埽蕩餘匪由桑阿鎮一帶回竄館陶屬之
羅家河口渡過河西散漫無蹤此等零星殘匪諒亦不難搜除淨
盡著僧格林沁仍飭定安等尋蹤搜捕劉長佑與閻敬銘各飭所
屬一體緝拏務將餘匪淨絕根株毋任一人漏網楊澱一餘黨匪
首岳金聲雖已擒拏正法其餘匪百餘名據劉長佑前奏擬卽遣

散但此股殘匪被官軍屢次追剿勢窮乞降其非誠心歸正已可概見既由僧格林沁咨行劉長佑斟酌辦理卽著該督察看如果投降實由窮蹙並非誠心卽當概予誅鋤毋畱餘孽以免後患宋憬詩率其敗殘百餘人逃至肥城之鵬鵝嶺拋械四散其賊目劉厚德同船七八十人已被團練礮擊沈溺宋憬詩止餘夏七一人跟隨向東北山中逃走餘匪四散此等均屬獲賊供詞恐尙難卽據以爲信劉厚德著名兇狡是否在船沈溺著再行詳查確實具奏宋憬詩係屬渠魁見在亡魂漏刃之餘斷不准聽其免脫卽著劉長佑閻敬銘嚴飭所屬一體嚴拏務獲儻竟令該匪首得以免脫致畱遺孽必惟該督撫是問僧格林沁仍飭陳國瑞酌派官兵探蹤購綫協同躡緝朱登豐程敬書張廣德等及在逃各匪犯均須按名逐一搜拏務獲毋使漏網僧格林沁所派定安帶領黑龍

江及京旗官兵駐紮直東交界彈壓巡緝直東境內如有匪徒滋擾卽會同各該省官軍立卽剿辦張之萬見駐許昌而豫省捻蹤四擾僧格林沁督兵赴豫偵察賊情應將何股先行剿洗諒該大臣必有權宜豫省各軍應令如何相爲策應並著與張之萬商同飭令聽候調遣另片所奏北方剿賊非馬隊不能制勝請飭直東各督撫將所募之勇酌量妥爲遣撤等語所見甚是著劉長佑閻敬銘酌量情形或卽遣撤各歸本籍或擇其精銳派赴豫皖隨同剿賊或卽以補各該省兵額之缺僧格林沁原片著鈔給劉長佑閻敬銘閱看直東地方所有一切善後事宜該督撫等卽當嚴督所屬妥籌辦理畿輔地方緊要勇隊裁撤之後其直東各營伍應卽如何整頓操練並著劉長佑閻敬銘趕緊籌辦白蓮池荒廢地畝令曹州所屬災民遷移認墾前經寄諭閻敬銘查明妥辦茲據

僧格林沁所奏宋逆削平莘堂冠館朝觀等縣逆產甚多運河左近黃水漫溢被淹村莊哀鴻遍野正可藉資安輯著卽照所請飭令已革直隸總督文煜已革按察使孫治畱於山東專司辦理兗州東昌等處清查逆產招撫災黎事宜督同地方官逐處查勘認真妥辦不得有名無實徒滋弊端白蓮池地勢較廣該大臣擬將黃河以南被淹災民安置白蓮池一帶黃河以北被淹災民安置劉貫莊甘官屯一帶卽著飭令地方官詳查辦理黃河改道以來西自考城東至利津各州縣犬牙相錯被水隔絕土匪四起州縣難以稽查不能卽行捕緝以致釀成巨患見在黃水兩岸仍恐尙有奸民倚恃漫水藏身復萌故智據僧格林沁奏卽如梁山地方係壽張縣屬見隔黃水以南河面漫溢數十里該管地方官卽稽查難周其請將新黃河以南地方歸以南各州縣管理以北地方

歸以北各州縣管理之處卽著閻敬銘查明辦理總期於地方有益而奸匪不至伏戎爲患方爲妥善白蓮池地方亦屬犬牙交錯向爲藏奸之所應卽改爲一州縣管理以便稽查而專責成並著閻敬銘悉心妥議如一州縣官職尙輕不足以資統攝應否升設直隸州廳稍重事權以資鎮壓並著酌量情形籌定具奏僧格林沁所部馬力疲乏著准其緩程前進行抵豫省卽將捻苗剿辦事宜相機進取隨時馳奏將此由六百里各諭令知之○庚午諭議政王軍機大臣等熙麟奏援平弁勇連破銅城丈八寺等處賊巢一摺另片奏陝回西竄請簡派大員帶兵來甘助剿等語平涼失守之後賊氛益肆此次余萬朋帶勇僅二千餘名竟能將備同心三日之內連破堅巢從此軍威一振卽可節節剿洗著熙麟督飭余萬朋等乘勝進取規復平涼毋稍延誤陝省敗回紛紛西竄白

集原神浴河等處愈聚愈多涇甯情形倍形喫重熙麟雖派陝勇一營赴涇扼守而兵數甚單且固原股匪竄擾環縣屬境尤爲慶陽門戶之憂必應厚集兵力方能大挫兇鋒前據多隆阿奏已飭雷正綰帶領十營前赴固原援剿此時甘省軍情喫重雷正綰務當趕緊啟程鼓行而西相機進剿陶茂林計已到鳳卽著多隆阿飭令迅解鳳翔之圍前赴甘省會同剿賊成祿向隨雷正綰剿回甚爲出力熙麟請飭該總兵帶隊來甘之處能否抽調著多隆阿斟酌辦理見在援甘兵勇爲數已不爲少而雷正綰等又屬久歷行陣勇敢素著之員指日大兵雲集自可迅奏膚功熙麟當督飭在營將士踴躍赴功慎重防剿毋以驟勝而驕爲賊所乘宜君縣爲河東餉道所經見在該縣村莊被賊竄擾自應趕緊殲除以通糧路著熙麟嚴飭馮元佐等聯絡民團實力剿辦將此由六百里

各諭令知之○御史馬元瑞條陳薄賦稅慎訟獄善拊循勤曉諭

四事均如所請行○以林壽圖爲陝西布政使由順天府府尹遷○辛未

諭議政王軍機大臣等閻敬銘奏先後拏獲宋逆家屬訊明宋逆

竄路情形一摺據稱派弁暗訪匪黨蹤迹經東平平陰等州縣先

後拏獲汪喜等十四名又獲著名賊目于得成等七名又孔三等

二十四名訊據賊供宋逆死黨三十餘人由鵬鵝嶺地方往山深

處東北逃走賊目郭景會劉厚德張夢海等均被官兵礮船轟斃

落水身死又供宋逆僅有夏七一人跟隨又供宋逆與其弟宋憬

書叔姪三人赴東南山中逃走該署撫已派各州縣營汛分路躡

緝並將宋逆之母宋張氏等緝獲等語與僧格林沁前奏大略相

同宋逆蹤迹詭祕恐其由兗沂山徑南竄徐屬著吳棠飭令各州

縣懸賞購綫嚴密偵探務在必獲毋令入境勾結苗黨或致死灰

復然閻敬銘仍當督飭令地方官防其回竄嚴密兜捕不可稍涉
疏懈其朱登豐程敬書張廣德等及零星竄散餘黨尙屬不少著
懍遵前旨一體緝拏務期淨盡儻有漏網匪徒再行勾結爲患定
惟該署撫是問白蓮池一帶聞尙有匪徒藏匿山谷僧格林沁大
軍南下恐該匪餘燼復熾乘機盤踞不可不嚴行搜捕以絕根株
著閻敬銘會同國瑞派兵搜緝以收廓清之效將此由六百里各
諭令知之○王申諭議政王軍機大臣等駱秉章奏攻剿李幅猷
股匪疊獲大勝賊氛窮蹙遠遁漢南援軍先勝後挫見籌布置情
形各摺髮逆李幅猷率黨由正安婺川竄至彭水之周家寨經官
軍痛剿由梅子埡竄西陽之學堂坪兩河口前隊已竄入黔江復
經官軍擊敗該逆由綫壩遁入湖北之咸豐縣復折竄黔江由龍
潭奔竄秀山旋敗竄平塊至邑梅濫橋遁入黔境餘賊自花園入

湖南麻陽一帶與惲世臨前奏髮逆闌入楚境情形大略相同該逆經楚軍截勦之後復被痛創殘燄諒難再張亟應協力進勦以圖聚殲著駱秉章惲世臨各飭在防官軍會合進攻兩面夾擊迅殲醜類務將此股賊匪就地埽除毋令再肆蔓延李幅猷一股旣遁入黔境黔省銅仁土匪包逆見尙游駛黔蜀邊界西秀一帶自應嚴密防禦所有該督派出駐防秀山之果後軍三營卽著駱秉章飭令認真捍禦嚴加守備毋稍疏懈致黔匪得以闌入川疆並著勞崇光張亮基迅派得力兵將將李幅猷敗竄餘匪及銅仁土匪會合川軍分投夾擊實力殲除毋任蔓延句結漢南援軍新挫賊勢鴟張陝南固形糜爛而川北各隘之防亦更形喫重且中旗逆匪由略陽竄蔓甘肅徽縣一帶已出川軍之左駱秉章見派許蔭棠率所部赴蕎莊黎鴻鈞率所部由松潘前往合紮調果後九

營馳赴保甯一路所籌均尙周妥務須飭令派出各軍實力防剿以固川疆劉蓉已抵保甯著卽迅速前進相機剿辦迅克漢中城固等城惟該撫所恃以進剿之軍卽此湘果等營見在銳氣已挫一時恐難進攻應否將派赴保甯之果後九營移紮前敵協同剿洗之處著駱秉章劉蓉酌度情形妥籌辦理將此由六百里各諭令知之○癸酉以孟冬時享 太廟 上前期親詣行禮○吳棠奏蒙圍危急陳國瑞於九月十一日約會英翰姚廣武等軍由西北面進派總兵郭寶昌副將康錦文等帶隊由北面進參將駱得勝等帶隊由東面進各軍開槍轟擊斃賊二百餘名官軍越過二道賊濠直逼賊壘副將康錦文受傷都司李福守備馬敬千總曹學純先後陣亡傷亡兵勇三百餘名宿境捻股竄窺臨渙圩者由周家圩築壘二座以截艾憲銀等軍之後艾憲銀與訥穆錦等各

隊出勦攻毀賊築二圩餘捻仍踞楊講背等圩負嵎相拒陳國瑞以臨渙一路爲蒙軍最要糧道當屬姚廣武等隊赴宿勦捻並截畱自浦撥往之副將張從龍一軍順道先勦捻匪再赴蒙營臣查陳國瑞一軍兵力本單不足以制圍蒙之賊連日傷亡將士多名不惟無救於蒙圍且恐苗逆生心乘機出撲官軍營壘兇燄更張正籌畫間據淮徐揚海道朱善張稟稱直東軍務肅清鄒縣兵馬整齊侍郎國瑞指日隨同親王僧格林沁分道南下征苗因曹州水阻改由韓莊取道徐州各等語合無仰懇 天恩飭親王僧格林沁剋日移軍入皖不惟宿永各捻可以一麾而定且能畱蒙邑一城將來進戡逆苗尤省兵力 上議議政王軍機大臣等陳國瑞一軍與姚廣武英翰等軍約齊分路進攻圍蒙賊壘冒雨越濠將弁兵勇受傷五百餘名陣亡三百餘名之多似此情形蒙城固

已十分危殆而陳國瑞之軍損折日多殊堪痛惜不惟無救於蒙圍且恐苗逆乘機出撲官軍營壘兇燄更張吳棠所撥各軍又不能不先顧臨渙糧道如或蒙城不保該逆得以據爲北路巢穴即使援師大集攻剿更難措手僧格林沁見已由東督兵赴豫著卽於抵豫後迅速布置赴皖救援先解蒙城之圍其豫境各捻應卽如何分路堵剿籌定機宜卽可交張之萬毛昶熙等辦理該大臣卽督飭各軍先行剿辦苗逆設法保全蒙城俾有進兵之地該大臣務當先其所急迅卽籌辦不可爲豫捻所牽致令苗黨得以愈益鴟張負嵎自固陳國瑞兵力本不甚厚奮力血戰徒多損失該營所需炸礮等項並著僧格林沁飭催各營迅卽分撥解往以資利用李世忠所部與富明阿統領各軍分南北岸進兵該提督效用正殷卽著曾國藩加之激勵飭令迅速進攻並飭駐紮潁六各

軍分路並進以制賊勢富明阿所督各軍仍與唐訓方會商設法
援應蒙城內外諸軍力圖保全並與陳國瑞熟籌進攻機宜毋徒
冒進致挫軍威僧格林沁所督各軍馬多步少淮河北一帶汴
港紛歧利於步戰所有一切馳逐攻堅之事著曾國藩富明阿唐
訓方嚴飭楚軍奮勇當先不准因僧格林沁督軍前來觀望推諉
致有貽誤將此由六百里各諭令知之○諭官文嚴樹森奏梃
分股竄擾鄂疆水陸疊勦獲勝一摺擒匪由豫省竄入楚北鍾祥
縣境折回隨棗歷隨州德安應山以至孝感雲夢復分股由隨州
之茅茨畝南趨京山天門至應城之長江埠均經官軍水陸截勦
疊獲勝仗官文等見飭各軍分道窮追著卽飭令在事文武實力
堵勦務將各匪就地殲除毋任旁竄其王金奎一股復有由豫省
臨潁舞陽一帶竄擾鄂疆之信著官文嚴樹森分布兵勇嚴密遏

東華續金 卷之二十一 六
截並著張之萬迅速派兵截擊杜其竄鄂之路隨棗應山一帶接
壤南陽信陽該匪被鄂省追剿緊急勢必回擾豫疆應城孝感一
帶距皖省西界較近亦應防其竄入著曾國藩張之萬各於交界
地方派兵防堵會合鄂軍前後夾擊毋任匪蹤奔突毫無攔阻此
次捻股分擾鄂豫兩省飄忽靡常往來如織曾國藩張之萬務當
與官文等合力同心將該逆痛加掃蕩毋得各顧本境強分畛域
致令匪蹤蔓延是爲至要將此由六百里各諭令知之○予湖北
陣亡副將李春華等祭葬世職入祀昭忠祠○是月豁免直隸滄
州等八州縣山東海豐縣暨嚴鎮等三場節年未完竈課緩徵河
南信陽等十一州縣被擾新舊額賦雜課山西太原縣被水本年

額賦